

冊府元龜

二年巡按福建監察御史臣李嗣京 訂正

黃元武分守建南道左布政使臣胡維霖 叅閱

知建陽縣事 臣黃國琦較釋

閏位部

祥瑞

善之著者天乃降祥德之應者物斯為瑞其所繇來尚矣自建安之際寓內外裂江表傳祚高齊革命施及梁室實分正閏而建邦立社創業敷政苟非膺神明之眷集玄黃之祐亦安能端委南面拱揖群后哉



故其穹旻之錫祉昭於懸象動植之效靈彰于品物  
寶藏攸發坤珍總萃斯皆稽篇章而可復列圖品而  
焯叙形於感召謂之休徵者焉

蜀後主景耀元年史官言景星見于是大赦改元  
吳大帝以漢建安二十五年四月自公安都鄂改名  
武昌

是歲五月建業言甘露降

臣欽若等曰此以下  
此不書日故史臣闕

黃武元年三月都陽言黃龍見

二年五月曲阿言甘露降

四年六月皖口言木連理

五年七月蒼梧言鳳凰見

黃龍元年四月夏口武昌並言黃龍鳳凰見因改元

黃龍

三年夏有野蠶成繭大如卵繇拳野稻自生改為禾

興縣

十月會稽南始平言嘉禾生

嘉禾五年三月武昌言甘露降于禮賓殿

赤烏元年三月零陵言甘露降

八月武昌言麒麟見有司奏言麒麟者太平之應宜

改年號詔日間有赤烏集于殿前朕所親見若神靈



以為嘉祥者改年宜以赤烏為元群臣奏曰昔武王伐紂有赤烏之祥群臣觀之遂有天下聖人書策載述最詳者以為近事既嘉親見又明也于是改年

二年三月零陵言甘露降

五年三月海鹽縣黃龍見

六年正月新都言白虎見

七年秋宛陵言嘉禾生

九年四月武昌言甘露降

十一年四月雲陽言黃龍見黃龍二又見武陵吳壽

光色炫耀

五月鄱陽言白虎仁瑞應圖曰白虎仁者王者不暴虐則仁虎不害也

十二年六月戊戌寶鼎出臨平湖

八月癸丑白鳩見于章安

廢帝建興二年十一月大烏五見春申

五鳳元年交趾稗草化為稻

景帝永安三年三月西陵赤烏見是歲得大鼎于建

德縣

四年九月布山言白虎見

五年七月始新言黃龍見

六年四月泉陵言黃龍見



是歲青龍見於長沙白燕見於慈湖赤雀見于豫章  
後主甘露元年四月蔣陵言甘露降于是改年大業  
寶鼎元年八月所在言得大鼎于是改元  
四年正月西苑言鳳凰見

建衡三年西苑言鳳凰集改元明年爲鳳凰  
天監元年吳郡言掘地得銀一長尺廣三分上刻有  
年月日字

宋高祖永初元年七月青龍見義興陽羨

八月癸巳白虎見枝江是月青龍二見南郡江陵

九月庚申甘露降丹徒峴山

十月庚午甘露降典寧永寧二陵彌冠百餘里

二年六月丁酉白鳥見吳郡婁縣太守孟顛以獻

少帝景平元年五月癸未白黿見義興陽羨太守王  
淮之獲以獻

十月白虎見桂陽來陽

文帝初封宜都王景平二年六月將入奉大統白黿  
見南郡江陽太守王華獻之以爲休祥

元嘉元年七月壬戌白燕集齊郡城遊翔庭宇經九  
日乃去衆燕隨從無數巳巳白雀見齊郡昌國

二年五月北征長史廣陵太守范逸上言所領與



前有大浦控引潮流水淤濁自此以來源流清  
鱗呈形故老相傳以為休瑞

十月嘉禾生潁川陽翟太守垣苗以聞

十一月甲辰白鳥見山陽太守阮寶以聞

三年閏正月己丑甘露降吳興烏程太守王韶之以

聞

三月甲戌丹陽湖孰薛爽之獲白鳥以獻

四年五月辛巳甘露降齊郡西安臨朐城

七月乙酉白雀見北海劇縣

十一月辛未朔甘露降初寧陵己丑甘露降南海

安廣州刺史江桓以聞

五年四月乙巳白鵞見汝南武津太守鄭據獲以聞

五月庚辰白雉見東莞莒縣太守劉玄以聞

七月庚戌白鹿見東莞莒縣峒峩山太守劉玄以聞

六年九月長廣昌陽淳于邈獲白兔青州刺史蕭思

話以獻

七年七月乙酉建寧康嶺擔湖二蓮一蒂

八年四月乙亥東莞莒縣樹連理太守劉玄以聞

五月辛丑白雀集左衛府

是月甘露降南海番禺



閏六月丁亥司徒府白從伊生於淮南繁昌獲白鹿以獻

八月木連理生東安新泰縣

九年正月白鹿見南譙譙縣豫州刺史長沙王義欣以獻

三月嘉禾生義陽豫州刺史長沙王義欣以獻

六月木連理生營陽冷道太守王展禽以聞

十一月壬子甘露降初寧陵

十年七月己丑華林天淵池芙蓉異花同蒂

八月嘉禾生汝南包信豫州刺史長沙王義欣以聞

十二月營城縣民成公會之于廣陵高郵界獲白麋鹿以獻

十一年五月丁酉齊郡西安宗顯獲曰雀青州刺史

段宏以獻

六月乙巳吳郡海鹽王悅獲白鳥揚州刺史彭城王義康以獻

八月甲辰甘露降費縣之沙里琅瑯太守呂綽以聞

是月嘉禾一莖九穗生北汝陰太守王玄謨以獻

是年臣欽若等曰此以下凡不書月並史臣闕朱草生蜀郡郫縣王之家

益州甄法崇以聞



十二年正月白鹿見東萊黃縣青冀二州刺史王方  
回以獻

二月丁卯南郡江陵庾和園甘樹連理荊州刺史臨  
川王義慶以聞

是月馬頭濟陽柞樹連理豫州刺史長沙王義欣以  
聞

是年衡陽湘鄉醴泉出縣庭荊州刺史臨川王義慶  
以聞

十三年二月丁卯甘露降明巴山

是月甘露降吳縣武康董道蓋家園樹

三月戊辰義興陽羨令獲白鳥太守以獻甲午甘露  
降初寧陵

四月辛丑武昌縣章山水側自開出神鼎江州刺史  
南譙王義宣以獻

七月甲戌濟南朝陽王道獲白兔青州刺史段宏以  
獻

九月己酉會稽郡西南向晚忽天光明有青龍騰躍  
凌雲從而後滅吳興諸處竝以其日同見光景揚州  
刺史彭城王義康以聞

十四年正月丙申白兔見山陽縣山陽太守劉悛之



以獻

二月宮內螽斯室前梨樹連理豫州刺史長沙王義欣以聞

五月甲午白雀集費縣員外散騎侍郎郭敬家養以獻

是年白雀二見荊州府客館白鹿見文鄉白燕集荊州府門刺史臨川王義慶以聞

十五年六月白雀見建康定陰里揚州刺史彭城王義康以獻

七月壬申山陽師參獲白兔南兖州刺史江夏王義恭以獻

八月白雀見西陽江州刺史南譙王義宣以獻白雀集延康都亭里揚州刺史彭城王義康以聞

十六年二月白雉見陳郡豫州刺史長沙王義欣以聞

三月巳卯甘露降廣州城北河揚州刺史陸徽以聞七月壬申華林池雙蓮同幹

十七年四月丁丑甘露降廣陵永福里梁昌季家樹南兖州刺史江夏王義恭以聞

五月甲午白鹿見南汝陰宋縣太守支道恩以獻壬



寅白雀二見荊州後園刺史衡陽王義季以聞

七月武昌崇讓鄉程僧愛家侯楓木連里江州刺史

臨川王義慶以聞

十月尋陽弘農湖芙蓉連理義慶以聞

十一月乙酉甘露降樂遊苑

是年甘露降高平金鄉富民村方三十里中徐州刺

史趙伯符以聞

十八年二月癸丑白雉見南汝陰宋縣太守文道恩

以獻

五月甲申甘露降丹陽秣陵衛將軍臨川王義慶園

楊州刺史始興王濬以聞

六月白燕產丹徒縣南徐州刺史南譙王義宣以聞

甘露降廣陵孟王季家樹南兗州刺史臨川王義慶

以聞

七月吳郡益官于玄獲白雀太守劉禎以獻

八月庚午會稽山陰商世寶獲白鳩眼足並赤楊州

刺史始興王濬以獻

十二月木連理生歷陽劉成之家南豫州刺史武陵

王駿以聞

十九年四月戊申白龜見吳興餘杭太守文道恩以



獻

五月丁卯甘露降建康司徒參軍督護顧俊之宅竹柳乙亥甘露降馬頭濟陽宋慶之園樹太守荀頭以

聞

是月山陽張林宗獲白鵲海陵王文秀獲白鳥南兖州刺史臨川王義慶以獻

七月白鳥產晉陵暨陽僑民彭城劉元秀宅樹元秀以聞

八月壬子揚州後池二蓮合華州刺史始興王濬以聞

九月戊申廣陵肥如石梁澗中出石鍾九口大小行次引列南向南兖州刺史臨川王義慶以獻

十月白虎見戈陽期斯二縣南豫州刺史武陵王駿以聞

二十年四月辛卯白龜見吳興餘杭揚州刺史始興王濬以聞

五月丁丑白雀二見京都材官吏黃公歡軍人丁用夫各獲以獻廬陵郡池芙蓉二花一蒂太守王淵以

聞白燕集南郡內史臧綽以聞

六月壬子華林天淵池芙蓉二花一蒂園丞陳象祖



州府元龜 祥瑞

卷之二百一

以聞

是月白雉見高平萬興縣徐州刺史臧質以獻嘉禾  
一莖九穗生上庸新安梁州刺史劉道以獻

七月吳興郡後池芙蓉二花一蒂太守孔士山以聞  
彭城劉原又獲白鳥以獻盱眙考城縣柞梅二株連  
聖南兖州刺史王義慶以聞

八月揚州後池芙蓉二花一蒂刺史始興王濬以獻  
白鹿見譙郡蘄縣太守琬以獻白驢見江夏安陸內  
史劉思考以獻

是月木連理生汝陰豫州刺史劉遵考以聞  
是年夏永嘉郡後池芙蓉二花一蒂太守臧藝以聞  
秣陵衛倚之獲白雀丹陽尹徐湛之以獻

二十一年三月白兔見東萊當利青州刺史杜冀以  
聞

四月甘露頻降樂遊苑甘露降義陽平陽太守龐秀  
之以聞甘露降彭城綏輿里徐州刺史臧質以聞

六月丙午華林苑天淵池二蓮同幹園丞陳襲祖以  
聞

十月己丑永嘉永寧見黃龍自雲而下太守臧藝以  
聞



十二月新陽獲古鼎于水側有篆書四十二字雍州刺史蕭思話以聞

是年甘露降益州府內梨李樹刺史庾俊之以聞木連理生晉陵無錫南徐州刺史南譙王義宣以聞湘州刺史南平王鐔獻赤鸚鵡木連理生歷陽烏江南豫州刺史武陵王譚以聞白燕見廣陵南兗州刺史廣陵王誕以獻

是年嘉禾生新野鄧縣雍州刺史蕭思話以獻

二十二年二月白鹿見建康縣楊州刺史始興王濬以聞又白鹿見南康贛縣南康相劉興祖以獻

是月丙子白雀見東安郡徐州刺史臧質以獻

是月樂遊苑池二蓮同幹苑丞梅道念以聞

閏五月丙午白雀見華林園員外散騎侍郎長沙王瑾獲以獻

六月丙子南彭城番縣時佛護獲白雀以獻

是月嘉禾生籍田一莖九穗

七月癸酉嘉禾生平虜陵徐州刺史臧質以獻辛巳南頓櫟連理豫州刺史趙伯符以聞

是月東宮玄圃園池二蓮同幹內監殿守舍人官勇民以聞



九月木連理生建康建康令張永以聞嘉禾生楊州東耕田刺史始興王濬以聞嘉禾生太尉府田太尉江陵王義恭以聞

十一月辛巳甘露降南郡江陵方城里荊州刺史南譙王義宣以聞

十二月丁酉甘露降長寧陵陵令包誕以聞

是年木連理生武昌江州刺史廬陵王紹以聞白鶴見新野鄧縣雍州刺史蕭思話以聞豫章寧縣出銅鐘江州刺史廣陵王紹以獻嘉禾生華林園百六十穗園丞陳龍祖以聞嘉禾生潁川陽曲豫州刺史趙伯符以聞

二十三年二月戊戌白鹿見兗州刺史檀和之以獻丁未甘露降樂遊苑苑丞張寶以聞辛亥木連理生商陰柔縣太守以聞

五月甲寅東宮隊白從陳超獲黑驢于肥如縣皇太子以獻

六月辛丑太子西池二蓮同幹池統胡永祖以聞壬寅華林天淵池芙蓉二花一帶園丞陳襲祖以聞丙辰白鹿見彭城縣征北將軍衡陽王義季獲以聞

七月乙丑嘉禾生籍田籍令褚熙白以聞庚午嘉禾



生丹陽椒唐里揚州刺史始興王濬以聞庚辰嘉禾生醴湖屯屯主王世宗以聞

八月乙酉嘉禾生華林園園丞陳襲祖以聞魚邑三周池二蓮同幹園丞徐道興以聞

九月庚辰嘉禾生沛郡蕭縣征北大將軍衡陽王義季以聞丙子甘露降長寧陵陵令華林以聞

十月辛巳東宮將魏榮獲青驪于秣陵

十二月庚子甘露降襄陽郡治雍州刺史武陵王駿以聞辛丑甘露頻降樂遊苑苑丞何道令以聞

是年吳郡嘉興塩官縣野稻自生三十許種揚州刺史始興王濬以聞

是年醴湖屯生嘉禾一莖九穗屯主王世宗以聞木連理生淮南當塗揚州刺史始興王濬以聞嘉禾生

江夏汝南荊州刺史南譙王義宣以聞

二十四年二月壬午臨川王第梨樹連理臨川王燮以聞戊戌河濟俱青龍驤將軍青冀二州刺史杜坦

以聞巳亥庚子甘露頻降景陽山山監張績以聞又是月巳亥三月丙辰甘露降尋陽松滋江州刺史廬陵王紹以聞

四月癸未甘露降陽松滋丙申又降江州城內桐樹



丁酉又降近城數里之中江州刺史廬陵王紹以聞  
白雀產吳郡鹽官民家太守劉禎以獻

五月辛未白鸞集司徒府西園太尉江夏王義恭以  
聞

六月己亥白雀五集長沙廟長沙王瑾以聞

七月己酉白兔見東莞太守趙球以獻壬子晉陵無

錫穀櫟樹連理南徐州刺史廣陵王誕以聞乙卯木

連理生會稽諸暨楊州刺史始興王濬以聞又會稽

太守羊玄保上改連理所生處康亭村爲木連理臨

川王第梨樹連理臨川王燁以聞甘露降京師楊州

刺史始興王濬以聞丁巳白兔見兖州刺史徐瓊以

聞丁卯禾旅生華林園及景陽山園丞梅道念以聞

是月甘露降襄城治下無量寺雍州刺史武陵王駿

以聞

八月乙巳嘉禾生魚城內白鳥見晉陵南徐州刺史

廣陵王誕以聞

九月白鳩見

十月甲午甘露降魏興郡內太守韋寧民以聞揚州

刺史始興王濬獲白龜以獻

二十五年二月乙丑白麋見淮南太守王休獲以獻



巳亥白虎見武昌武昌太守蔡興宗以聞

四月戊午白驪見南瑯琊太守王遠獲以獻戊辰木連理生晉陵南徐州刺史廣陵王誕以聞

五月辛未朔華林園白驪生二子皆自園丞梅道念以聞丁丑黑龍見玄武湖北苑丞王世宗以聞戊戌黑龍見玄武湖東北隅揚州刺史張立之以聞

六月壬寅嘉禾旅生華林園十秣七百穗園丞梅道念以聞壬子嘉黍生籍田籍田令褚熙伯以聞

七月壬辰嘉禾生北海青冀二州刺史王坦以聞

八月丙午嘉禾生太尉江夏王義恭果園江夏國典書令陳穎以聞辛亥黃龍見會稽太守孟穎以聞又廣陸有龍自湖西升天百姓皆見壬子嘉禾生建康化義里令丘珍孫以獻又白燕見廣陵城南兗州刺史徐湛之以聞癸丑嘉禾生華林園園丞梅道念以聞

十一月丁丑白虎見蜀郡二赤虎道前益州刺史陸徽以聞庚辰甘露降南郡荊州刺史南譙王義宣以聞乙未甘露降丹陽秣陵崑山

是月嘉禾生巴東荊州刺史南譙王義宣以聞

二十六年三月壬午甘露降景陽山華林園園丞梅



道念以聞戊寅白雉見東安沛郡各一徐充二州刺史武陵王獲以獻庚寅癸巳甘露頻降武昌江州刺史廬陵王紹以聞

四月戊戌白虎見南瑯琊半陽山二虎隨從太守王僧達以聞甲辰丙午戊申甘露頻降豫章南昌太守劉思考以聞

五月癸酉白鵲見建康崇孝里揚州刺史始興王濬以獻戊寅白燕產衡陽王墓亭郎中令朱曠之獲以獻丙戌白驪見馬頭豫州刺史南平王鐔以獻

六月甲寅嘉禾生籍田籍田令褚熙伯以獻

七月嘉禾生巴東胸臆荊州刺史南譙王義宣以聞二十七年正月巳丑白驪見濟陰徐州刺史武陵王駿以聞

三月壬辰白兔見竟陵荊州刺史南譙王義宣以獻又白兔見濟陰徐州刺史武陵王駿以聞

四月癸丑華林園白驪生一白子園丞梅道念以聞乙卯丙辰丁巳甘露頻降豫章南昌戊午午時天氣清明有絲雲映覆郡邑甘露降又白雲降太守劉思考以聞

五月甲戌甘露降南東海丹徒南徐州刺史始興王



濬以聞

六月壬辰白燕見秣陵丹陽尹徐湛之以獻丙午白虎見南汝陰豫州刺史南平王鑠以獻乙卯白雀見濟南郡薛榮以獻

十月乙丑嘉禾生北海青州刺史杜坦以聞

二十八年正月戊子木連理生尋陽柴桑又生州城內江州刺史建平王宏以聞

二月戊辰甘露降鐘山延賢寺楊州刺史廬陵王紹以聞壬午甘露降徽音殿前果樹

是月甘露降合殿後香花諸草

七月戊戌嘉禾生廣陵郡伯埭兖州刺史江夏王義恭以聞癸卯尋陽柴桑菽粟旅生彌漫原野江州刺史建平王宏以聞

八月己巳崇義軍人獲白雀一雙太子左率王錫以獻

二十九年四月癸丑白雀見會稽山陰太守東海王禕獲以獻

六月壬戌白鵞見晉陵暨陽南徐州刺史始興王濬以獻

八月癸酉白鹿見鄱南中郎將義武陵王以獻



十月丁未木連理生南瑯琊太守劉成以聞

三十年十一月壬午白鹿見南瑯琊太守王僧虔以

獻

十二月癸亥白鹿見武建郡雍州刺史朱循之以聞

八月癸酉白鹿見鄱陽南中郎將武陵王駿以獻

孝武帝孝建元年三月丙辰甘露降華林園

五月己亥臨沂縣魯尚明于城上獲赤雀太傅假黃

鉞江夏王義恭以獻

二年正月庚戌白兔見淮南太守申坦以聞

三月己酉甘露降丹陽秣陵中里路興之墓樹又木

連理生南郡江陵荊州刺史朱循之以聞辛亥甘露

降長寧陵松樹戊午甘露降丹陽秣陵尚書謝莊園

竹林莊以聞

是月甘露降襄陽民家梨樹

六月丙子左衛軍獲白雀以獻庚寅玄武湖二蓮同幹

癸巳嘉禾二株生江夏王義恭東田

七月癸丑黃龍見石頭城水濱中護軍湘東王以聞

是月木連理生歷陽太守袁敷以聞

九月己丑朔嘉禾異畝同穎生齊郡廣饒縣

三年二月乙丑白兔見原州獲以獻



三月庚子白鹿見臨川西豐縣壬子白虎見臨川西豐縣

閏三月辛酉黃門侍郎庾徽之家獲白雀以獻

四月丁亥臨川宜黃縣民田中得銅鐘七口內史傅徽以獻甲辰晉陵延陵得古鐘六口徐州刺史竟陵王誕以獻

五月己未龍見臨川郡江州刺史東海王以聞丁卯白雀見建康獲以獻木連理生北海都昌冀州刺史垣護之以聞

六月癸巳白麋見廣陵南兖州以獻

七月庚午嘉禾生吳興武康

九月甲戌細伏隊省井泉春夏深不盈尺忽至一丈有五色水清澄醴味汲引不窮

是月濟河清冀州刺史垣護之以聞

大明元年正月乙亥木連理生高平

二月己亥白麋見會稽諸暨縣獲以獻壬寅華林園雙橘樹連理

四月甲辰白鹿見南平白雀見南郡江陵癸卯其雪降華林園桐樹戊申白雀見尋陽

五月壬子紫氣從景陽樓上層出狀如烟起薄良久



甲寅白雀二見渤海獲以獻戊午嘉禾一株五莖生  
清暑殿鴟尾中癸亥黑龍見晉陵古石村改村爲津  
里甲子白雀見建康獲以獻丁丑蒼烏見襄陽縣成  
寅江乘縣民朱伯地中得玉璧徑五寸八分以獻  
六月丁亥白雀見零陵祁陽獲以獻庚子白虎見  
墨獲以獻

七月辛亥白雀見南陽苑獲以獻丁丑白麇見東萊  
曲城縣獲以獻

八月嘉禾生青州異根同穗

九月辛丑華林園梨樹連理

十月乙丑朔木連理生豫章南昌

二年正月壬戌白麇見山陽內史程天祚以聞

二月辛丑白麇見濟北太守殷孝祖以獻

三月壬子北汝陰樓煩平地出醴泉豫州刺史宗慤  
以聞己巳白雉雌雄各一見海陵南兗刺史竟陵王  
誕以獻

四月甲申蒼烏見襄陽雍州刺史王玄謨以獻己丑  
白鹿見桂楊郴縣湘州刺史山陽王休祐以獻辛丑  
木連理生汝南豫州刺史宗慤以聞

五月乙巳白燕產南郡江陵民家荊州刺史朱循之



以獻丁未白雀見建康揚州刺史西陽王子尚以獻  
甲子白燕二產山陽縣舍南兖州刺史竟陵王誕以  
獻

六月甲戌白燕產吳郡城內太守王翼之以獻丁亥  
白雀見河東定襄縣荊州刺史朱循之以聞

三年正月癸巳白鹿見南琅琊江乘南徐州刺史劉  
延孫以獻丙申婆皇國獻赤白鸚鵡各一

三月巳卯甘露降樂遊苑梅樹戊子甘露降宣城郡  
舍太守張辨以聞戊子毛龜見宣城廣德太守張辨  
以獻辛卯白鹿見廣陵新市太守柳光宗以聞

四月庚戌白雀見秣陵丹陽尹劉秀之以獻

五月壬午太宰府崇義軍人獲白雀太宰江夏王羨  
恭以獻甲申白燕產武陵臨沅民家郢州刺史孔  
符以聞

九月巳亥嘉禾生北海昌樂縣青州刺史顏師伯以  
聞甲午木連理生丹陽秣陵材官將軍范稅時以獻  
四年正月壬辰甘露降初寧陵松樹

二月丙申甘露降丹陽秣陵龍山丹陽尹孔靈符以  
聞乙巳徐州刺史劉道隆于汴水得白玉戟以獻  
三月丁亥木連理生華林園曜靈殿北



四月壬子木連理生華林園白觀臺北

五月辛巳白雀見廣陵侍中顏師伯以獻

六月戊戌木連理生會稽山陰楊州刺史西陽王子尚以聞壬寅車駕幸籍田白龜見于千畝尚書右僕射劉秀之以獻乙卯白燕見平昌青州刺史劉道隆以獻

五年正月丙子交州刺史垣閔獻白孔雀

四月庚戌白雀見晉陵太守沈文淑以獻辛亥甘露降吳興安吉太守歷陽王子頊以聞乙卯甘露降吳興烏程太守歷陽王子頊以聞

五月丙寅白鹿見南東海丹徒南徐州刺史劉延孫以獻癸未白雀二見尋陽江州刺史桂陽王休範以獻癸未白雀二見濟南青州刺史劉道隆以獻嘉禾生建康蔣陵里丹陽尹王僧朗以獻

九月庚戌河濟俱清平原太守申纂以聞巳巳白鹿見南陽雍州刺史永嘉王子仁以獻

閏九月木連理生邊城豫州刺史垣護之以聞

十二月戊寅淮南松木連理豫州刺史尋陽王子房以聞白雉見秦郡南兖州刺史晉安王子勛以獻是年籍田芙蓉二花同蒂大司農蕭邃以獻



六年二月戊午甘露降建康靈輝寺及諸苑園及秣陵龍山至于菱湖

是月又降句容縣乙丑木連理生晉陵南徐州刺史新安王子鸞以聞

三月丙午青雀見華林園

四月戊辰木連理生管陽湘州刺史建安王休仁以聞又白鵞見休仁以獻

六月乙丑白兔見青冀二州刺史劉道隆以獻

八月乙未木連理生彭城徐州刺史王玄謨以聞辛未嘉禾生樂陵青冀二州刺史劉道隆以聞乙巳白

雀見齊郡道隆以獻

是月白兔見北海

七年正月庚寅白鵞見南陽荊州刺史臨海王子頊以獻巳酉珊瑚連理生鬱林始安太守劉劭以聞

三月辛巳白鵞見汝南安陽太守申令孫以獻丙申甘露降壽陽松滋太守劉朦以聞

四月乙未白雀見廬陵王第廬陵王敬先以獻巳未甘露降荊州城內刺史臨海王子頊以聞乙丑白雀

見歷陽太守建平王景素以獻

五月辛未白雀見汝陰豫州刺史垣護之以獻



六月己未白麋見武陵臨沅太守劉衍以獻

是月白雀見寶城南豫州刺史尋陽王子房以獻

是月江夏滿圻獲銅漏鼓四面獨足郢州刺史安陸

王子綏以聞

八月乙未毛龜見新安王子鸞第獲以獻

九月癸未白麋見南陽雍州刺史劉秀之以獻

十月丁卯白雀見建康丹陽尹永嘉王子仁以獻

十一月車駕幸南豫州習水軍于梁山有白雀二隻

華蓋有司奏改大明七年爲神爵元年詔不許

十二月辛丑朔甘露降吳興烏程令苟卞之以聞

六年八月甲子白鹿見衡陽郡湘州刺史江夏王世

子伯禽以獻

八月丁卯白雉見南郡江陵荊州刺史臨海王子頊

以獻

前廢帝永光元年正月丙午白雉見渤海青州刺史

王玄謨以獻

三月甲午朔白雉見新蔡豫州刺史劉德願以獻

四月乙亥白雀見會稽東陽州刺史尋陽王子房以

獻

六月丙子白雀見彭城徐州刺史義陽王昶以聞



册府元龜

册府元龜

巡按福建監察御史臣李嗣京 訂正

知長樂縣事 臣夏允彛參閱

知建陽縣事 臣黃國琦較釋

閏位部

祥瑞

宋明帝泰始元年二月丙寅揚州淮水清潔有異于

嘗州治中從事史張緒以閏乙亥白鹿見宣城宣城

太守劉勰以閏己亥白鹿見長沙湘州刺史劉勰以

獻







三月丙午黃紫雲從景陽樓出隨風迴久乃消華林園令臧延之以聞

四月乙未甘露降上林苑苑令徐承道以獻庚申甘露降華林園園令臧延之以獻

五月甲寅緒中獲石栢長三丈二尺廣三尺五寸楊州刺史建安王休仁以獻乙亥甘露降丹陽秣陵縣舍齋前丹陽尹王景文以獻

六月丁巳白鳥見吳郡海鹽太守顧覲之以獻巳卯日入後有黃白赤白氣東西竟天光明潤澤久乃消是月白燕見靈陵獲以獻

七月戊子白雀見虎檻洲都督征討諸軍建安王休仁以聞巳酉嘉禾生會稽永興太守巴陵王休若以聞

八月丙辰朔四眼龜見會稽會稽太守巴陵王休若以獻五城澳池二蓮同幹都水使者羅僧愍以獻戊午嘉禾生南豫州刺史山陽王休佑以獻巳未豫州刺史山陽王休佑獻蓮二株一蒂丙寅六眼龜見東陽長山文如爻卦太守劉總以獻

是月於緒圻城南得紫玉一段圍三尺二寸長一尺太宗攻爲二爵以獻武文二廟



九月庚寅青雀見京城內南徐州刺史桂陽王休範以獻壬寅白鳥見吳興烏城太守都顛以獻

十月己巳幸華林天淵池白魚躍入御舟

三年二月壬寅白鼠見樂安青州刺史沈文秀以獻

五月癸酉白鸞見南東海丹徒南徐州刺史桂陽王

休範以獻乙亥白鵠鶴見京兆雍州刺史巴陵王休

若以獻乙卯白鸞見北海都昌青州刺史沈文秀以

獻

十一月乙卯盱眙獲石柘寧朔將軍段佛榮以獻庚

申甘露降晉陽太守王蘊以聞癸亥甘露降南東海

丹徒建岡南徐州刺史桂陽王休範以聞

十二月壬午甘露降崇寧陵揚州刺史建安王休仁

以聞

四年十一月辛未崇寧陵尚書言自大明八年至今

四年二月宣太后陵明堂前後有光及五色雲又芳

香四滿又五絲雲在松下狀如車蓋

五年正月癸卯白鸞見汝陰樓煩預州刺史劉劭以

獻

五月壬戌豫章南昌獲古銅鼎容斛七斗江州刺史

王景文以獻



六月甲子嘉蓮生湖熟南臺待御史竺魯度以聞  
十月庚辰鄆州獲玄璧廣八寸五分安西將軍蔡興  
宗以獻

六年六月壬子嘉蓮生東宮

七月壬午白雀二見廬陵吉陽內史江孜以聞

九月己巳八眼龜見吳興故鄣太守褚淵以獻

十二月乙未白鹿見梁州刺史杜幼文以聞

十年四月戊申夜京邑崇虛館堂前有黃氣狀如寶  
蓋高十許丈漸有五色道士陸脩靜以聞

六月甲寅義陽郡獲銅鼎受一斛竝隱起錢豫州刺

史段佛榮以獻

秦豫元年四月己酉會稽山陰思義醴泉出太守蔡  
興宗以聞

六年辛丑白雀見廣州刺史孫超以聞

十月壬戌白麀見義興國山太守王蘊以獻義興陽  
羨縣獲毛龜太守王蘊以獻

後廢帝元徽元年正月甲午白麀見海陵海寧太守  
孫嗣之以獻

二年三月甲子白鹿見鬱州青冀二州刺史西海太  
守劉善明以獻



四年三月醴泉出昌國白鹿山其味甚甘

十一月乙巳甘露降吳興烏程太守蕭惠明以聞

五年四月己巳白雀二見尋陽柴桑江州刺史邵陵

王友以獻

順帝昇平二年十一月甘露降南東海武進彭山太

守謝頊以聞又甘露降長城下山太守王奐以聞

十二月甘露降建康禁中里

是年宣城山中生紫芝一株在所獲以獻

三年三月白虎見歷陽龍元縣新昌村新昌嘉名也

瑞應圖王者不暴白虎出白虎仁獸也

是年騶虞見東安縣五界山獅子頭虎身龍脚詩傳

曰騶虞獸白虎黑文不食生物至德則出

高齊太祖建元元年正月拜皇太子日有慶雲在日

邊又新蔡郡固始縣嘉禾一莖五穗

四月有司奏延陵令戴景度稱所領季子廟舊有湧

井二所廟祝列云舊井北忽聞金石聲卽掘深三尺

得沸泉其東忽有聲錚錚又掘得泉沸湧若浪中得

一銀木簡長一尺廣二寸上有隱起文曰廬山道人

張陵再拜謁闕起居簡木堅白而字色黃謹按瑞應

圖浪井不鑿自成者清靜則仙人主之孔氏世錄云



叶精帝道孔書明巧當在張陵宋均註云張陵佐封禪一云陵仙人也

五月白鳥見巴郡又木連理生安城新喻縣又生南梁陳縣郢州丁坡屯獲白雀一頭

閏月璿明殿外閣南槐樹連理

八月新蔡縣獲嘉禾二莖九穗一莖七穗益官縣內村木連理又男子王幼獲白雀一頭

九月甘露降淮南郡桃石榴二株有司又奏甘露降汲縣王安世園樹秣陵縣獲白雀一頭

十月涪陵郡蠻民田健所住崑間嘗留雲氣有聲響徹若龍吟求之積歲莫有見者去四月二十七日崑

鼓里夜忽有雙光至明往獲古鍾一枚又有一器名淳于蛋人以為神物奉祠之

十一月固始縣獲嘉禾一莖九穗

是年臣欽若等曰郢州監利縣天井湖水色忽澄清出綿百姓採以為纈

武帝永明二年正月冠軍將軍周晉孫於石頭北廂將堂見地有異光灼城堞往獲玉璽一鈕方七分文曰明玄君

四月白雀集郢州府館又甘露降南郡桐樹



五月白雀見會稽永興縣

七月新治縣槐栗二木合生異根連理去地數尺中

央小開上復為一又烏程縣陳交則家槿樹連理

九月有司奏上虞孫楓樹連理兩根相去九尺雙株

均聳去地九尺合成一幹故鄞縣楓樹連理兩株相

去七尺丈八圍去地一丈仍相合為樹泯如一木山

陽縣界若耶村有一槻木合為連理淮陰縣建業寺

木連理建康縣梨樹耀榱五圍連理六枝

十一月魏國民齊祥歸入靈丘關聞殷然有聲仰視

之見山側有紫氣如雲衆鳥回翔其間祥往氣所獲

璽方寸四分獸鈕文曰坤維聖帝永昌送與魏太后

師道人慧度欲獻魏主慧度觀其文窺謂當今衣冠

正朔在于齊國遂附道人慧臧送京師因羽林監崔

士亮獻之

是年江陵縣獲白鼠一頭又休安陵獲白龜一頭又

彭澤縣獲白雉一頭又順陽丹光縣山下得古鼎一

枝又護軍府門外桑樹一株竝有蠶絲綿被枝莖漢

光武時有野蠶成繭百姓得以衣服今則浮波幕樹

其亦此之類乎又越州南高涼任人海中網魚獲銅

獸一頭銘曰作寶鼎齊臣萬年子孫承寶又彭澤縣



獲白雉一頭

三年正月安城縣榆樹二株連理

四月白雀見臨汝縣

七月安城王嵩第獲白雀一頭又始興郡民龔玄宣  
去年二月忽有一道人乞中食因捽懷中出篆書真  
經一卷六紙又表代極一紙又移付羅漢居士一紙  
云從堯率天宮下使上送天子因失道人所在玄宣  
又稱神人授皇帝壘龜形長五寸廣二寸厚二寸五  
分上有天子字中央蕭字下有萬世字

八月梁郡睢陽界野田中獲嘉禾一莖二十三穗

九月南郡江陵縣獲白雀一頭又句陽縣之穀山樅  
樹連理異根雙挺共抄爲一

十一月永寧左郡櫛木連理是年華林園醴泉堂東  
忽有瑞雲周圍十許丈高下與景雲樓平五色藻密  
光彩映山徘徊良久轉南行過長船入華池大鳥集  
東陽郡太守沈約表云鳥身備五彩赤色居多案樂  
偉叶圖徵云焦明鳥質赤至則德之感也

四年二月甘露降臨湘縣李樹

三月甘露降南郡桐樹三足鳥巢南安中陶縣庭中  
又株陵縣喬天明園中李樹連理生高三尺五寸兩



枝別生復高三尺合爲一幹又白虎見安蠻度化縣  
四月甘露降睢陽縣桃樹

是年丹陽縣獲白兔一頭東昌縣山自此歲以來嘗  
發異響去二月十五日有一巖禡落縣民方元泰往  
視於巖下得古鐘一枚青龍見順陽郡清水縣平泉  
湖

五年正月秣陵縣華僧秀園中四樹連理

三月豫寧縣長崗山獲銅鍾一枚

四月甘露降荊州府中閣外桐樹

六年建城縣昌城田獲四目龜一頭腹下有萬齊字

八月延寧縣王惠獲六日龜一頭腹下有萬歡字并  
有卦兆

九月莒縣獲嘉禾一株

是年山陰縣孔廣家園種樹十二層會稽太守隋王  
子隆獻之種芳林苑鳳光殿西成騎嘗侍唐潛上青  
毛神龜一頭望蔡縣獲白鹿一頭南豫州刺史建安  
王子真表獻金色魚一頭又望蔡縣獲白鹿一頭

六年四月江寧縣北界賴鄉齊平里三城邏門外路  
東太嘗蕭惠基園援樹二株連理其高相去二尺南  
大北小小者傾柯南附合爲一枝葉繁茂圓密如蓋



是年白鼠見芳林園蒲濤縣亮野村獲白麀一頭其  
露降芳林園故山堂桐樹

七年六月鹽官縣獲白雀一頭

是年黃龍見曲江縣黃池中一宿二日越州獻白珠  
自然作思惟佛像長三寸上越禪林寺置刹下江寧  
縣李樹二株連理兩根相去一丈五尺鬱林獲白雉  
一頭荊州獲白麀一頭又吳郡太守江敷於錢塘縣  
獲蒼玉璧一枚以獻又齊興太守劉元寶治郡城於  
塹中獲錢數百萬形極大以獻臺爲瑞世祖班賜朝  
臣以下各有差又主書朱靈讓於浙江得靈石十人

舉乃起在水深三尺而浮世祖親投于天淵池試之

刻爲佛像鬱林獲白雉一頭荊州獲白麀一頭

八年三月武陵白沙戍槻木連理相去五尺俱高三  
尺東西二枝合而通柯

四月陽羨縣獲白鳥一頭

五月陽城縣獲紫芝一株

十二月紫桑縣陶委天家樹連理

是年餘干縣獲白麀一頭天門臨澧縣獲白雀一頭  
巴陵郡連理四株又天忽黃色照地衆莫能解司徒  
法曹王融上金天頌已是非金天所謂榮光武帝大



悅始興郡昌樂村獲白鳩一頭又餘干縣獲白鹿一頭

九年五月長山縣獲神龜一頭腹有異兌卦

七月吳郡錢塘縣獲白雀一頭

八月豫州獲白雀一頭甘露降上定林寺堂庭中天如雨遍地如雪其氣芳其味甘耀日儼風至晡乃止爾後頻降鍾山松樹四十餘日乃止

十月甘露降大安陵樹

十一月寧蜀廣漢縣田所墾地八尺四寸獲古鍾一枚形高三尺八寸圍四尺七寸懸柄長一尺二寸合

高五尺四面各九孔夜中於陶所瓦間見有白光窺尋無物自後夜夜輒復有光既經旬日村民張慶宣瓦作屋又於屋間見光炤內外慶宣疑之以告休光乃共發視獲玉璽一鈕璧方八寸上有鼻文曰帝真又曲阿縣民黃慶宅左有園園東南廣袤四丈每種菜輒鮮異雖加採掇隨復更生夜中長有白光皎質屬天狀似懸綉慶疑非嘗請師卜侯道士傅德占使掘之深三尺獲玉印一鈕文曰長承萬福

是年臨湘縣獲白鹿一頭義陽安昌縣獲白鹿一頭秣陵縣闕場里安明寺有古樹衆僧改架屋宇伐以



為薪剖樹木裏自然有法大德三字始興郡本無  
樹調味有闕世祖在郡堂屋後忽生一株臨湘縣獲  
白鹿一頭義陽安昌縣獲白麋一頭

十年五月齊郡獲白雀一頭

六月海陵齊昌縣獲嘉禾一莖六穗

是年青州獲白雉一頭司州清激戍獲白麋一頭

陵民齊伯生於六合山獲金璽一鈕文曰年予主青

州汜液戍獲白雉一頭司州清激戍獲白雉一頭

十一年九月睢陽縣里中獲嘉禾一株

是年廣陵海陵縣獲白麋一頭

鬱林王隆昌元年正月襄陽縣獲紫芝一莖四月陽

羨縣獲白鳥一頭

和帝中興二年正月邏將潘道蓋于山石穴中獲毛

龜一頭

二月白虎見東平壽張安樂村

三月甘露降茅山彌漫數里

是年山上雲障四塞頃有玄黃五色如龍形長十餘

丈從西北昇天

梁高祖天監元年七月癸卯鸞鳥見樂遊苑

四年四月自甲寅至壬戌甘露連降華林園



五月建康縣朔陰里生嘉禾一莖十二穗  
八月庚子老人星見

五年四月丙申廬陵高昌之仁山獲銅劍二始豐縣  
獲八目龜一

八月戊戌老人星見

六年二月甲辰老人星見

六月新吳縣獲四目龜一

九月嘉禾一莖九穗生江陵縣

七年四月辛未秣陵縣獲靈龜一

八月甲戌老人星見

十一月辛巳鄆縣言甘露降

八年二月壬戌老人星見

八月戊午老人星見

九年七月己巳老人星見

十年二月戊申騶虞一見荊州華容縣五月癸酉安  
豐縣獲一角玄龜乙酉嘉蓮一莖三花生樂遊苑

十二月癸酉山車見于臨成縣

十一年二月新昌濟陽二郡野蠶成繭

十三年二月丁亥老人星見

十四年二月戊戌老人星見



八月乙未老人星見

十五年八月老人星見

十六年二月庚戌老人星見

四月湖溝獲白雀

八月辛丑老人星見

十七年二月甲申老人星見

八月壬寅老人星見

十八年二月戊午老人星見

七月甲申老人星見

普通元年二月壬子老人星見

八月庚戌老人星見

二年七月甲寅老人星見

三年八月甲子老人星見

四年二月庚午老人星見

八月丁卯老人星見

五年二月丁丑老人星見

六年二月丁丑老人星見

八月壬午老人星見

七年二月丁亥老人星見

大通元年八月壬辰老人星見



二年二月甲子老人星見

中大通二年正月癸未老人星見

三年二月甲寅老人星見

八月癸巳老人星見

是歲吳興縣生野穀堪食

四年二月壬寅老人星見丙辰邵陵縣獲白鹿一

五年正月辛卯輿駕親祀南郊先是一日景夜南郊

令解滌之等到郊所履行忽聞空中有異香三隨風

至及將行事奏樂迎神畢有神光圓滿壇上朱紫白

黃雜色食頃方滅兼大宰武陵王紀等聞

二月巳丑老人星見

八月庚申老人星見

大同元年三月巳卯老人星見

七月乙卯老人星見

二年二月丙戌老人星見

三年二月乙酉老人星見

八月甲申老人星見

六年二月奉郡獻白麋一

六月丁未平陽縣獻白鹿一

九月始平太守崔頌表獻嘉禾一莖十二穗



敬帝紹泰元年冬至二年三月甘露頻降于鍾山梅  
崗南澗及京口江寧縣境或至三數升大如奕棋子  
陳高祖表以獻臺

二年二月前寧遠石城公外兵參軍王位于石頭沙  
際獲玉璽四陳高祖表以送臺

陳高祖永定元年十一月甘露降于鍾山松林彌漫  
岩谷庠子開善寺沙門採之以獻勅頒賜群臣

三年四月重雲殿東鴟尾有紫煙屬天

文帝天嘉元年正月辛未輿駕親祠北郊日有冠

廢帝光大二年五月丙辰大傳安成王獻玉璽一

宣帝太建二年閏四月乙卯儀同黃法獻氈瑞璧一

四年八月丁丑景雲見

十二月壬寅甘露降樂遊苑

五年五月癸丑景雲見

七年四月壬子郢州獻瑞鐘六

閏九月壬辰甘露頻降樂遊苑

十二月甲子南康郡獻瑞鐘一

八年正月庚辰西南有紫雲見

東魏孝靜天平二年二月員外散騎掌侍穆禮得玉  
板一廣三寸長五寸頭有兩孔以獻



四月臨水縣木連理

五月北豫州獻白雀

七月齊獻武王獲白鳥以獻魏郡木連理

八月光州獻白兔

三年正月青州獻白雉

五月司州上言清河郡木連理

七月魏郡獻嘉禾京師獲白雀

四年二月青州獻白雉

四月西兗州獻白狐

六月廣平郡上言木連理

七月兗州獻白雀光州獻白兔又獻九尾狐

八月并州上言木連理又獻嘉禾京師又獲嘉禾虞

曹郎中司馬仲璆又獻嘉禾一莖五穗

十二月梁州獻白雉

元象元年正月有巨象自至碭郡波中南兗州獲送

于鄴大赦改元

二月雒州上言木連理

四月光州獻九尾狐

五月冀州獲白鳥林慮縣上言木連理京師白雀徐

州獲白兔



六月京師獲白雀齊獻武王獲白兔以獻

濮陽郡獲白兔齊獻武王獲白鹿以獻

七月肆州獻白雀是月齊獻武王獲白雀以獻

八月東雍州獻嘉禾上黨郡言木連理西中府獻白

燕

興和元年正月魏郡繁陽縣獻白雉

二月光州獻九尾狐

三月甘露降于京師

四月京師獲三足鳥

五月京師獲白雀

六月齊文襄王獲白雀以獻南兗州獲白雀

七月京師獲白雀

八月徐州表濟陰郡廳事前槐樹鳥巢于上鳥母死

有鵲啣食哺鳥兒不失其時並皆長大賞太守帛十

疋

九月有司奏西山採材司馬張神和上言司空谷木

連理

二年四月光州上言盧鄉縣木連理京師獲白雀徐

州獻白兔

閏月京師獻白雀



五月京師獲白雀又獲白燕

六月京師獲白兔光州獻白雀

七月京師獲白雀

三年二月東郡白馬縣民獻玉印一

五月司州獻九尾狐京師獲白雀

八月南青州獻嘉禾

十二月魏郡獻白狐

四年正月京獲白雀光州獲白兔

四月魏郡貴鄉縣獲白鳥鵝瀛州獻白狐二

五月京師獲白鳥陽夏郡獻白鳥濟州獻蒼烏

六月京師獲白雀

七月瀛州獻蒼烏鄴縣民獻白玉一璞北豫州獻白

鳥京師獲白雀

十月瀛州獻白雀

武定元年正月廣宗郡獻白雉兖州獻白雉

二月瀛州獻白兔青州獻白雉

四月兖州獻蒼烏

五月梁州獲白雀濟州獻蒼烏

六月兖州獻白鹿京師獲白雀東郡民獻白鳥

七月京師獲白雀幽州獲白狐以獻



八月西襄州上言濟郡木連理

九月齊獻武王上言并州木連理汲郡獻白兔

十月兖州獻白雀

二年五月京師獲蒼烏

七月林慮縣獻白鵲

八月京師獲嘉禾

三年五月瀛州獻三足烏北豫州獻白烏廣宗郡獻

白烏潁州獻白烏梁州獻白雀

六月京師獲蒼烏滄州獻白烏京師又獲白雀北豫

州獻白燕

七月瀛州獻白狐二牝一牝光州獻蒼烏京師獲白

雀

八月并州獻嘉禾

九月西兖州獻白狐瀛州上言河間郡木連理

十月有司奏南兖州陳留郡民賈興達於家庭得毛

龜一兖州獻白雀

四年三月青州獻白雉

四月獻白烏潁州獻三足烏

五月濟州獻白烏潁州又獻三足烏

六月京師獲白雀



祥瑞

八月夏陽郡獻白鳥

五年十月甘露降齊文襄王第門柳樹

十一月汾州上言木連理

六年三月甘露降於京師

四月大山郡上言甘露降

五月晉州上言木連理

六月京師獲白雀

十一月武平鎮獻白兔

七年七月瀛州獻白驢

八年四月青州上言齊郡木連理

北齊文宣帝以東魏武定八年五月受禪是日京師

獲赤雀獻於南郊又光州獻九尾狐

武成帝河清元年四月青州刺史上言今月庚寅河

濟清改大寧二年為河清

梁太祖開平元年正月壬寅帝至自長蘆是日有五

色雲覆于府署之上又丙辰慶雲見丁巳宋州刺史

王臯進赤鳥一

四月乙丑潁州刺史張實進白兔一戊辰宋州刺史

王臯進兩岐麥陳州袁象先進白兔一付史館編錄

兼示百官

冊府元龜 閏位部

卷之二

二十一



五月丙戌荊州高季昌進瑞橘七十顆是月宿州刺史王儒進白兔一濮州刺史圖嘉禾瑞麥以進

八月甲子平明前老人星見于南極壬申密州進嘉禾又有合歡榆樹竝畱形以獻是月隰州奏大寧縣至固鎮上下二百里

今月八日黃河清至十月如故

十一月廣南管内獲白鹿竝圖形來獻耳有兩缺按符瑞圖鹿壽千歲變白耳一缺今驗此鹿耳有二缺其獸與色皆應金行實表嘉瑞

二年四月隰陵居人程震以兩岐麥穗并畫圖來進八月甲寅太史奏壽星見于南方甲子廣州上言白龍見圖形以進

三年八月司天臺奏今月二十七日平明前東南丙上去山高三尺以來老人星見測在弁宿十一度其色光明濶大

十一月司天臺奏冬至日自夜半後祥風微扇帝座澄明至曉黃雲捧日

四年四月丁卯宋州節度使衡王友諒進瑞麥三穗

八月辛未老人星見



冊府元龜 祥瑞

卷之三百二

乾化元年八月癸亥老人星見

冊府元龜

冊府元龜

巡按福建監察御史臣李嗣京 訂正

知閩縣事 臣曹鼎臣叅閱

知建陽縣事 臣黃國琦較釋

閏位部

徵應

自古帝王世之季豪傑竝起雖雄視一方而靈徵不絕者蓋天意諄諄贊明群衆之所嚮也若夫肇自載育玄感特異寤茲吉夢神貺彌昭或應識自許軌迹有開或物色紛紜符節斯合豈獨觀奇表命于元龜

冊府元龜 閏位部

卷之二百三



而後知其享國保民也

蜀先主涿郡縣人也少孤與母販履織席爲業舍東南角籬上有桑樹生高五丈餘遙望見重重如小車蓋往來者皆怪此樹非凡或謂當出貴人先主少時與宗中諸小兒於樹下戲言吾必當乘此羽葆蓋車叔父子敬謂曰汝勿妄語滅吾門也又漢靈帝時董扶爲侍中私謂大嘗劉焉曰京師將亂益州分野有天子氣焉信之遂求出爲益州牧扶亦求爲蜀郡蜀國都尉其後先主稱天子於蜀皆如扶言

吳大帝權母吳夫人初孕而夢月入其懷旣而生策及權在孕又夢日入其懷以告其夫堅曰昔妊策夢月入懷今也又夢日入我懷何也堅曰日月者陰陽之精極貴之象吾子孫其興乎初堅世仕吳家于富春葬於城東冢上數有光怪雲氣五色上屬于天曼延數里衆皆往觀視父老相謂曰是非凡氣孫氏其興矣及母懷妊堅夢腸出繞盈昌門寤而懼之以告鄰母鄰母曰安知非吉徵也

廢帝亮母潘夫人旣得幸有娠夢有龍頭授已者已以蔽膝受之遂生亮

景帝休初封琅琊王居會稽夢乘龍上天顧不見尾



覺而異之及亮廢帝休立七年薨孫皓悉誅其子

宋高祖生夕其露降于墓樹微時伐荻新洲見大蛇

長數丈射之傷明日復至洲裏聞有杵臼之聲往覘

之見童子數人皆青衣於榛中擣藥問其故荅曰我

王為劉寄奴所射合散傳之臣欽若等曰寄奴帝之字帝曰王神

何不殺之荅曰寄奴王者不死不可殺帝叱之皆散

乃收藥而反又遇一沙門于逆旅沙門言中原事故

因云江表尋當喪亂高祖曰當有拯之者不沙門曰

能拯之者其唯君乎其意甚至初帝先患手創積年

未療沙門曰此瘡難治先有良藥當以相與因出懷

中黃散治瘡一傳而愈餘散寶錄之被金瘡輒用有

驗又嘗遊京口竹林寺獨卧講堂前上有五色龍章

眾僧見之驚以白帝帝獨喜曰上人無妄言帝皇考

墓在丹徒之候山其地秦史所謂曲阿丹徒間有天

子氣者也時有孔恭者妙善占墓帝嘗與經墓問之

曰此墓如何孔恭曰非嘗地也帝繇是益自負行止

時見二小龍附翼樵漁山澤同侶或亦覩焉及貴龍

形更大帝東征孫恩至會稽過孔季恭宅季恭正晝

卧有神人衣服非嘗謂曰起天子在門既而失之遽出

適見武帝延入結交執手曰卿後當大顯貴願以身



冊元 徵應 卷之二 十三  
爲託於是曲意禮接甚厚及將受晉禪大史令駱達  
陳天文符瑞數十條

文帝初爲荊州刺史廢帝景平中有龍見西方半天  
騰上廕五綵雲京都遠近聚觀大史奏曰西方有天  
子氣帝入奉大統帝及議者皆疑不敢下鎮西長史  
王曇首與到彥之從兄華固勸帝猶未許曇首又固  
陳弁言天人符應帝乃下率府州文武嚴兵自衛臺  
所遣百官衆力不得近部伍中兵參軍朱容子抱刃  
在平乘戶外不解帶者累旬旣下在道有黃龍出負  
上所乘舟左右皆失色帝謂曇首曰此乃夏禹所以  
受天命我何堪之

孝武帝初封武陵王爲北中郎將以顏峻爲府主簿  
沙門德合粗有學義謂顏峻曰貧道粗見識記當有  
真人應符名稱次第屬在殿下峻在彭城嘗向親人  
叙之以言遂宣布聞於太祖時元凶巫蠱事已發故  
帝不加推治

南齊太祖生二歲乳人乏乳皇妣孝皇后夢人以兩  
甌麻粥與之覺而乳大出異而說之帝舊宅在武進  
縣宅南有一桑樹高三丈橫生四枝狀似華蓋帝年  
數歲好戲其下從兄敬宗曰此樹爲汝生也帝年十



七夢乘青龍西行逐日日將薄山乃止覺而恐懼家人問占者云至貴之象也蘇侃云青者木色日暮者宋氏末運也宋泰始二年明帝遣前淮南太守孫奉伯往淮陰監元會奉伯舊與帝款是行也帝與奉伯同室卧奉伯夢帝乘龍上天於下捉龍脚不得及覺叙夢因謂曰兖州當大庇生靈而弟不得與也奉伯竟卒於宋世帝在日陰治城得一錫跌大數尺下有篆文莫能識者紀僧真曰何須辨此文字此自久遠之物九錫之徵也帝曰卿勿妄言又宋世芮國相希利賈解星筭數術通胡漢語嘗言南方有姓名齊者其人當興又宋朝初議封帝爲梁公輔國主簿崔祖忠啓帝曰讖書云金刀利刃齊刈之今宜稱齊實應天命從之帝居武進彭山岡阜相屬數百里不絕其上嘗有五色雲又有龍出焉帝時已貴矣明帝甚惡之遣善占墓者高靈文往墓所占相靈文先結事太祖還詭荅曰不過出方伯耳密白太祖曰貴不可言明帝意猶不已遣人踐籍以左道厭之後於所樹華表柱忽龍鳴震響山谷及明帝寢疾爲身後之慮多翦功臣帝亦見疑每云蕭道成有不臣相帝鎮淮陰每懷憂懼忽見神人謂帝曰無所憂子孫當昌盛元



徽四年太祖從南郊望相氣者陳安寶見太祖身上黃紫氣屬天安寶謂親人王洪軌曰我少來未嘗見君上有如此氣也又叅軍崔靈建夢天謂已蕭道成是我第十九子我去年已使授其天子位考自三皇五帝已降受命之次至帝爲十九也又所居武進縣有一道相傳云天子路或謂秦皇所游或云孫氏舊迹時訛言東城天子出其後建安王休仁鎮東府明帝懼殺休仁而嘗閉東府不居明帝又屢幸以厭王氣又使子安成王居之及蒼梧王敗安成王代立時咸言爲驗術數者推之帝舊居武進東城村東城之

言其在此也昇明二年冬延陵縣季子廟沸井之北忽聞金石聲疑其異鑿深三尺沸井奔湧若浪其地又響卽復鑿之復得一井湧沸亦然井中得一木簡長一尺廣二分上有隱起字曰廬山道士張陵再拜詣闕起居簡大堅白字色乃黃會稽剡縣有山名刻石父老相傳云山雖名刻石而不知名字所在昇明末縣人倪襲祖行獵忽見石上有文字凡三處苔生其上字不可識乃去苔視之其大石文曰此齊者黃公之化氣也立石文曰黃天星姓蕭字道成得賢師天下太平小石文曰刻石者紹會稽南山李斯刻秦



望之峯也河維讖曰歷年七十水滅緒風雲俱起龍  
鱗舉又曰蕭草成道德盡備宋水德也義熙元年宋  
武帝王業之始至齊授命七十年又讖曰蕭爲一士  
天下樂一士王字也郭文舉金雄記曰當後有作蕭  
入草也王子年歌曰金刀治世後遂苦帝王昏亂天  
神怒災異屢見戒人主三分二叛失州土三王九江  
一在吳餘悉邪小早少孤一國二主天所驅金刀劉  
也三分二叛宋明帝世也三王九江孝武於九江興  
晉安王子勛雖不終亦稱大號後世祖又於九江基  
霸迹此三王也一在吳謂齊氏桑梓亦寄治南吳也

一國二主謂大祖符運潛興爲宋氏驅除寇難歌又  
曰三木慘慘林茂孳金刀利刃齊割之金刀劉也割  
剪也欲知其姓草蕭蕭穀中最細低頭熟鱗身甲體  
永興福穀中精細者稻也卽道也熟猶成也孔子河  
雒讖曰竭河梁塞龍泉消除水災泄山川水卽宋也  
宋氏爲災害故曰水災梁亦水也竭河梁則行路成  
矣路猶道也消除水災除宋氏之災害也河圖讖又  
曰上參南斗第一星下立草屋爲紫庭龍神之岡梧  
桐生鳳鳥戢翼朔旦鳴南斗吳分野也草屋者居上  
蕭字象也天子何在草中宿宿肅也又蕭管之器像



鳳鳥翼也又曰先是益州有山古老相傳曰齊后山  
昇明三年四月二十三日有沙門玄暢者於此山立  
精舍其曰上登尊位其月二十四日榮陽郡人尹千  
於嵩山東南隅見兩石墜地石門有玉璽在其中璽  
方三寸文曰戊丁之與道俱肅然入草應天符掃平  
河雒清魏郡又曰皇帝運興千奉璽詣雍州刺史蕭  
赤斧以獻又宋武帝於嵩高山得玉璧三十二枚神  
人云此是宋卜世之數三十二者二世也宋自受命  
至禪齊凡六十年然則帝之符應也  
武帝小字龍兒以宋元嘉十七年六月己未夜生於

建康青溪宅其夜陳孝后劉昭后同夢龍據屋上故  
字帝焉又其夕無火婢吹灰而火燃年十三夢人以  
筆畫身左右爲兩翅又着孔雀羽衣裳空中飛舉體  
生毛髮長至足有人指上所踐地曰周文王之田又  
于所住堂內得璽一枚文曰皇帝行璽又得異錢文  
爲北斗星雙刀雙貝及有人形帶劔焉仕宋爲贛令  
江州刺史晉安王子勛反帝不從命南康相沈蕭之  
繫帝郡獄族人蕭欣祖門客桓康寺破郡迎出帝帝  
遂率部曲百餘人起義避難揭陽山有白雀來集圍  
山中有清聲傳漏響又於山累石爲佛圖其側忽生



一樹狀若華蓋清翠扶疎有殊群木帝將討戴凱之  
 大饗士卒是日大熱帝各令折荆枝自蔽言未終而  
 有雲垂蔭正當會所會罷乃散及為廣興相嶺南積  
 旱連水阻涸商旅不通帝部伍既至無雨而川流暴  
 起遂得利涉後為左衛將軍於益城禦沈攸之益城  
 握塹得一大錢文曰太平百歲于時城內乏水欲引  
 水入城始鑿城內遇伏泉涌出如此者九處用之不  
 竭

和帝即位於江陵建武中荊州大風雨龍入栢齋中  
 挂壁上有爪足處刺史蕭遙欣恐畏不敢居之至是

以為嘉福殿梁高祖母張皇后嘗於室內忽見庭前  
 菖蒲生華光采昭灼非世中所有后驚視謂侍者曰  
 汝見不對曰不見后曰嘗聞見者富貴因遽取吞之  
 又嘗夢抱日已而有娠遂產帝將產之夜后見庭內  
 若有衣冠陪列焉生而穎異兩膀駢骨頂上隆起有  
 文在右手曰武帝所居室嘗若雲氣人或過者體輒  
 肅然嘗行經牛渚逢風入泊龍瀆有一老人謂帝曰  
 君龍行虎步相不可言天下方亂安之者其在君乎

問其名氏忽然不見

陰智伯與帝隣居少相友善嘗入帝卧內見有異色成五色因

握帝手曰公後必大貴非人臣也天下方亂安蒼生者在君乎帝曰幸勿多言於是情好轉密帝每有求



索如外 帝在襄陽住齊常有五色迴轉狀若礎龍其  
府焉 上紫雲騰起形如繖蓋初齊高帝夢履而登殿顧見  
武明二帝後一人手張地天圖而不識問之荅曰順  
子後及崔惠景之逼長沙宣武王入援至越城夢乘  
馬飛半天而墜帝所馭化爲赤龍騰虛獨上時臺內  
有宿衛士爲現嘗見大極殿有六龍各守一柱末忽  
失其二後在宣武王宅時宣武爲益州現乃往蜀伏  
事及宣武在郢此現還都乃見六龍俱在帝所寢齊  
遂去郢之雍中途遇病且死謂同侶曰蕭雍州必作  
天子具以前事語之推此而言蓋天命也齊中興二  
年正月始爲梁公南兗州隊主陳文興于恒城內鑿  
井得玉鏤麒麟金鏤玉璧水精環各二枚又建康令  
羊瞻解稱鳳凰見縣之桐下里齊宣德皇后稱羨符  
瑞歸於相國府又延陵縣華陽邏主戴車牒稱去年  
十二月乙酉甘露降茅山彌漫數里正月巳酉邏將  
潘道蓋于山石穴中得毛龜一二月辛酉邏將徐靈  
符又于山東見白黿一丙寅平旦山上有雲霧四合  
須臾有玄黃五色狀如龍形長十餘丈乍隱乍顯又  
乃從西北升天丁卯兗州刺史馬元和籤所領東平  
郡壽張縣見騶虞



元帝高祖第七子初高祖夢眇目僧執香爐稱托王宮既而帝母在采女次侍始褰戶幔有風迴裾高祖意感幸之采女夢月墮懷中遂孕天監七年八月丁巳生帝舉室中非嘗香有紫胞之異高祖竒之因賜采女姓阮進爲脩容帝在尋陽夢人曰天下將亂王必維之又背生黑子巫媼見曰此大貴不可言時賀革爲帝府諮議使講三禮革西上意甚不悅過別御史中丞江革江革告之曰吾嘗夢王上遍見諸子至湘東王脫帽授之此人後必當壁卿其行乎革領之大寶元年帝在江陵正月辛亥朔左衛將軍王僧辨

獲橘三十子共蒂以獻二月甲戌衡陽內史周孔直表言鳳凰見郡界二年十月辛丑朔有紫雲如車蓋臨江陵城三年遂卽帝位

陳高祖漢大丘長寔之後世居潁川寔六世孫達出爲長城令悅其出水遂家焉嘗謂所親曰此地山川秀麗當有王者興二百年後我子孫必鍾斯運嘗遊義興館於許氏夜夢天開數丈有四人朱衣捧日而至今帝開口納焉及覺腹中猶熱帝心獨負之梁大寶初候景寇京師帝起義發兵自南康南康瀨石舊有二十四灘灘多巨石行旅者以爲難帝之發也水



暴起數丈二百里間巨石皆沒進軍頓西昌有龍見於水濱高五丈許文采鮮耀軍民觀者數萬人既次蔡州侯景登石頭城觀望形勢意甚不悅謂左右曰此軍上有紫氣不易可當嘗夢梁武帝以寶刀授已又嘗獨坐胡床於閣下忽有神光滿閣廊廡之間竝得相見趙知禮侍側怪而問帝帝笑不答

梁敬帝紹泰二年二月寧遠石城公外兵叅軍王位於石頭沙際獲玉璽四七月大府卿何散新州刺史華志各上玉璽一高祖表以送臺紹歸之高祖太平元年九月中散大夫王彭戩稱今月五日平旦於御路見龍迹自太社至象闕亘三四里帝既卽位于南郊柴燎告天先是氛霧晝夜晦冥至於是日景氣清晏識者知有天道焉

文帝微時嘗詣劉仲舉時天陰雨仲舉獨坐齋內聞城外蕭鼓之聲俄而帝至仲舉異之乃深結託帝又嘗因飲夜宿仲舉帳中忽有神光五彩熠於室內繇是祇承益恭梁大清初夢兩日闔一大一小大者光滅陸地色正黃其大如斗帝因而懷之

宣帝梁大通二年七月辛酉生有赤光滿堂堂事梁元帝爲中書侍郎時有馬軍主李聰與帝有舊每同



遊處帝嘗夜被酒張燈而寐聰適出尋友乃見帝身  
是大龍

北齊神武帝皇考尉性通率不事家業居住白道南  
數有赤光紫氣之異鄰人以爲怪帝欲徙居以避之  
皇考曰安知非吉居之自若後神武自隊主轉輸爲  
亟使嘗乘驛過建興雲霧晝晦雷聲隨之半日乃絕  
若有神應者每行道路往來無風塵之色又嘗夢履  
衆星而行覺而內喜又與懷朔省事雲中司馬子如  
及秀容人劉貴中山人賈顯智爲奔走之友懷朔戶  
曹史孫騰外兵史侯景亦相友結劉貴嘗得一白鷹

與神武及尉景蔡雋司馬子如賈顯智等獵於沃野  
見一赤兔每搏輒逸遂至迴澤澤中有茅屋將奔入  
有狗自屋中出噬之鷹兔俱死神武怒以鳴鏑射之  
狗斃屋中有二人出持神武襟其母兩目盲曳杖謂  
其二子曰何故觸大家出甕中酒烹羊以飯客因言  
暗相諸人皆曰貴而指揮俱繇神武又曰子如歷位  
顯智不善終飯竟出行數里還更訪之則本無人居  
乃向非人也繇是諸人益加敬異後抵揚州邑人龐  
蒼鷹止團焦中每從外歸主人遙聞行響動地蒼鷹  
毋數見團焦赤氣赫然屬天又蒼鷹嘗夜欲入有青



衣人拔刀叱曰何觸王言訖不見始以爲異密覘之  
唯見赤蛇蟠床上乃益驚異因殺牛分肉厚以相奉  
蒼鷹毋求以神武爲義子及得志以其宅爲第號爲  
南宅雖門巷開廣堂宇崇麗其本所任團焦以石堊  
塗之留而不毀至文宣時遂爲宮初魏真君中內學  
者奏言上黨有天子氣云在壺關大王山太武於是  
南巡以厭當之累石爲三封斬其北鳳凰山以毀其  
形後上黨人居晉陽者號上黨坊神武實居之晉泰  
初歲星熒惑鎮星太白聚於觜參色甚明太史占云  
當有王者興是時神武起於信都破爾朱兆等天平  
元年二月永寧寺九層浮圖災旣而人有從東萊至  
云及海上人咸見之於海中俄而霧起乃滅說者以  
爲天意苦永寧見災魏不寧矣飛入東海渤海應矣  
三年六月壬申神武如天池獲瑞石隱起成文曰六  
王三川于時楊休之爲行臺郎中帝獨在帳中間之  
此文字何義對曰六者是大王之字王者當有天下  
此乃大王符瑞命之徵旣於天池中得此石可謂天  
意王命也吉不可言帝又問三川何義休之曰河雒  
伊爲三川亦謂涇渭雒爲三川河雒伊雒陽也涇渭  
雒若雍州也大王今受天命終應統有闕右帝曰世



人無事嘗道我欲反今聞此更致紛紜慎莫妄言也  
初帝從父弟岳家于雒邑帝每奉使入雒岳母山氏  
當夜起見帝室中有光密往覘之乃無燈卽移帝於  
別室如前所見怪其神異詣卜筮之遇乾之大有占  
之曰吉稱飛龍在天大人造也飛龍九五大人之卦  
貴不可言山氏歸報帝後帝起兵於信都山氏聞之  
喜謂岳曰赤光之瑞今當驗矣汝可間行從之共圖  
大計岳遂往信都帝見之大悅

文襄帝高祖長子母婁太后初夢一斷龍遂孕帝  
文宣帝文襄母弟太后夢大龍首尾屬天地張口動  
目勢狀驚人因孕帝每夜有赤光炤室后私嘗怪之  
初神武之歸爾朱榮時經危亂家徒壁立后與親姻  
相對共憂寒餒帝時尚未能言歘然應曰得活太后  
及左右大驚而不敢言及長鱗身重蹠不好戲弄深  
沈有大度晉陽曾有沙門乍愚乍智時人不測呼爲  
阿秃師帝曾與諸童共見之歷問祿位至帝舉手再  
三指天而已口無所言見者異之

神武帝從諸子過鳳陽門有龍在上唯神武與帝見  
之後從文襄行過遼陽山獨見天門開餘人無見者  
東魏武定七年赴晉陽摠庶政八年進封齊王自居



晉陽寢室夜有光如晝既爲王夢人以筆點已額旦以告館客王曇哲曰吾其退乎曇哲再拜賀曰王上加點便成王字乃當進也乾明二年二月文襄終時訛言上黨出聖人帝聞之將徙一郡郡人張思進上言殿下生於南宮坊名上黨出聖人帝悅而止先是童謠曰一束藁兩頭然河邊殺獍飛上天蒿然兩頭於文爲高河邊殺獍爲水邊羊指帝名也於是徐之才盛陳宜受禪且讖云羊飲盟津角駐天盟津水也羊飲水王名也角駐天大位也又陽平郡界廻呈驛傍有大水土人常見群羊數百立卧其中就視不見事與讖合願王勿疑帝以問高德正德正又贊成之於是始決乃使李密卜之遇大橫曰大吉漢文帝之卦也帝乃鑄像以卜之一寫而成及將受禪是年四月夜禾生魏帝銅研旦長數寸有穗

孝昭帝文宣母弟太后夢蠕龍于地遂孕帝

武成帝孝昭母弟太后夢龍浴於海遂孕帝

後主武成帝長子母曰胡皇后夢於海上坐王盆日人褰下遂有娠天保七年五月五日生帝於并州鄜

梁太祖以唐大中六年歲在壬申十月二十一日夜生於碭山縣十溝里是夕所居廬舍之上有赤氣上



騰里人望之皆驚奔而來曰朱家火發矣及至則虛舍儼然旣而隣人以誕豫告衆咸異之帝仲昆三人俱未冠而孤母王氏携養寄於蕭縣人劉崇之家帝旣壯不事生業以雄勇自負里人多厭之崇以其備情每加譴杖唯崇母自幼憐之親爲櫛髮嘗戒家人曰朱三非嘗人也汝輩當善待之家人問其故荅曰我嘗見其熟寐之次爲一赤蛇然衆亦未之信也唐乾符中木星入南斗數夕不退諸道都統晉國公王鐸觀之問諸知星者吉凶安在咸曰金火土犯斗卽爲災唯木當應爲福耳或亦然之時有術士邊岡者

洞曉天文博通陰陽曆數之妙窮天下之奇秘有先見之明雖京房管輅不能過也鐸召而質之岡曰惟木爲福神當以帝王占之然則非福於今必當有驗於後未敢言之請他日證其所驗一日又密召岡因堅請語其詳至于三四岡辭不獲鐸乃屏去左右岡曰木星入斗帝王之兆也木在斗中朱字也以此觀之將來當有朱氏爲君者也天戒之矣且木之數三其禎也應在三紀之內乎鐸聞之不復有言及爲梁王迎駕於鳳翔天復二年九月甲辰帝以敵寨聯絡稍盛躬統千騎乘高詠之時秋空澄霽四絕纖靄望



者見龍旌上紫雲如繖遠邇同矚或曰馬氣上騰往  
往若是或曰前後騎士屯集豈一二乎曷無是耶茲  
固奇瑞非嘗者所當也三年十月甲午有大聲出於  
梁邸之聽事帝甚驚駭占者曰當有大慶後封魏王  
天祐四年正月自河北還壬寅至梁是日有五彩雲  
覆于府署之上士庶靡不覩者又軍庫前有苦井嘗  
以備灑滌之用一旦其味忽變其美若飴冠於他井  
今見在焉二月戊申朔家廟主者言廟之左棟產五  
色芝狀如芙蓉紫煙蒙護數日不散是日福建帥遣  
吏持箋幣通好仍以白鸚鵡一同至爾自旬朔之內

諸州郡繼以白烏白雀白兔泊白蓮之竝帶者相次  
來獻上覩之謙畏彌極咸命具表歸天朝四月帝將  
受禪宋州刺史王臯進赤烏一雙又宰臣張文蔚正  
押傳國寶玉册金寶及文武群官諸司儀伏法物及  
金吾左右三軍離鄭州丙辰達上源驛是日慶雲見

册府元龜

册府元龜

問位部

卷之三十三

十八



冊府元龜

巡按福建監察御史臣李嗣京 訂正

知甌寧縣事 臣孫以敬 參閱

知建陽縣事 臣黃國琦 較釋

閏位部

知子 知臣 念良臣

知子

夫知子莫若父知臣莫若君蓋父子之間否臧易辨  
齟齬之際性習已彰若能鑒其神明遺其外飾闕其  
好美之意觀以成人之風自邇察遐材將焉遁况夫



負英武之畧應偏閏之位固宜念家國之重審喬嗣之能建爲元良付大業而不墜委之國事被謗間以無疑叙諸簡編亦君人之懿德也

吳孫堅爲下邳丞時權始生兄策起事江東權嘗隨從性度弘朗仁而多斷好俠養士始有知名侔於父兄矣每參同計謀策甚奇之自以爲不及也每請會賓客常顧權曰此諸君汝之將也策臨終呼權佩以印綬謂曰舉江東之衆決機於兩陳之間與天下爭衡卿不如我舉賢任能各盡其力保江東我不如卿宋臨川王義慶高祖中弟道隣子也出繼叔父道規後義慶幼爲高祖所知嘗曰此我家豐城也

梁臨川王宏太祖第六子也齊明帝時爲桂陽王功曹吏衡陽王暢有美名爲始安王蕭遙光所接及遙光作亂逼暢入東府高祖在雍州嘗懼諸弟及禍謂南平王偉曰六弟明於事必先還臺及信至果如高祖策

南平王偉高祖之弟也幼清警好學齊世爲晉安王外兵時高祖爲雍州慮天下將亂求迎偉俄聞已入沔高祖欣然謂佐吏曰吾無憂矣

南康王子通理高祖孫也父死服闋見高祖悲泣不



自勝高祖謂左右曰此兒大必爲奇士

陳高祖母弟休先少儻有大志梁簡文之在東宮  
深被知遇大冑中旣納侯景有事北方乃使休先召  
募得千餘人爲文帝主帥頃之卒高祖之有天下也  
每稱休先曰此弟若存河維不足定也

文帝始興昭烈王長子也高祖甚愛之嘗稱此兒吾  
宗枝英秀也北齊文宣帝高祖第二子世宗母弟也  
內雖明敏貌若不足世宗每嗤之曰此人亦得富貴  
相法亦何繇可解唯高祖異之謂薛瑊曰此兒意識  
過吾

上黨剛肅王渙字敬壽神武第七子也天姿雄傑儻  
儻不群雖在童幼嘗以將畧自許神武壯而愛之曰  
此兒似我

馮翊王潤神武第十四子也幼時神武稱曰此吾家  
千里駒也爲定州刺史時監王開府王廻維與六州  
大都督獨孤枚侵竊官田受納賄賂潤按舉事二人  
表言出送臺使登魏城文宣使元文透就州宣勅曰  
馮翊王少小謹慎在州不爲非法朕信之熟矣登高  
遠望人之掌情鼠輩欲輕相間構曲生眉目於是廻  
維決鞭二百獨孤決杖一百



北平王貞字仁堅武成第五子也沈審寬恕帝曰此兒我鳳毛

知臣

夫有國家者莫不急於選士務在官人詢之以計畫委之以事任故能創業垂統名與功偕傳世祚於後裔著話言於可久者也自東漢之季吳蜀歛起莫不總覽豪傑保守封域當其君臣之分甫定疆場之事日駭而能審其才用亮其誠明或委之以腹心或仗之以師旅雖諛間之言日至疑似之迹屢彰而任之如初不以屑意其或察其操履悉其素尚苟位未充量姑待以遠期若名浮於實前知其敗事傳所謂惟君知臣者蓋得之矣繇宋氏而下逮夫梁陳高齊咸奄據一方烝用髦士至於知人善任詔爵物官盡臣下之心悉忠讜之分亦皆可述焉

蜀先主初見諸葛亮因屏人語而稱善於是與亮情好日密関羽張飛悉不悅先主解之曰孤之有孔明猶魚之有水君勿復言亮後爲丞相

鄧芝爲耶邳閣督先主出至耶與語大奇之擢爲耶令遷廣漢太守所在清嚴有治績

趙雲字子龍先主之敗有人言雲已北去者先主以



手戟擿之曰子龍不棄我走也頃之雲至後為鎮軍將軍

劉巴字子初初先主辟為左將軍西曹掾先主曰子初才智絕人如孤可任用之非孤者難獨任也

馬謖字幼嘗以荊州從事從先主入蜀除綿竹成都令越雋太守才器過人好論軍計丞相諸葛亮深加器異先主嘗謂亮曰馬謖言過其實不可大用君其察之亮猶謂不然以謖為參軍每引見談語自晝達夜後謖與張郃戰於街亭謖違亮節度為郃所破亮殺謖以謝眾

張飛為車騎將軍領司隸校尉為其帳下將張達范疆所殺持其首順流而奔孫權飛營都督表報先主先主聞飛都督之有表也曰噫飛死矣

吳孫策初為豫章太守得太史慈命往豫章安撫士眾左右皆曰慈必北去不還策曰子義捨我當復與誰餞送昌門把腕別曰何時能還答曰不過六十日

果如期而反

策初遣慈也議者紛紜謂慈未可信或云與華子魚州里恐留彼為籌策或疑

慈西托黃祖假路還北多言遣之非計策曰諸君語者非也孤斷之詳矣太史子義雖氣勇有膽烈然非縱橫之人其心有士模志經道義貴重然諾一以計語知已死亡不相負諸君勿復憂也慈從豫章還議者乃始服慈見策曰華子魚良德也然非籌畧才無佗方規規自守而已又丹陽童芝自擅廬陵詐言許詔



書為太守鄱陽氏帥別立宗部阻兵守界不受子魚所遣長史言我以別立郡須漢遣真太守來當迎之耳子魚不但不能諸廬陵鄱陽近自海昏有上僚壁有五六千家相結聚作宗伍惟輸租布於郡耳發召一人遂不可得子魚亦覩視之而已策拊掌大笑乃有兼弁之志矣頃之遂定豫章

張昭初為孫策長史昭每得北方士大夫書疏專歸美於昭昭欲默而不宣則懼有私宣之則恐非宜進退不安策聞之歡笑曰昔管子相齊一則仲父二則仲父而桓公為霸者宗今子布昭字賢我能用之其功名獨不在我乎

大帝初移都建業大會將相文武特謂嚴峻曰孤昔歎魯子敬比鄧禹呂子衡方吳漢聞得卿諸人未平此論今定云何峻退席曰臣未解指趣謂肅范受饒褒歎過實大帝曰昔鄧仲華初見光武光武時受更始使撫河北行大司馬事耳未有定王志也禹勸之以復漢業是禹開初議之端矣子敬英爽有殊畧孤始與一語便及大計與禹相似故比之呂子衡忠篤亮直性雖如奢然以憂公為先不足為損避袁術自歸於兄兄作大將別領部曲故憂兄事乞為都督辨護脩整加之恪勤與吳漢相類故方之皆有旨趣非孤私之也峻乃服

諸葛瑾代呂蒙領南郡太守任公安蜀先主東伐吳



吳王求和瑾與先主牋曰奄聞旗鼓來至白帝或恐  
 議臣以吳王侵取此州危害閔羽恐深禍大不宜答  
 和此用心於小未留意於大者也試為陛下論其輕  
 重及其大小陛下若抑威損忿暫省瑾言者計可立  
 決不復容之於群后也陛下以閔羽之親何如先帝  
 荆州大小孰與海內俱應仇疾誰當先後若審此數  
 易於反掌時或言瑾別遣親人與先主相聞大帝曰  
 孤與子瑜有死生不易之誓子瑜之不負孤猶孤之  
 不負子瑜也瑾之在南郡人有密譏瑾者此語頗流  
 聞於外陸遜表保明瑾無此宜以散其  
 意大帝報曰子瑜與孤從事積年恩如骨肉深相明  
 亮究其為人非道不行非義不言玄德昔遣孔明至  
 吳孤嘗與子瑜曰卿與孔明同產且弟隨兄於義為  
 順何以不畱孔明孔明若畱從卿者孤當以書解玄  
 德自隨人耳子瑜答孤言弟亮以失身於人委質定  
 分義無二心弟之不畱猶瑾之不往也其言足貫神  
 明人豈嘗有此乎孤前得妄語文疏即封示子瑜并  
 手筆與子瑜即得其報論天下君臣大節一定之分  
 孤與子瑜可謂神交非外言所問也知  
 卿意至輒封來表以示子瑜便知卿意

魯肅初為中護軍周瑜所薦才宜佐時大帝見肅甚  
 悅之張昭非肅謙下不足頗訾毀之云肅年少麤疎  
 未可用大帝不以為介意益貴重之賜肅母衣服帟  
 帳居處雜物富擬其舊

潘濬字承明為大嘗時濬姨兄零陵蔣琬為蜀大將  
 軍或有間濬於武陵太守衛於者云濬遣密使與琬



相聞有自托之計於以啓大帝大帝曰承明不爲此也卽封於表以示於濬而召於還免官

是儀爲侍中時時有所進達未嘗言人之短事國數十年未嘗有過呂乙歷白將相大臣或一人以罪聞者數四獨無以白儀大帝歎曰使人盡如是儀當安用科法爲儀後爲尚書僕射儀事上勤與人恭不治產業不受施惠爲屋舍才足自容鄰家有起大宅者大帝出望見問起大室者誰左右對曰似是儀家也大帝曰儀儉必非也問果他家其見知信如此

宋高祖初爲晉大尉時或薦王鎮惡於高祖時鎮惡爲天門臨澧令卽遣召之旣至與語甚異焉因畱宿明旦謂左右曰鎮惡王猛之孫所謂將門有將也卽以爲青州治中從事史行參中軍大尉軍事署前部功曹

朱齡石爲寧遠將軍寧蠻護西陽太守高祖伐蜀將謀元帥而難其人乃舉齡石衆咸謂曰自古平蜀皆雄傑重將齡石資名尚輕慮不克辦諫者甚衆高祖不從乃分大軍之半猛將勁卒悉以配之臧熹敬皇后弟也資位在齡石之右亦令受其節度是行亦不淹時一戰克捷衆咸服高祖之知人又美齡石之善



於其事

徐爰初爲晉大司馬典軍從高祖北征徵密有意理  
爲高祖所知蔡廓爲豫章太守徵爲吏部尚書廓曰  
我不能爲徐干木署紙尾羨之乃徙廓爲祠部尚書

初高祖嘗云牟徽蔡廓可平世三公

干木徐羨  
之小字

王曇首有識局智度喜愠不見於色太祖鎮江陵曇  
首自功曹爲長史隨府轉鎮西長史高祖甚知之謂  
太祖曰王曇首沈毅有器度宰相才也汝每事咨之  
王智有高名高祖甚重之嘗云見王智使人思仲祖  
與劉穆之謀討劉毅而智在焉他日穆之白高祖伐

國重事也公何乃使王智知高祖笑曰此人高簡豈  
聞此輩論議其見知如此

檀道濟爲護軍丹陽尹高祖不豫出爲鎮北將軍南  
兖州刺史高祖疾甚召太子戒之曰檀道濟雖有幹  
畧而無遠志非如兄韶有難御之氣也徐羨之傅亮  
當無異圖謝晦數從征伐頗識機變若有同異必此  
人也可以會稽江州處之

孝武初爲徐兖二州刺史以崔道固爲從事固美形  
容善舉止便弓馬好武事孝武稍嘉之會青州刺史  
新除過彭城孝武謂之曰崔道固人身如此豈可爲



寒士至老乎而世人以其偏庶便相陵侮可爲嘆息  
明帝時沈憲少有幹局爲駕部郎帝謂憲曰卿廣州  
刺史才也

南齊太祖初爲宋大將軍輔政以劉懷珍內資未多  
徵爲都官尚書領前軍以第四子寧朔將軍晃代爲  
豫州刺史或疑懷珍不受代太祖曰我布衣時懷珍  
便推懷投欵况在今日寧當有異晃發經日而疑論  
不止乃遣軍主房靈民領百騎追送晃謂靈民曰論  
者謂懷珍必有異同我期之有素必不應爾卿是鄉  
里故遣卿行非唯衛新亦以迎故也懷珍還仍受相

國右司馬

垣崇祖初爲宋義陽王道隆征北參軍道隆被誅薛  
安都反宋明帝遣沈牧之等討安都安都將裴祖隆  
引崇祖共拒戰衆敗與祖隆俱走彭城後魏陷徐州  
崇祖將部曲據朐山因遣使歸命時太祖在淮陰崇  
祖初見太祖便自比韓信白起咸不信唯太祖獨許  
之崇祖再拜奉旨後爲豫州刺史後魏遣馬步二十  
萬寇壽春崇祖堰肥水脚淹爲三百之險魏衆集堰  
南分軍內薄攻小城崇祖決埭水勢奔下魏攻城之  
衆人馬溺死數千大衆皆退走太祖謂朝臣曰崇祖



許爲我制虜果如其言嘗自擬韓白今真其人也  
劉繪父醜宋末權貴繪爲太祖太尉行參軍太祖見  
而嘆曰劉公爲不亡也

明帝時西江公遙欣齧齡中便嶷然帝謂江祐曰遙  
欣雖幼觀其神彩殊有局幹必成令器未知年命何  
如耳安陸昭王緬曰不患其兄弟不富貴但恐緬不  
及耳言之慘然而悲

裴叔業爲右軍將軍東中郎將諮議參軍明帝見而  
奇之謂之曰卿有如是中相何患不大富貴深宜勉  
之

梁高祖爲太子中庶子時王約廢錮帝嘗謂約曰卿  
方富貴必不容久滯屈及帝作輔謂曰我嘗相卿當  
富貴不言卿今日富貴便當見繇歷侍中左戶尚書  
廷尉

沈約爲高祖驃騎司馬帝將革命令約草其事并諸  
選置帝初無所改後召范雲謂曰生平與沈休文群  
居不覺有異人處今日才智縱橫可爲明識

王國珍爲大司馬中兵參軍高祖雅相知賞每歎曰  
晚代將家子弟有如國珍者少矣

王訓字懷範左僕射暕之子年十六召見文德殿應



對爽徹高祖目送久之謂朱异曰可謂相門有相矣  
後累遷侍中既拜入見帝從容謂何敬容曰褚彥回  
年幾爲宰相對曰少過三十帝曰今之王訓無謝彥  
回  
張纘字伯緒年十一尚武帝女富陽公主年十七身  
長七尺四寸眉目疎朗神采爽發高祖異之嘗謂張  
壯武云後八葉有逮吾者其此子乎  
柳慶遠始高祖爲雍州慶遠爲別駕帝謂曰昔羊公  
語劉弘卿後當居吾處今相觀亦復如是曾未十年  
而慶遠督府談者以爲逾於魏詠之

元帝初爲湘東王鎮荊州以庾曼精爲主簿遷中錄  
事每出帝嘗目送之謂劉之遴曰荊南信多君子雖  
美歸田鳳清屬桓階賞德標奇未過此子

歐陽頎爲臨賀內史元帝承制以爲東衡州刺史侯  
景平元帝遍問朝臣今天下始定極須良才卿各舉  
所知群臣未有對者帝曰吾已得人侍中王褒進曰  
未審爲誰帝云歐陽頎公正有兼濟之才恐蕭廣州  
不爲致之乃授武州刺史

陳高祖初爲大將軍與諸將醮杜僧明周文育侯安  
都爲壽各稱功伐高祖曰卿等悉良將者也而並有



所短杜公志大而識暗狎於下而驕於尊矜其功不收其拙周侯交不擇人而推心過差居危履險猜防不設侯郎傲誕而無厭輕佻而肆志竝無全身之道率皆如言

毛喜爲西昌侯記室參軍高祖素知於喜及鎮京口命喜與高宗俱往江陵仍勅高宗曰汝至西朝可諮稟毛喜喜與高宗同謁梁元卽以高宗爲領直喜爲尚書侍郎

北齊神武爲東魏大丞相謂文襄曰庫狄于鮮卑老公斛律金勅勤老公竝性純道直終不負汝爾朱渾道元劉豐生遠來投我必無異心賀拔焉過我兒樸實無罪過潘樂本作道人而心和厚汝兄弟當得其力韓軌少戇宜寬借之彭相樂心腹難得宜防護之少堪敵侯景者惟有慕容紹宗我故不貴之畱以與汝宜深加殊禮委以經畧後紹宗爲徐州刺史侯景叛梁武遣其兄子深明率衆十萬與景犄角紹宗大破之擒深明及其將帥景遂奔遁

崔謙初爲齊神武相府功曹神武稱曰崔謙清直奉公真良佐也

趙隱字彥深初爲神武大丞相功曹參軍神武與對



坐曾遣造軍令以手捫其額曰若天假卿年必大有所至每謂司徒孫騰曰彥深小心恭慎曠古絕倫斛律金仕東魏爲冀州刺史神武重其古質每誡文襄曰爾所使多漢有讒此人者勿信之及文襄嗣事爲肆州刺史

宋遊道在東魏爲司州從事神武自太原來朝見之曰此人是遊道邪嘗聞其名今日始識其面遷遊道別駕後日神武之司州饗朝士舉觴屬遊道曰飲高歡手中酒者大丈夫卿之爲人合飲此酒及還晉陽百官辭于紫陌神武執遊道手曰甚知朝貴中有憎忌卿者但用心莫懷畏慮當使卿位與之相似

文宣嘗幸東宮九卿以上陪集帝指崔昂大尉瑾司馬子瑞謂太子曰此是國家柱石可宜記之未幾復侍醺金鳳臺帝歷數諸人咸有罪負至昂曰崔昂直臣魏收才士婦兄妹夫俱省罪過

念良臣

夫琴瑟是聽君子有志義之思卿佐或虧元首有股肱之痛君臣之道不亦重乎粵若天曆餘分鼎峙立國宋齊而下互專霸業必有良士勤宣令圖或經武以著能或締俗而底績及夫守節死義先時物故竭



誠率職奄忽淪謝是用震悼上心悲涕斯集形於嗟  
歎發乎言論乃至撤去盛食具乃素服託深辭於文  
誅摠哀興於風什躬設祖奠親臨吊祭易徽名而表  
行加異數以報功賜予便蕃追叙優渥諒非德侔咸  
一情敦終始者疇克以當之哉

蜀先主初爲荊州牧以漢建安十九年入蜀進圍雒  
縣軍師中郎將龐統率衆攻城爲流矢所中卒時年  
三十六先主痛惜言則流涕拜統父議郎遷諫議大  
夫諸葛亮親爲之拜追賜統爵閔內侯謚曰靖侯  
法正有智術先主甚信任之爲尚書令護軍將軍卒

時年四十五先主爲之流涕者累日謚曰翼侯賜子  
邈爵閔內侯

霍峻爲梓潼太守裨將軍卒還葬成都先主甚悼惜  
乃詔諸葛亮曰峻旣佳士加有功於國欲行酌遂親  
率群寮臨會弔祭因畱宿墓上

吳大帝初爲吳侯偏將軍南郡太守周瑜卒時年三  
十六大帝素服舉哀感慟左右喪當還吳又迎之流  
涕曰公瑾有王佐之資今忽殞命孤何賴哉後大帝  
稱尊號謂公卿曰孤非周公瑾不帝矣

魯肅字子敬爲橫江將軍旣卒後大帝稱尊號臨壇



顧謂公卿曰昔魯子敬嘗道此可謂明於事勢矣  
凌統爲偏將軍在旅軍親賢接士輕財重義有國士  
之風卒時年四十九大帝聞之拊牀起坐哀不能自  
止數日減膳言及流涕使張承爲作銘誄二子烈封  
年各數歲大帝內養於宮愛待與諸子同賓客進見  
呼示之曰此吾虎子也及八九歲令葛光教之讀書  
十日一令乘馬追錄統功封烈亭侯還其故兵後烈  
有罪免封復襲爵領兵

呂範字子衡初爲揚州牧勤事奉法大帝統事以範  
忠誠厚見信任遷大司馬印綬未下疾卒及大帝還  
都建業過範墓呼曰子衡言及流涕祀以大牢

闕澤爲太子太傅領中書令諸官司有所患疾欲增  
重科房以簡御臣下澤每日宜依禮律其和而有正  
皆此類也及卒大帝痛惜感悼食不進者數日

呂蒙以擒閔羽之功爲南郡太守封孱陵侯卒大帝  
哀痛甚爲之降損蒙未死時所得金寶諸賜盡付府  
藏勅主者命絕之日皆上還喪事務約大帝聞之益  
以悲感

朱然爲大司馬右軍師氣候分明內行修潔其所文  
彩惟施軍器餘皆質素終日欽欽常在戰場臨急膽



定尤過絕人年六十八赤烏十二年卒大帝素服舉哀爲之感慟

宋高祖初爲宋公時左僕射劉穆之以晉義熙十三年卒高祖在長安聞之驚動哀惋者數日及受禪拊牀歎之曰穆之不死當助我理天下可謂人之云亡邦國殄瘁光祿大夫范泰對曰聖主在上英彥滿朝穆之雖功著艱難未聞便闕興毀帝笑曰卿不見驥驟乎貴日致千里耳帝後復曰穆之死人輕易我其見思如此以佐命元勳遐封南康郡公謚曰文宣謝景仁爲左僕射卒高祖親臨哭之甚慟與驃騎將

軍道遴書曰謝景仁殞逝悲痛摧割不能自勝汝聞問惋愕亦不可懷其器體淹冲情寄實重方欲與之共康時務一日至此痛惜兼深往矣柰何當復柰何文帝時侍中殷景仁卒與荊州刺史衡陽王義季書曰殷僕射疾患少日奄忽不救其識具經遠奉國竭誠周遊繼絕情兼嘗痛民望國器遇之爲歎惋歎之深不能已已汝亦同不可言往矣如何

王曇首爲侍中卒文帝爲之慟中書舍人周赧侍側曰王家欲衰賢者先殞帝曰直是我家衰耳孝武帝時司徒劉延孫卒將葬帝詔曰故司徒文穆



公延孫居身寒約家素貧虛每念清美良深悽歎葬  
送資調固當闕乏可賜錢三十萬米千斛

何偃爲吏部尚書卒官孝武與顏峻詔曰何偃遂成  
異世美志長往與之周旋重以姻媾臨哭傷惋良不  
能已往矣如何宜贈散騎嘗侍金紫光祿大夫本官  
如故謚曰靖

南齊武帝時征虜將軍假節督青冀二州刺史崔思  
祖卒帝歎曰我方欲用思祖不幸可惜詔賻錢三萬  
布五十疋

王儉爲中書監薨吏部尚書王晏啓及儉喪武帝答  
曰儉年德富盛志用方隆豈意暴疾不展救護便爲  
異世奄忽如此痛酷彌深其契濶艱運義重嘗懷尋  
言悲切不能自勝

柳世隆爲侍中卒武帝勅吏部尚書王晏曰世隆雖  
抱疾積有歲年志氣未衰冀醫藥有効痊差可期不  
謂一旦便爲異世慟怛之深此何可言

明帝卽位初謂僕射徐孝嗣曰劉懷尉若在朝廷不  
憂無清吏也先是懷尉爲齊郡太守太祖手勅褒賞  
後出監東陽郡爲吏民所安

梁高祖爲梁公時給事黃門侍郎陶季直辭疾還鄉



里天監初就家拜大中大夫高祖曰梁有天下遂不見此人

劉沆勤學善屬文為人不自伐不論人長短高祖甚愛其才以為太子洗馬遷中書舍人又為北中郎諮

議參軍天監五年卒官年三十高祖甚傷惜焉

任昉為新安太守為政清省吏民便之視事暮歲卒

於官舍時年四十九高祖聞問方食西苑綠沉瓜投

之於盤悲不自勝因屈指曰昉少時嘗恐不滿五十

今四十九可謂知命即日舉哀哭之甚慟

孔休源為金紫光祿大夫監揚州中大通四年遘疾

卒高祖為之流涕顧謂謝舉曰孔休源奉職清忠當

官亮直方欲共康治道以隆王化奄至殞沒朕甚痛

之舉曰此人清介疆直當今罕有臣竊為陛下惜之

鄭紹叔為左將軍散騎嘗侍卒後高祖嘗潛然謂朝

臣曰鄭紹叔立志忠烈善則稱君過則歸已當今無

比其見賞惜如此

元帝初為湘東王時都督雍梁等州軍事平北將軍

張纘為杜岸所執送岳陽王詧詧敗為防人所害帝

承制贈侍中衛將軍開府謚簡憲公纘有鑒識自見

帝便推誠委結及帝即位追思之嘗為詩其序曰簡

臧閔為騎常中書  
通事舍人兼司農卿  
卒官閔前後居職所  
掌之局大事及萬景  
廷尉所不能決者勅  
並付閔辨斷精詳  
咸得其 厥卒後  
有過登閔鼓訴者  
亦付清直舍人高祖  
曰臧閔既此事便無  
可付其見知如此  
任昉劾奉補此條  
在任昉後



憲之爲人也不事王侯負才任氣見余則申達旦夕不能已已懷夫人之德何日忘之

後梁明帝天保十四年尚書令王操卒帝舉哀於朝堂流涕謂其群臣曰天不使吾平蕩江表何奪吾賢相之速也及塋親祖於瓦棺門贈司空

陳高祖永定三年五月北江州刺史熊曇郎殺都督周文育舉兵反及又育之樞至自建昌高祖素服哭於朝堂甚哀

北齊高祖至冀州追憶故刺史封隆之顧謂冀州行事司馬子如曰封公積德履仁體通性達自出納軍國垂二十年契濶艱虞始終如一其忠信可憑方以後事託之何期報善無徵奄從物化言念忠賢良可痛惜爲之流涕令叅軍宋仲羨以大牢就祭焉

孫搴爲散騎嘗侍司馬子如與高季式召搴飲酒醉甚而卒時年五十三高祖親臨之子如叩頭請罪帝曰折我右臂仰覓好替還我子如舉魏收季式舉陳元康以繼搴焉

武成帝天統初祕書監張耀奏事遇疾仆於御下臨視呼數聲不應帝泣曰豈失我良臣也旬日卒時年六十三詔稱耀忠貞平直温恭廉慎贈開府儀同三



司尚書右僕射燕州刺史謚曰簡

梁太祖開平四年五月魏博節度使守太師兼中書令鄴王羅紹威薨帝哀慟曰天不使我一海內何奪忠臣之速也詔贈尚書令

册府元龜

册府元龜

巡按福建監察御史臣李嗣京 訂正

新建縣舉人 臣戴國士參閱

知建陽縣事 臣黃國琦較釋

閏位部

巡幸 畋遊

巡幸

夫巡狩之儀載乎虞典遊豫之度存諸夏諺蓋所以觀群后省風俗鳴鑾案節清道而行卜日惟吉歸格藝祖慶賜浹洽衆庶歡康斯先生展義之道也若夫



秦政之幸回中登之罘駐彭城臨碣石致禱以出周  
鼎命使而求羨門侈心未窮海內稱亂固足為後王  
之戒也洎吳蜀宋齊而下亦或舉時巡之制稽設教  
之義或脩謁陵寢或歷覽故宮或宴衍以示慈或肆  
赦而施惠以至耆艾加粟帛之賜孝悌有旌賞之命  
布在方冊可舉而言矣

秦始皇二十七年巡隴西北地出雞頭山過回中

在北地臣欽若等曰自此以下不書月者皆史書闕  
文又云始皇巡河內自以武德定天下置武德縣

二十八年東行郡縣上泰山封禪既畢於是乃並渤海

以東過黃腫東萊有黃腫縣窮成山登之罘罘山在立

石頌秦德焉而去南登琅琊大樂之留三月徙黔首

三萬戶琅琊臺下越王勾踐嘗治琅琊縣起臺館復十二歲作琅琊

臺立石刻頌秦德明得意曰維二十六年皇帝作始

端平法度萬物之紀以明人事合同父子聖智仁義

顯白道理東撫東山以省卒士事已大畢乃臨下海

皇帝之功勤勞本事上農除末黔首是富晉天之下

搏心揖志罷械一量同書文字日月所昭舟輿所載

皆終其命莫不得意應時動事是維皇帝正飾異俗

陵水經地憂恤黔首朝夕不懈除疑定法咸知所辟

方伯分職諸治經易舉錯必當莫不如是皇帝之明



臨察四方尊卑貴賤不踰次行姦邪不容皆務貞良  
 細大盡力莫敢怠荒遠邇辟隱專務肅莊端直敦忠  
 事業有嘗皇帝之德存定四極誅亂除害興利致福  
 節事以時諸產繁殖黔首安寧不用兵革六親相保  
 終無寇賊驩欣奉教盡知法式六合之內皇帝之士  
 西涉流沙南盡北戶東有東海北過大夏人迹所至  
 無不臣者功蓋五帝澤及牛馬莫不受德各安其宇  
 雖秦王兼有天下立名為皇帝乃撫東土至于琅琊  
 列侯武城侯王離列侯通武侯王賁倫侯建城侯趙  
 亥倫侯昌武侯成臣欽若等曰史失姓倫侯武信侯馮毋擇丞

相隗林丞相王綰卿李斯卿王戊五大夫趙嬰五大  
 夫楊樛從與議於海上曰古之帝者地不過千里諸  
 侯各守其封域或朝或否相侵暴亂殘伐不止猶刻  
 金石以自為紀古之五帝三王知教不同法度不明  
 假威鬼神以欺遠方實不稱名故不久長其身未歿  
 諸侯背叛法令不行今皇帝并一海內以為郡縣天  
 下和平昭明宗廟體道行德尊彌大成群臣相與誦  
 皇帝功德刻于金石以為表經還過彭城齋戒禱祠  
 欲出周鼎泗水使千人沒水求之弗得乃西南渡淮  
 水之衡山南郡浮江至湘山祠逢大風幾不得渡帝



問博士曰湘君何神博士對曰聞之堯女舜妻而葬此於是始皇大怒使刑徒三千人皆伐湘山樹楮其

山帝自南郡繇武關歸

武關秦南關通南陽在祈西北七十里弘農界

二十九年東游至陽武博浪沙中

河南陽武縣有博浪沙

為盜

所驚求弗得乃令天下大索十日登之罾刻石其辭

曰

臣欽若等曰此辭三句為韻碑石會稽同

維二十九年時在中春陽和

方起皇帝東游巡登之罾臨罾于海從臣嘉觀原念

休烈追誦本始大聖作治建定法度顯著綱紀外教

諸侯光施文惠明以義理六國回辟貪戾無厭虐殺

不已皇帝哀眾遂發討師奮揚武德義誅信行威憚

旁達莫不賓服烹滅疆暴振拔黔首周定四極普施

明法經緯天下永為儀則大矣哉宇縣之中

宇宇宙縣赤縣

承順聖意群臣誦功請刻于石表垂于嘗式具東觀

曰維二十九年皇帝春遊覽省遠方逮于海隅遂登

之罾昭臨朝陽觀望廣麗從臣咸念原道至明聖法

初興清理疆內外誅暴疆武威旁暢振動四極會滅

六王闡弁天下菑害絕息永偃武兵皇帝明德經理

宇內視聽不怠作立大義昭設備器威有章旗職臣

遵分各知所行事無嫌疑黔首改化遠邇同度臨固

絕尤嘗職既定後嗣循業長承聖治群臣嘉德祇誦



聖烈請刻之罍旋遂之琅琊道上黨入道從也

三十二年之碣石使燕人盧生求羨門古山人也高誓刻

碣石一作盟壞城郭决通隄防其辭曰遂興師旅誅戮

無道為逆滅息武殄暴逆文復無罪復一作憂庶心咸服

惠論功勞賞及牛馬恩肥土城皇帝奮威德并諸侯

初一泰平隨壞城郭决通川防夷去險阻地勢既定

黎庶無繇天下咸撫男樂其疇女修其業事各有序

惠被諸產久竝來田久一作分莫不安所群臣誦烈請刻

此石垂著儀矩因使韓終侯公石生求仙人不死之

藥始皇巡北邊從上郡入

二十五年始皇欲游天下道九原直抵甘泉乃使蒙

恬通道自九泉抵葦泉塹山堙谷千八百里

三十七年十月癸丑出游左丞相李斯從少子胡亥

愛慕請從帝許之十一月行至雲夢望祀虞舜於九

嶷山浮江下觀藉柯渡海渚過丹陽至錢塘臨浙江

江水至會稽山陰為浙江水波惡乃西二百十里從狹中渡上會

稽祭大禹望于南海而立石刻頌秦德其文曰皇帝

休烈平一字內德惠修長三十有七年親巡天下周

覽遠方遂登會稽宣省習俗黔首齋莊群臣誦功本

原事迹追首高明首一作道秦聖臨國始定刑名顯陳舊



章初平法式審別職任以立于嘗六王專倍貪戾傲  
 猛率衆自疆暴虐恣行負力而驕數動甲兵陰通間  
 使以事合從行爲辟方內飾詐謀外來侵邊遂起禍  
 殃義威誅之殄熄悖亂殘滅亂亡至德廣密六合之  
 中被澤無疆皇帝弁宇兼聽萬事遠近畢清運動群  
 物考驗事實各載其名貴賤並通善否在前靡有隱  
 情節省宣義省一作非有子而嫁倍死不貞防隔內外禁  
 止淫泆男女潔誠夫爲寄身殺之無罪男秉義程女  
 爲逃嫁子不得母聖化廉清大治濯俗天下承風蒙  
 被休經皆遵度軌和安敦勉莫不順令黔首修潔人  
 樂同則嘉保太平後敬奉法嘗治無極輿舟不傾從  
 臣誦烈請刻此石光垂休銘還過吳從江乘渡丹陽有江  
乘並海上北至琅邪縣  
 二世元年與趙高謀曰朕年少初卽位黔首未集附  
 先帝巡行郡縣以示疆威服海內今晏然不巡行卽  
 見弱母以臣畜天下其年春二世東行郡縣李斯從  
 到碣石並海南至會稽而盡刻始皇所立刻石傍著  
 大臣從者名以彰先帝成功盛德焉皇帝日金石刻  
 盡始皇帝所爲也今襲號而金石刻辭不稱始皇帝  
 其於久遠也如後嗣爲之者不稱成功盛德丞相臣



斯臣去疾

姓馬

御史大夫臣德

失姓

昧死言臣請具刻詔

書刻石因明白矣臣昧死請制曰可遂至遼東而還

蜀後王建興十四年四月後主至渝登觀阪看汶水

之流日還成都

吳後主孫皓寶鼎三年九月出東閔

宋文帝元嘉靖四年二月乙卯行幸丹徒謁京陵三

月丁亥還宮

二十六年二月己亥陸道幸丹徒謁京陵五月丙寅

水路發丹徒壬午至京師

孝武帝大明五年九月丁卯行幸琅琊郡囚繫悉原

遣

日本紀不書還宮

七年二月甲寅巡南豫南兖二州丁巳較獵于歷陽

之烏江縣未登烏江縣六合山壬申還宮

九月戊子詔曰昔周王驥跡寔窮四溟漢帝鸞軫風

遍五嶽皆以上對幽靈下理民土自天昌輦馭臨宮

創圖禮代天鬱世貿興毀皇家造宋日月重光璇璣

得序五星順命而戎車歲動陳詩義闕朕聿奉三無

奄一天下思盡寶戒之規以塞謀危之路當時省方

觀察風俗外詳考舊典以副側席之懷

十月戊申巡南豫州乃下詔曰朕巡幸所經先見百



年者乃孤寡老疾並賜粟帛獄繫刑罪並親聽訟其  
 士庶或怨鬱危滯受抑吏司或隱約繫立負擯州里  
 皆聽進朕前面自陳訴若忠信孝義力田殖穀一介  
 之能一藝之美悉加旌賞雖秋澤頻降而夏旱嬰弊  
 可卽開倉并加賑賜癸丑行幸江寧縣丙寅詔曰賞  
 慶刑威奄國彞軌黜幽并明闢寓嘗憲故採言聆風  
 式觀侈質貶爵加地於是乎在今類帝宜社親巡江  
 甸因覲嶽守躬求民瘼思弘明試之典以申考績之  
 義行幸所經蒞民之職功宣於聽卽加甄賞若廢務  
 亂民隨讐議罰二者詳察以聞

十二月丙午行幸歷陽癸亥至自歷陽

前廢帝景和元年九月癸巳幸湖熟奏鼓吹戊戌還

官

南齊武帝永明七年六月丁亥幸琅琊

梁高祖大同十年三月甲午幸蘭陵謁遠陵至修陵

巳酉幸京口城北固樓改名北顧庚戌幸廻賓亭宴

帝鄉故老及所經近縣奉迎候數千人各資錢二千

陳高祖永定二年五月辛酉幸大莊嚴寺

宣帝太建四年十二月甲辰幸樂遊苑

後主至德三年十一月辛巳幸長干寺



北齊文宣帝天保元年二月庚午如晉陽拜辭山陵  
是日皇太子入景涼風臺監摠國寧十月己卯備法  
駕御金輅入晉陽宮朝皇太后於內殿十二月辛丑  
至自晉陽二年正月甲戌帝汎舟於東城

九月癸巳帝如趙定二州因如晉陽

三年六月丁未至自晉陽乙卯如晉陽

九月辛卯自并州幸離石十二月壬子還宮戊午如

晉陽

四年四月戊戌帝還宮

五年八月丁丑帝幸晉陽十二月庚申北巡至達達

出嶺覽山川險要將起長城

六年三月丙申至自晉陽

四月庚申帝如晉陽五月庚寅至自晉陽

六月丁卯如晉陽壬申親討茹茹七月壬辰還晉陽

九月乙卯至自晉陽

十月辛亥如晉陽

七年正月甲辰至自晉陽於鄴城西馬射大集衆而  
觀之

八月庚申如晉陽

九年三月丁酉至自晉陽



六月乙丑自晉陽北巡己巳至和連池戊寅還晉陽  
八月乙丑至自晉陽甲戌如晉陽十一月甲午至自  
晉陽

十年正月甲寅如遼陽甘露寺三月丙辰至自遼陽

九月己巳如晉陽 十月晏駕于晉陽臺

武成帝河清元年十月癸亥行幸晉陽十二月丙辰

至自晉陽

四年正月行幸晉陽四月傳位於皇太子改元天統

稱太上皇

十一月至自晉陽

後主天統元年十二月壬戌太上皇帝幸晉陽丁卯

帝至自晉陽

二年正月庚子行幸晉陽二月庚戌太上皇帝至自

晉陽

八月太上皇帝幸晉陽

三年正月壬辰太上皇帝至自晉陽

九月丁巳太上皇帝幸晉陽十一月癸未至自晉陽

四年四月辛巳太上皇帝幸晉陽五月壬戌至自晉

陽

五年三月行幸晉陽四月乙丑至自晉陽



武平元年八月辛卯行幸晉陽十二月丁亥至自晉陽

二年八月己亥行幸晉陽十月己亥至自晉陽

三年八月癸巳行幸晉陽臣欽若等日本紀不書至字

四年二月丁巳行幸晉陽三月庚辰至自晉陽

十月癸卯行幸晉陽

五年二月乙未至自晉陽辛丑行幸晉陽丁未至自

晉陽

八月癸卯行幸晉陽

六年正月乙亥至自晉陽

七月甲戌行幸晉陽

十年正月癸卯至自晉陽

梁太祖開平元年十月帝以用軍未暇西幸文武百

官等久居東京漸及疑訝令就便各許歸安只留宰

臣韓建薛貽矩翰林學士張策韋郊杜曉中書舍人

封舜卿張袞并左右御史司天監宗正寺兼要當諸

司節級外其宰臣張文蔚已下文武百官竝先於西

京祇候

二年二月帝以上黨未收因議撫巡便住西都赴郊

裡之禮乃下令曉告中外取三月一日離東京以宰



臣韓建權判建昌宮事兵部侍郎姚洎為鹵簿使開  
 封尹博王友文為東都留守三月壬申帝親統六軍  
 巡幸澤潞是日寅時車駕西幸宰臣并要切司局皆  
 扈從晚次中牟丙申招討使劉知俊上章請車駕還  
 東京蓋小郡湫隘非久駐蹕之所達覽帝俞其請四  
 月丙午車駕離澤州丁未駐蹕於懷州宴宰臣文武  
 百官辛亥至鄭州壬子幸東京丙寅車駕幸繁臺觀  
 稼  
 七月甲戌大霖雨陂澤泛溢頗傷稼穡帝幸右天武  
 軍河亭觀水

九月丙子太原軍

臣欽若等曰即後唐太宗也

出陰地關南牧寇

掠郡縣晉絳有備帝慮諸將翫寇乃下詔親議巡幸  
 命有司備行丁丑翠華西符宰臣翰林學士崇政院  
 使金吾仗及諸司要切官皆扈從餘文武百官並在  
 東京壬午達雒陽

帝御文思殿受朝參許汝孟懷牧守來朝澤州刺史  
 劉重霸面陳破敵之策癸未西幸宿新安丙戌至陝  
 州駐蹕蒲雍同華牧守皆進鎧甲騎馬戈稍食味方  
 物丁亥錫宴扈從官戊子延州賊軍  
臣欽若等曰即祖跋思恭也  
 寇上平關又太原軍攻平陽烽火羽書晝夜繼至乙



丑六軍統軍牛存節黃文靖各領所部將士起行在  
 甲午太原步騎數萬攻逼晉絳踰旬不克知天軍至  
 乃自焚其寨至久而遁十月庚戌至西都丁巳至東  
 都

三年正月甲戌發東都百官扈從次中牟縣乙亥次  
 鄭州丙子次汜水縣河南尹張宗奭河陽節度使張  
 歸霸並來朝戊寅次偃師縣己卯備法駕六軍儀仗  
 入西都是日御文明殿受朝賀三月辛未詔曰同州  
 邊隅繼有士眾歸化暫息巡撫兼要指揮今宰蒲陝  
 取九日進發甲戌車駕發西都百官奉辭于師子門

外丁丑次陝州己卯次解縣河中節度使冀王友謙  
 來奉迎庚辰至河中府四月丙申朔駐蹕河中壬寅  
 辰時駕巡于朝邑縣界焦黎店冀王友謙及崇政內  
 諸司使扈從至申時迴五月癸酉駕三更一點發河  
 中己卯至西京庚戌同州節度使劉知俊據本郡反  
 辛亥駕幸蒲陝夜半發大內七月癸酉駕幸陝乙亥  
 至自陝文武百官於新安縣奉迎

閏八月己卯幸西苑觀稼

十一月辛丑幸穀水

四年二月乙丑幸井水亭己丑出光政門至穀水觀



麥

四月丙戌幸建春門閱新樓至七里屯觀麥召從官食于樓河南張昌孫及蒲同主事吏賜物各有差

十一月丁亥朔幸廣王第作樂

五年二月壬戌詔曰東京舊邦久不巡幸宜以今月九日幸東都扈從文武官委中書門下量閑劇處分宰臣上言曰龍興天府久望法駕但陛下始康愈未宜涉寒願少留清蹕從之甲子幸曜村民舍閱農事  
庚午幸白馬坡

四月丁卯幸龍門召宰臣學士金吾上將軍侍宴于廣化寺

乾化五年五月癸巳觀稼于伊水登建春門幸會節坊張宗奭私第臨亭臯視物色賞賜甚厚

七月帝不豫稍歇秋暑自辛丑幸會節坊張宗奭私第宰臣視事於歸仁亭子崇政使內諸司及翰林院並止於河南令廨署至甲辰復歸大內

八月戊辰幸故上陽宮至于榆林觀稼

九月庚子親御六師次于河陽臣欽若等日事具閏位親征門甲辰

至于衛州乙巳至于宜溝幸民劉達墅丙午至湘州十月辛亥朔駐蹕于湘州宰臣洎文武從官並詣行



宮起居戶部郎中孔昌序齋留都百官冬朔起居表至自西京諸道節度使刺史諸藩府留後各以冬朔起居表來上制以郢王友珪充控鶴指揮使諸軍都虞候閻寶爲御營使甲寅將以其夕幸魏縣命閣門使李郁報宰臣兼勅內外丙寅夜車駕發軔于都署乙卯次洹水丙辰至魏縣戊辰幸邑西之白龍潭潭水亘千許涉南北五之一焉風瀾岸卉遼然有江湖之狀潭之北立神祠前亭弘敞下植波際帝登臨凝覽宸旨舒悅卽命丞相與翰林六學士侍膳于左右又命漁艇數士以釣網進觀其漁焉俄頃間洪纖尾鰲所得無筭復有得大白魚長六七尺者來獻珠眸雪鱗厥狀甚異帝諦視已乃命近貴復之中流名其潭曰萬歲漁人等咸優錫遣之

十一月辛巳朔上駐蹕魏縣從官自丞相而下並詣行宮起居留都文武百官及諸道節度使防禦使刺史諸藩府留後各奉表起居壬午帝以邊事稍息宣命還京師車駕發自行闕夕次洹水縣癸未內黃縣甲申至黎陽縣乙酉命從官丞相而下宴于行次丁亥次衛州戊子晨次新鄉夕止獲嘉己丑次武陟庚寅次溫縣辛卯次孟州留都文武官左僕射楊涉洎



孟州守李周彝等皆匍匐東郊迎拜其文武官並令先還壬辰詰旦離孟州晚至都六軍以天兵御仗分列前導煌煌焉濟濟焉昔所未覩也都人士女泊者老等歡噪呼啗太祖御五鳳樓受百辭稱賀畢還宮二年二月壬戌帝將巡按北境中外戒嚴詔以河南尹守中書令判六軍事張宗奭爲大內畱守中書門下奏差定文武官領務尤切宜扈駕者三十八人詔工部尚書李皎左散騎嘗侍孫騰左諫議大夫張衍兵部侍郎劉邈兵部郎中張雋光祿少卿盧秉彝並令扈蹕甲子發自雒師夕次河陽乙丑次溫縣丙寅次武陟懷州刺史段明遠迎拜于境上其內外所備咸豐霈焉丁卯次獲嘉戊辰次衛州之新鄉巳巳晨衛州夕止洪門內衙十將使以十指揮兵士至于行在辛未駐蹕黎陽癸酉發自黎陽夕次內黃縣甲戌次昌樂縣丁丑次于永濟縣青州節度使賀德倫奏統領兵士赴歷亭軍前戊寅至貝州命四丞相及學士李琪盧文度知制誥竇賞等十五人扈從其左嘗侍帝馭等二十三人止焉巳卯發自貝州夕駐于野落三月庚辰朔次于棗疆縣之西縣丙戌鎮定諸軍招討使楊師厚奏下棗疆縣車駕卽日疾馳南還丁



亥復至貝州庚寅楊師厚與副招討李周彝等准詔  
來朝乙巳發貝州夕次臨清縣丙午次永濟縣丁未  
至魏州四月巳酉幸魏州夕次昌樂戊午次內黃縣巳  
及六學士丁巳發魏州夕次滑州將吏耆老  
未次黎陽駐馬乙丑發自黎陽夕次滑州將吏耆老  
並於州之南津歡噪迎拜本州節度使進馬十匹銀  
器一千兩備宴錢二千貫丙寅離滑州夕次嘗樂頓  
丁卯次長垣縣戊辰次封丘縣巳巳至東京開封尹  
博王友文摠留都文武奉迎于北郊帝入自含耀門  
綵繡連延照耀阡陌都人士女闐咽歡呼是月戊寅  
車駕發自東京夕次中牟縣五月巳卯朔從官文武  
自丞相而下並詣行殿起居親王及諸道藩帥咸奉  
表來上庚辰鄧自鄭州至滎陽縣河南尹魏王宗奭  
望塵迎拜河陽留後邵贊懷州刺史段明遠等遷迺  
來迎夕次汜水縣帝召魏王宗奭入對便於御前賜  
食數刻乃退壬午駐蹕于汜水宰臣河南尹六學士  
並於內殿起居勅以建昌宮事委宰臣于兢領之癸  
未帝發自汜水宣令邵贊段明遠各歸所理午憇任  
村頓夕次孝義宮留都文武禮部尚書孔續而下道  
左迎拜次偃師甲申至都文武官奉迎於東郊



畋遊

王者蒐狩以時所以除田害講武事也故易著三驅之吉禮有五戒之習焉雖復餘閏亦存憲度其或順肅殺之令脩弋獵之事不失乎禮故可尚也乃有射猛虎以爲樂眷胡雉而縱心暴殄是期盤游靡戒以至乎荒志驕氣移其龜玉者不爲不幸也

吳大帝初爲吳侯親乘馬射虎於虔亭馬爲虎所傷帝投以雙戟虎却廢嘗從張世擊以弋獲之帝每畋獵嘗乘馬射虎虎嘗突前攀持馬鞵張昭爲軍師變色而言曰將軍何所當爾夫爲人君者謂能駕御英雄驅使群賢豈謂馳逐於原野較勇於猛獸者乎如有一旦之患柰天下笑何帝謝昭曰年少慮事不遠以此慙君然猶不能已乃作射虎車爲方日間不置蓋一人爲御自於中射之時有逸群之獸輒復犯車而帝每手擊以爲樂又帝數射雉少府藩濬諫由是遂絕

景帝好射雉春夏之間嘗晨出夜還

宋文帝元嘉二十五年閏二月大蒐于宣武場三月較獵

孝武帝大明七年二月南巡丁巳較獵于歷陽之烏



江

十月巡南豫已巳較獵於姑熟

明帝泰始七年二月於巖山射雉帝嘗射雉至日中無所得甚羞召問侍臣吾旦來如臯遂空行可笑座者莫答褚炫獨曰今節候雖適而雲霧尚凝故草暈之禽驕心未警但待神駕首豫群情便可載驩帝意解乃於雉場置酒又云有雉不肯入場日暮將反令晉平王休祐射之語曰不得雉勿歸休祐從在黃麾內便馳帝遣左右數人隨之因遣壽隆之等追及逼使休祐

南齊武帝永明末將射雉竟陵王子良諫之見宗室忠諫門

東昏侯在位置射雉場二百九十六處

陳後主禎明二年十月幸莫府山大較獵

東魏孝靜興和三年十月癸亥狩于西山十一月戊

寅還宮

武定元年正月已巳蒐于西山癸酉還宮

十一月甲午狩于西山乙巳還宮

北齊文宣帝大保四年正月丙子山胡圍離石戊寅帝討之未至胡已逃竄因循三雉大狩而歸

五月庚午較獵于林慮山戊子還宮



後主天統元年十二月庚戌太上皇狩于北郊壬子  
狩于南郊乙卯狩于西郊

武平四年九月較獵于鄴東

七年十月太狩于祁連池

梁太祖開平二年十二月癸丑獵畋于含耀門外

三年十一月丙申畋于上東門外

十二月乙丑臘較獵于甘泉驛

四年十一月巳亥畋于伊水

乾化元年十二月癸酉臘假詔諸王與河南尹左右

金吾六統軍等較獵于近苑

冊府元龜

冊府元龜

巡按福建監察御史臣李嗣京訂正

分守建南道左布政使臣胡維霖參閱

知建陽縣事臣黃國琦較釋

閏位部 二十五

禮賢 好善 獎善 養老

禮賢

古之王者歲三月聘名士禮賢者故書云任官惟賢  
材又云野無遺賢蓋賢者霸王之器邦國之寶也自  
秦逮梁宋雖運居偏閭而皆建邦啓土制敵庇民乃



有豐玉帛之數備弓旌之禮博求遺逸物色雋良至  
或同簋而命食在駕而降顧異厥體貌厚其廩賜或  
高蹈辭聘挂組長往則惠以書問贈之風什故人盡  
其用士獻其謀白駒無空谷之悲鳴鶴絕在陰之嘆  
克祚其國用康厥政何莫繇斯道焉

秦始皇帝初為秦王見尉繚亢禮衣服食飲與繚同

繚曰秦王為人蜂準蜂一作隆長目摯鳥膺豺聲少恩而

虎狼心居約易出人下得志亦輕食人我布衣然見

我嘗身自下我誠使秦王得志於天下天下皆為虜

矣不可與久游乃亡去秦王覺因止以為秦國尉卒

用其計策

蜀先主初為平原相時郡民劉平結客刺先主先主

不知而待客甚厚客以狀語之而去是時人民饑饉

屯聚鈔暴先主外御寇難內豐財施士之下者必與

同席而坐同簋而食無所簡擇衆多歸焉

諸葛亮字孔明隱居南陽時先主初屯新野徐庶謂

之曰諸葛亮孔明者卧龍也將軍豈願見之乎先主

曰君與俱來庶曰此人可就見不可屈致也將軍宜

枉駕顧之繇是先主詣亮凡三往乃見以上客禮之

龐統為耒陽令免官諸葛亮言之於先主先主見與



譚大器之以爲治中從事親侍亞於亮遂與亮並爲  
軍師中郎將

吳大帝時張紘爲會稽東部東尉大帝於羣臣多呼  
其字唯呼張昭曰張公紘曰東部所以重二人也

張溫字惠恕允之子也少脩節操容貌奇偉大帝聞  
之以問公卿曰溫當今與誰爲比大司農劉基曰可  
與全琮爲輩太嘗顯雍曰基未詳其爲人也溫當今  
無輩大帝曰如是張允不死也徵到延見文辭占對  
觀者傾竦大帝改容加禮

潘濬初爲劉備從事留典荊州及大帝得荆土將吏  
悉皆歸附而濬獨稱疾不見大帝遣人以狀就家輿  
致之濬伏面著牀席不起涕泣交橫哀哽不能自勝  
大帝憫勞與語呼其字曰承明觀丁父郡俘也武王  
以爲軍師彭仲爽申俘也文王以爲令尹此二人卿  
荆國之先賢也初雖見囚後皆擢用爲楚名臣卿獨  
不然莫肯降意將以異故人之量邪使親近以手巾  
拭其面濬起下地拜謝以爲治中

是儀爲侍中服不精細食不重膳賑贍貧困家無儲  
畜大帝聞之幸儀舍求視蔬飯親嘗之對之嘆息卽  
增俸賜益田宅儀累辭讓以恩爲戚



朱桓領青州牧卒家無餘財大帝賜鹽五千斛以周喪事子異嗣

宋高祖卽位初召周續之於廬山續之盡室俱下帝為開館東郭外招集生徒乘輿降幸并見諸生問續

之禮記傲不可長與我九齡射於矍圃三義辯析精與稱為名通

孔季恭為左光祿大夫辭官東歸高祖餞之戲馬臺百僚咸賦詩以述其美

文帝元嘉初徵戴顓為散騎嘗侍不就帝每欲見之謂黃門侍郎張敷曰吾東巡之日當讌戴公山池以

其好音長給正聲伎一部及卒後文帝起景陽山成歎曰恨不得使戴顓觀之

何尚之為尚書左僕射致仕於方山著退居賦以見志詔書敦勸文帝又與江夏王義恭詔曰今朝賢無

多且羊孟尚不得告謝臣欽若等曰尚之任遇有殊便未宜申許耶義恭答曰尚之清忠貞固歷事唯允

雖年在懸車而體獨克壯未能申許下情所同尚之復攝職

沈道處 范泰 王悅之 雷次宗 謝超宗

顧歡 褚伯玉 此七事附在卷末判



武帝時裴昭明為始安內史及還甚貧罄帝曰裴昭明罷郡還遂無宅我不諳書不知故人中誰比遷射聲較尉

張緒為嘗侍中書令緒善言素望甚重高帝時深加敬異車駕幸莊嚴寺聽僧達道人講座遠不聞緒言帝難移緒乃遷僧達以近之永明中為給事中太子詹事每朝見武帝目送之謂王儉曰緒以位尊我我以德貴緒也

明帝初為豫州刺史別駕夏侯詳歷事八將州部稱之帝雅相器遇

顧嵩之與王思遠友善少孤好學有義行初學舉秀才歷官府閣永明末為太子中書舍人兼尚書左丞隆昌初為安西諮議兼著作與思遠並屬文章建武初以疾歸家明帝手詔與思遠曰此人殊可惜就拜中散大夫

梁高祖天監元年詔曰中散大夫范述曾昔在齊世忠直奉主往莅永嘉治身廉約宜加禮秩以厲清操可大中大夫賜絹二十疋述曾初仕齊永嘉太守以中散大夫還鄉里高祖踐祚乃輕舟出詣闕仍辭還東故有是命



岑之敬爲奉車郎年十八預重雲殿法會時高祖親行香熟視之敬曰未幾見兮突而弁兮卽日除太學限內博士

簡文帝初爲晉安王時孔休源爲王府長史南蘭陵太守別勅專行南徐州事休源累佐名藩甚得名譽王深相倚仗軍民機務動止詢謀嘗於中齋別施一榻云此是孔長史坐人莫能預其見禮如此

劉慧裴先明釋典工篆隸簡文臨江州遺以几杖論者云自遠法師沒後將二百年始有張劉之盛矣

張孝

秀爲建安別駕去職歸山居東林寺專精釋典簡文嘗與慧裴書述其貞白云

元帝初爲湘東王時以庾承先疆記敏識板法曹參軍不就因承先講老子帝親命駕臨聽論議終日深自相賞接留連月餘日乃還山王親祖道并贈篇什隱者美之又表薦顧協曰臣聞貢玉之士歸之潤山論珠之人出於枯岸是以芻蕘之言擇於廊廟者臣府兼記室參軍吳郡顧協行稱鄉閭學兼文義服膺道素雅量遠遠安貧守靜奉公抗直旁觀知己志不自營年方六十室無妻子臣欲言於官人申其屈滯協必苦執其貞退立志難奪謂東南之遺寶矣伏惟陛下未明求衣思賢如渴爰發明詔各舉所知臣識



非許郭雖無知人之鑒若等無言懼貽蔽賢之咎昔  
孔愉表韓績之才庾亮薦翟湯之德臣雖未齒二臣  
協實無慚兩士卽召拜通直散騎侍郎兼中書通事  
舍人

周弘正爲國子博士侯景之亂陷於臺城王僧辯得  
之甚喜卽日啓元帝帝手書與弘正曰獯醜逆亂寒  
暑亟離海內相識零落畧盡韓非之智不免秦獄劉  
歆之學猶弊亡新音塵不嗣每以耿灼當訪東山而  
尋子雲望關西而求伯起遇有今信力附相聞遲此  
來郵慰其延佇仍遣使迎之謂朝士曰晉氏平吳喜  
獲二陸今我破賊亦得兩周今古二時足爲連類及  
弘正至禮數甚優朝臣無可與比者授黃門侍郎直  
侍中省初弘正弟弘直爲衡陽內史帝在江陵遺弘  
直書曰適有都信賢兄博士平安但京師縉紳無不  
附逆王克已爲家臣陸緬身充卒伍唯有周生確乎  
不拔言及西軍潺湲掩淚嘗思吾志如望歲焉松栢  
後凋一人而已

陳文帝卽位尊重特進左光祿大夫王冲嘗從幸司  
空徐度宅宴延之帝賜以几杖其見重如此  
虞寄爲陳寶應所獲寶應誅文帝勅都督章昭達以



禮發遣令寄還朝及至日引見謂寄曰管寧無恙其  
懈勞之懷若此

虞荔爲太子中庶子領大著作以母卒臺城陷情禮  
不申終身蔬食布衣有疾文帝數往臨視令將家口  
入省荔以禁中非私居之所乞停城外帝不許乃令  
住於蘭臺乘輿再三臨問手詔中使相望於道又以  
荔蔬食積久非羸疾所堪乃勅曰能敦布素乃當爲  
高卿年事已多氣力積減方欲仗委良須克壯今給  
卿魚肉不得固從所執也荔終不從

宣帝時司馬暠初仕梁爲太子庶子江陵陷入周大  
建八年自周還朝帝特降殊禮賞錫有加除宜都王  
府諮議叅軍事

後主時姚察爲太子僕射先是察父僧坦入于長安  
察蔬食布衣不聽音樂至是凶問因聘使致江南時  
察母常氏喪制始除帝以察羸瘠慮加毀頓乃遣中  
書舍人司馬申就宅發哀仍勅申專加譬抑爾後又  
遣申宣旨誠諭曰知哀毀過禮甚用爲憂卿然一  
身宗奠是寄毀而滅性聖教所不許宜微自遣割以  
存禮制憂懷旣深故有此及尋以忠毅將軍起兼東  
宮通事舍人察志在終喪頗有陳讓並抑而不許俄



勅知著作郎服闋除給事黃門侍郎領著作察既累  
憂服兼齋素日久自免憂後因加氣疾帝嘗別召見  
察柴瘠過甚爲之動容乃謂察曰朝廷惜卿卿宜自  
惜既蔬菲歲久可停持長齋又遣度支尚書王瑗宣  
旨重加慰之令從晚食手勅曰卿羸瘠如此齋菲累  
年不宜一飯有乖將攝若從所示甚爲佳也察雖奉  
此勅而猶敦宿誓

北齊高祖爲東魏丞相天平初遷鄴是時詔下三日  
戶四十萬狼狽就道收百官馬尚書丞郎已下非陪  
從者盡乘驢高祖以黃門侍郎嘗累清貧特給車牛  
四乘妻孥方得達鄴

高昂爲軍司大都督統七十六都督高祖每申令三  
軍嘗鮮卑語昂若在列則爲華言昂嘗詣相府掌門  
者不聽昂怒卧弓射之高祖知而不責

好賢

夫君人者勤於求賢逸於得人故游放之才絕而繫  
維之詠作矣所以稽五嘗之本成百官之務若乃招  
致英雋物色隱淪疇咨之旨惟勤登顯之用靡懈故  
有體貌尤異恩寵隆渥參對則喜見顏色言議則事  
必從允故可以風起飈至猶有四方之傑矣重器斯



在國柄必治故史云得士則重失士則輕用斯道者其有功歟

蜀先主東征敗績獠亭之西太守閻芝發諸縣兵五

千人以補遺闕遣漢昌長史馬忠送往先主已還未

安見忠與語謂尚書令劉巴曰雖亡黃權復得狐篤

此為世不乏賢也

忠少養外家姓狐名篤後乃復姓馬改名忠

吳大帝赤烏中顧譚為左節度雅性亮高不修意氣

或以此望之然權鑒其能見待甚隆數蒙獎賜特見

召請

宋文帝元嘉初徵戴顓為通直郎散騎嘗侍皆不起

帝每欲見之嘗謂黃門侍郎張敷曰吾東巡之日當

讌戴公山也

戴公居黃鵠山

明帝既即位才學之士多蒙引進參侍文籍應對左

右

順帝昇明初以司空長史謝朓衛軍長史江革中書

侍郎褚炫武陵王文學劉侯入直省參侍文義號為

四友

南齊太祖霸府初開賓客輻輳帝留意簡接虞玩之

與樂安任遐俱以應對有席上之美齊名見遇

張融為中書郎太祖為太尉特奇愛融與融款接見



融嘗笑曰此人不可無一不可有二卽位後手詔賜融衣曰見卿衣服已故誠乃素懷有本交爾藍縷亦虧朝望今送一通故衣意謂雖故乃勝新是吾所著已今裁減稱卿之體并履一量

宋高祖天監初到沅爲征虜主簿帝初臨天下收拔賢俊甚愛其才

徐勉仕齊爲領軍長史初與長沙宣武王遊高祖深器賞之及義兵至京邑勉於新林謁見高祖甚加恩禮使管書記高祖踐阼拜中書侍郎

周興嗣爲給事中興嗣兩手先患風疸是年又染瘡疾左目盲高祖撫其手嗟曰斯人也而有斯疾手疏治疸方以賜之其見惜如此

簡文帝初臨南徐州時陶弘景居積金東澗帝欽其風素召至後堂與談論數日而去甚敬異之

元帝初爲湘東王蕭介爲吳令聞介名思共遊處表請爲諮議參軍又與裴子野劉顯蕭子雲張績及當時才秀爲布衣之交帝嘗曰余於諸僧重招提琰法師隱士重華陽陶貞白士大夫重汝南周弘正其於義理清轉無窮亦一時之名士也

後梁明帝好周易集朝臣於清暑殿講詔伏曼容執



經曼容素著風采帝嘗以方嵇叔夜使吳人陸探微  
畫叔夜像以賜之

陳高祖遣文帝平會稽張彪之先是虞荔爲中書舍  
人領大著作侯景陷臺城逃歸鄉里彪平荔時在焉  
高祖遣荔書曰喪亂已來賢哲彫散君才用有美聲  
聞許雜當今朝廷惟新廣求英雋豈可棲遲東土獨  
善其身今令兒子將接出都想必副朝廷虛遲也文  
帝又以書曰君東南有美聲譽洽聞自應朝飛京許  
共康時弊而刻迹丘園保茲獨善豈使稱空谷之望  
也必願便爾儻裝且爲出計唯遲披覲在於茲日追  
切之不得已乃應命至都

宣帝輔政時大著作許亨初爲王僧辯從事僧辯死  
亨抗表請葬之帝以亨貞正有古人之風甚相欽重  
嘗以師禮事之

後主時司徒左西掾兼東宮學士陸從典丁父憂去  
職尋起爲德教學士固辭不就後主勅留一員以待  
從典

北齊文宣時顏之推自東來奔帝見而悅之卽除奉  
朝請於內館中侍從左右頗被顧盼

獎善



周書曰人之有技若已有之人之彥聖其心好之斯樂善之謂也自鼎國三分江表建號受終傳繼歷載三百曷嘗不欽尚豪英推獎孝秀崇德以宣教賞儔以聳善敦尚文雅周旋褒異至於碁奕之工筆札之妙亦皆稱焉斯固菁莪育材之旨砥石礪世之行將使學文之士研精而不墮執藝之流服勤而競勸蓋興化美俗之要道歟

吳大帝時朱異為揚武將軍帝與論攻戰辭對稱意帝謂異從父驃騎將軍據曰本知季文異之字快定見

之復過所聞

顧譚赤烏中代諸葛恪為左節度譚初踐官府上疏陳事大帝輟食稱善以為過於徐詳

顧承丞相雍之孫也嘉禾中與舅陸瑁俱以禮徵大帝賜雍書曰貴孫子直子直承字也令聞休休至與相見

過於所聞為君嘉之拜為騎都尉領羽林兵

宋文帝嘗云天下有五絕而皆出錢唐謂杜道鞠彈琴范悅持楮欣遠模書褚裔圍棋徐道度療疾也桓護之隨到彥之北伐彥之將迴師護之為書諫不納文帝聞而善之以輔江夏王義恭征北行參軍北

高平太守



孝武時謝超宗爲新安王子鸞國嘗侍王母殷淑儀  
卒超宗作誄奏之帝大嗟賞曰超宗殊有鳳毛恐靈  
運復出

南齊太祖時劉善明爲冠軍將軍沈攸之及善明料  
其必敗事平太祖石善明還都謂之曰卿策沈攸之  
雖復張良陳平適如此耳

武帝時王廣之爲前將軍帝見廣之子琠國謂廣之  
曰珍國應不堪事卿可謂老蚌廣之曰不敢辭

梁武帝時劉孝綽爲廷尉卿坐携妾入官府免職後  
帝數使僕射徐勉宣旨慰撫之每朝宴嘗引焉及帝

爲籍田詩又使勉先示孝綽時奉詔作者數十人帝

以孝綽尤工卽日有勅起爲西中郎湘東王諮議後

爲水部郎帝雅好蟲篆時因宴幸命沈約任昉等言

志賦詩孝綽亦見引嘗侍宴於坐賦詩七首帝覽其

文篇篇嗟賞繇是朝論改觀焉

張率爲司徒掾直文德嘗作待詔賦奏之武帝甚見

稱賞手勅答曰省賦殊佳相如工而不敏枚臯速而

不工卿可謂兼二子於金馬矣又侍宴賦詩帝乃勅

賜率詩曰東南有才于故能服官政余雖慙古昔得

人今爲盛率奉詔往返數首



蕭介博涉經史善屬文初武帝招延後進二十餘人  
置酒賦詩滅盾以詩不成罰酒一斗盾飲盡顏色不  
變自若介染翰便成文無加點帝兩美之曰滅盾之  
飲蕭介之文即席之美也

到蓋左民尚書漑之孫歷尚書殿中郎嘗從武帝幸  
京口登北顧樓賦詩蓋受詔便就帝覽以示漑曰蓋  
是才子讎恐卿從來文章假手於蓋因賜漑連珠曰  
研磨墨以騰文筆飛豪以書信如飛蛾之赴火豈焚  
身之可吝必耄年其已及可假之於少蓋

賀琛為臨川王祭酒從事史琛始出都武帝聞其學  
術召見文德殿與語悅之謂僕射徐勉曰琛殊有世  
業仍補王國郎俄並太學博士

蕭子雲與其子特俱善草隸武帝嘗謂子雲曰子敬  
之書不及逸少近見持迹遂逼於卿

江子一起家王國侍郎請啓求觀書秘閣武帝許之  
有勅直華林省

羊侃為北伐大將軍武帝製武宴詩四十韻以示侃  
即席應詔帝覽曰吾聞仁者有勇今見勇者有仁可  
謂鄒魯遺風英賢不絕

江紆幼有孝性年十三父倩患眼紆侍疾將暮月衣



不解帶夜夢一僧云患眼者飲慧眼水必差及覺說之莫能解者經第三叔祿與草堂寺智者法師善往訪之智者曰無量壽經云慧眼見真能渡彼岸舊乃因智者啓捨同夏縣界牛屯里舍爲寺乞賜嘉名勅答云純臣孝子往往感應晉世顏舍遂見冥中送藥近見智者知卿第二息感夢云慧眼水慧眼則是五眼之一號若欲造寺可以慧眼爲名及就創造泄故井井水清冽異於常泉依夢取水洗眼及煮藥稍覺有瘳因此遂差時人謂之孝感

王子雲太原人及江夏費昶並爲閭里才子昶善爲樂府又作鼓吹曲武帝重之勅曰才意新拔有足嘉異昔郎憚博物下蘭巧辭束帛之賜寔惟勸善可賜絹十疋

司馬暲父子產武帝外兄暲年十二丁內艱毀瘠骨立服闋以姻戚子弟預入問訊帝見暲羸瘦歎息良久謂其父子產曰昨見羅兒尚奇顛預使人惻然便是不墜家風爲有子矣羅兒卽暲小字也

江總爲尚書殿中郎中武帝撰正言始畢製述懷詩總預同此作帝覽總詩深降嗟賞

虞寄起家宣城王國左嘗侍大同中嘗驟雨殿前往



往有雜色寶珠武帝觀之甚有喜色寄因上瑞雨頌  
帝謂寄兄荔曰此頌典裁清拔卿之士龍也

元帝時徐陵子儉爲尚書金部郎中嘗侍宴賦詩帝  
歎賞曰徐氏之子復有文焉

陳宣帝時徐孝克爲通直散騎嘗侍兼國子祭酒孝  
克每侍宴無所食噉至席散嘗見其前膳損減帝密  
記以問中書舍人管斌斌不能對自是斌以意伺之  
見孝克取椀果內紳帶中斌當時莫識其意後更尋  
訪方知還以遺毋斌以實啓帝帝嗟嘆良久乃勅所  
司自今宴享孝克前饌並遺將還以餉其毋時論美  
之

後主時姚察爲吏部尚書後主所製文筆卷軸甚多  
乃別寫一本付察有疑悉令刊定察亦推心奉主事  
無所隱後主嘗從容謂朝士曰姚察達學洽聞手筆  
典裁求之於古猶難輩匹在於今世足爲師範且訪  
對不休聽之使人忘倦察每製文筆勅便索本嘗曰  
我于姚察文章非唯翫味無已故是哲匠

養老

養老之道三王以前尚矣自皇綱解紐餘分閭位雖  
乞言孝弟之義不行於庠序而誦恭加惠之典尚及



於鄉黨其間以兵威相熾禮用遼變至於因事存闕以時優給假之爵秩異其服玩亦有國之令猷也

宋孝武帝大明七年二月車駕巡南豫南兗二州詔歷陽郡高年加以羊酒十二月行幸歷陽郡賜高年帛

南齊武帝永明七年正月詔曰諸大夫年秩隆重祿力殊薄豈所謂下車惟舊趨橋敬老可增俸詳給見役

明帝建武元年十二月詔曰日者百司耆齒許以自陳東西二省猶沾微俸辭事私庭榮祿兼謝興言愛老寔有矜懷自今縉紳年及可一遵永明七年以前銓敘之科先是永明中御史中丞沈淵表百官年登七十者皆令致仕並窮困私門故有是詔東魏孝靜帝天平三年十二月遣使者板假老人官百歲已下各有差

北齊文宣帝天保九年七月給京畿老人劉奴等九百四十三人版職及杖帽各有差

孝昭帝皇建元年八月卽位大赦改元諸郡國老人各受版職賜黃帽几杖

文帝元嘉初沈道慶吳興武康人仁愛好老易郡州



府十二命皆不就文帝聞之遣使存問賜錢米

范泰元嘉中爲侍中領江夏王師文帝以泰先朝舊臣恩禮甚重以有脚疾起居艱難宴見之日特聽乘輿到坐累陳時事每優游之

王悅之爲黃門郎御史中丞明帝以其廉介賜良田五頃

後廢帝元徽中徵廬山隱居雷次宗至京授給事不就而還其後復詔散騎侍郎徵詣京邑爲築室於鍾山西巖下謂之招隱館使爲皇太子諸王講喪服經次宗不入公門乃使自華林東門入延賢堂就學

南齊太祖初爲領軍時謝超宗爲義興太守坐公事免詣東府門自通其日風寒慘厲帝謂四坐曰此客至使人不衣自燠矣超宗旣坐飲酒數甌詞氣橫出太祖對之甚歡拔爲諮議

顧歡少有高行太祖初徵詣京師及東歸賜以麈尾素葉

褚伯玉隱居剡之瀑布山三十餘年隔絕人物不就徵聘太祖卽位手詔吳會二郡以禮迎遣又辭疾帝不欲違其志勅於剡中立太平館以居之



其

其

其

册府元龜

巡按福建監察御史臣李嗣京訂正

知長樂縣事臣夏允彝參閱

知建陽縣事臣黃國琦較釋

閩位部

二十六

恩宥

書曰文王作罰刑茲無赦故有國者哀其下民觸法抵禁乃有赦焉益與人更始而開自新之路也自吳蜀創國江左建號或易姓革命之始出師飲至之辰

册府元龜 閩位部



日蝕地震之變立後封子之慶莫不推恩肆膏以流  
惠澤乃有一歲至于再三者此又數而失中非御民  
之術也諸葛武侯有云劉景升季玉父子歲歲赦宥  
何益於治斯實鉅賢嘉話可垂世而為戒矣

蜀先主章武元年四月丙午即皇帝位於成都武擔  
之南是月大赦改元

後主建興元年五月襲位於成都大赦改元

延熙元年正月立皇后張氏大赦改元

六年十一月大赦臣欽若等曰自此已下不  
書降赦因依者史氏闕文

九年秋大赦臣欽若等曰自此已下  
不書月者史氏闕文

十二年四月大赦

十四年冬大赦

十七年正月大赦

十九年元子璿為新平王大赦

二十年大赦

景耀元年史官言景星見於是大赦改元

四年十月大赦

炎興元年夏大赦改元

吳大帝權黃武三年八月赦死罪

黃龍元年四月丙申南郊即皇帝位是日大赦改元



三年十二月丁卯大赦改明年元為嘉禾

嘉禾二年正月詔曰朕不以德肇受元命夙夜兢兢

不遑假寢思平世難救濟黎庶上答神祇下慰民望

是以眷眷勤求俊傑將與戮力共定海內苟在用心

與之借老今使持節督幽州領青州牧遼東太守燕

王公孫久脅賊虜隔在一方雖乃心於國其路靡緣

今因天命遠遣二使欵誠顯露章表殷勤朕之得此

何幸如之雖湯遇伊尹周獲呂望世祖未定而得河

右方之今日豈復是過普天一統於是定矣書不云

乎一人有慶兆民賴之其大赦天下與之更始其明

下州郡咸使聞知特下燕國奉宣詔恩令普天率土

備聞斯慶

赤烏三年四月大赦

五年正月立子和為太子大赦

八年八月大赦

十年十月赦死罪

大元元年五月立皇后潘氏大赦十一月大赦

神鳳元年二月大赦改元

廢帝亮建興元年四月即尊號大赦改元

二年十月大饗武衛將軍孫峻伏兵殺大將軍諸葛



格於殿堂大赦

太平元年十一月己酉大赦改元

二年四月臨正殿大赦始親政事

九月甲申大赦時吳侯基在內盜乘御馬收伏獄亮問侍中刁玄曰盜乘御馬如何玄對曰科應死然魯王早終惟陛下哀原之亮曰法者天下所共何得阿以親親故耶當思惟可以釋此者奈何以情相逭乎玄曰舊赦有大小或天下亦有千里五百里赦隨意所及亮曰解人不當爾耶乃赦宮中基以得免

景帝休永安元年十月卽位初御正殿大赦改元

五年八月戊子立子暉爲太子大赦

七年正月大赦七月壬午大赦

後主皓元興元年七月嗣位大赦改元

甘露元年四月蔣陵言甘露降於是改年大赦

寶鼎元年八月所在言得大鼎於是改年大赦

二年春大赦

建衡元年十月大赦

二年大赦

三年監軍虞汜蒼梧太守陶璜破交趾擒殺晉所置守將九貞日南皆還屬大赦



鳳皇元年八月樂鄉都督陸抗平西陵取步闡大赦  
二年九月改封淮陽爲魯東平爲齊又封陳留等九  
王凡十一王大赦

天冊元年吳郡言掘地得銀長一尺廣三分刻上有  
年月字於是大赦改元

天璽元年吳郡言臨平湖自漢末草穢壅塞今更開  
通長老相傳此湖塞天下亂此湖開天下平又於湖  
邊得石函中有小石青白色長四寸廣二寸餘刻上  
作皇帝字於是改元大赦

天紀二年七月立成紀等十一王大赦

四年春立中山代等十一王大赦

宋高祖永初元年六月旣受晉禪設壇于南郊告天  
禮畢備法駕幸建唐宮臨太極前殿詔曰夫世代迭  
興承天統極雖遭遇異途因革殊事若乃功濟區宇  
道振生民興廢所階異世一揆朕以寡薄屬當艱運  
籍否終之期因士民之力用獲拯溺救世撥亂寧民  
業未半古功參曩烈晉氏以多難仍遭歷運已移欽  
若前王憲章令軌用集大命于朕躬惟德匪嗣辭不  
獲申遂祇順三靈饗茲景祚燔柴于南郊受終于文  
祖猥當與能之期爰集樂推之運嘉祚肇開隆慶惟



始思俾休嘉惠茲兆庶其大赦天下改晉元熙二年為永初元年賜民爵二級鰥寡孤獨不能自存者人穀五斛逋租宿債勿復收其有犯鄉論清議賊汙淫盜一皆蕩滌洗除與之更始長徒之身特皆原遣亡官失爵禁錮奪勞一依舊準

八月立王太子義符為皇太子詔曰朕承曆受終猥饗大命荷積善之祚藉士民之力七廟備文率繇令範先後祇嚴獲遂宣訓蒸嘗肇建情敬無違加以備宮備禮皇基彌固國慶家禮爰集旬日豈予一人獨荷茲慶其見刑罪無輕重可悉原赦限百日以今為始先因軍事所發奴僮各還本主若死亡及勲勞破免亦依限還直

二年正月辛酉親祠南郊大赦天下

三年正月甲辰朔制罪無輕重悉皆原降四月己未帝以疾瘳大赦天下

少帝以永初三年五月癸卯即位大赦

景平元年正月己亥朔大赦改元文武進位二等七月以旱詔赦五歲以下罪人

文帝元嘉元年八月丁酉於中堂即皇帝位大赦改元文武賜位二等逋租宿債勿復收



二年正月丙寅親祠南郊大赦天下

三年正月荊州刺史謝晦反帝親率六師西征大赦

天下閏正月丙戌皇子邵生二月乙卯繫囚見徒一

皆原赦

四年正月乙亥朔曲赦都邑百里內二月行幸丹徒

三月丙子詔丹徒五歲刑以下皆悉原遣

六年三月丁巳立皇子劭為皇太子戊午大赦天下

賜文武位一等

八年六月乙丑大赦天下

十年正月己未大赦天下孤老六疾不能自存者人

賜穀五斛七月曲赦益梁秦三州

十一年四月梁秦二州刺史蕭思和破氏楊難當梁

州平五月丁卯曲赦梁南秦二州劔閣北

十二年正月辛酉大赦天下

十三年三月己未司空江州刺史檀道濟有罪伏誅

庚申大赦天下

十四年正月辛卯親祠南郊大赦天下文武賜位一

等孤老六疾不能自存者人賜穀五斛

十六年十二月乙亥皇太子冠大赦天下

十七年十月戊子前丹陽尹劉湛有罪伏誅大赦天



下文武賜爵一級

十九年四月甲戌帝以久疾始奉禘祀大赦天下

二十一年正月己亥大赦天下詔諸逋債在十九年

以前一切原除去歲失收者疇量申減尤弊之處遣

復就郡縣隨宜賑卹凡欲附農而糧種匱乏者並加

給貸

二十三年四月丁未大赦天下

二十四年正月甲戌大赦天下文武賜位一等囚繫

降宥逋負寬減各有差孤老六疾不能自存者人賜

穀五斛

二十六年二月車騎駕幸丹徒謁京陵二月丁巳詔

日朕違北京二十餘載雖云密邇瞻塗莫從今因四

表無塵時和歲稔復獲拜奉舊塋展罔極之恩饗諫

故老申追遠之懷固以義兼於桑梓情加於還沛永

言慷慨感慰實深宜聿仁惠覃被率土其大赦天下

復丹徒縣僑舊今歲租布之半所經縣蠲田租半年

二千石官長並勤勞王務宜有霑錫登城三戰及大

將戰亡之家老病單弱者普加贍卹遣使巡行百姓

問所疾苦孤老鰥寡六疾不能自存者人賜穀五斛

二十七年十一月丁未以魏軍來侵大赦天下



二十八年十一月壬寅曲赦二交徐豫青冀六州  
孝武帝以元嘉三十年正月自武陵王舉兵向闕誅  
元凶劭四月己巳卽位於新亭大赦天下文武賜爵  
一等從軍者二等賊汙清議悉皆蕩除高年鰥寡孤  
幼六疾不能自存者人賜穀五斛逋租宿債勿復收  
長徒之身優重降宥五月克定京邑元凶劭及諸同  
逆伏誅甲午曲赦京邑二百里內竝蠲今年租稅  
孝建元年正月己亥朔親祠南郊改元大赦天下七  
月丙申朔日蝕丙辰大赦天下文武賜爵一級逋租  
宿債勿復收

二年六月甲子以國哀除釋大放天下  
九月詔曰國道再屯艱虞畢集朕雖寡德終膺鴻慶  
推新之祉實深百王而惠宥之令未殊嘗渥永言勤  
慮寤寐載懷在朕受命之前凡以罪徒放悉聽還本  
犯釁之門尚有存者子弟可隨才署吏  
三年正月壬子立皇太子妃何氏甲寅大赦天下  
大明元年正月辛亥朔改元大赦天下賜高年孤疾  
粟帛各有差

二年六月丙申詔曰往因師旅多有逋亡或連山染  
逆懼致軍憲或辭後憚勞苟免刑罰雖約法從簡務



思弘宥恩令驟下而逃伏猶多豈習愚爲性征惡難  
反將在所長吏宣導乖方可普加寬申咸與更始

三年七月己巳克廣陵斬竟陵王誕辛未大赦天下

臣欽差等曰誕爲司空南兖州刺史有罪  
貶爵誕不受命據廣陵城友至是誅之

四年正月乙亥躬耕籍田大赦天下尚方繫囚及逋  
租宿債大明元年以前一皆原除力田之民隨才叙  
用孝弟義順賜爵一級孤老貧疾人穀十斛籍田有  
司優加霑賚百姓糧種隨宜貸給下二月辛巳幸廷  
尉寺凡囚繫咸悉原遣丁未幸建康縣原放獄囚

五年二月癸巳闕武詔曰頃化弗能孚而民未知禁  
違役遣調起觸刑網凡諸逃亡在昧爽以前悉皆原  
散已滯囹圄者釋還本役近籍新制在所承用殊謬  
寔多可普更符下聽以今爲始若先已犯制亦同蕩  
然

七月曲赦雍州九月行幸琅邪郡囚繫悉原遣

六年正月辛卯親祠南郊是日又崇祀明堂大赦天  
下

七年二月帝巡南豫南兖二州壬戌詔曰朕受天慶  
命十一年於茲矣憑七廟之靈獲上帝之力禮橫四  
海威震八荒方巡三湘而奠衡嶽祀九河而簡云岱



今恢覽功成省風畿表觀臺六合蒐較長州騰砂飛  
礫振嶽盪海星鳥合序攝提協節入獻鬯典鑑獸項  
郊敬舉王公之觴廣納士民之壽八風循通卿雲業  
聚盡天罄瑞率宇竭歡思散太極之泉以福無方之  
外可大赦天下

十一月帝在南豫州丙子赦本州殊死以下巡幸所  
經詳減今歲田租

十二月丙午行幸歷陽甲寅大赦天下南豫州別署  
勅繫長徒一切原散其兵期考襲謫戍悉停

臣欽若  
等日考

謂考課襲  
謂襲爵也

前廢帝以大明八年閏五月庚申即位大赦天下

永光元年正月乙未朔改元大赦天下

景和元年九月親討徐州刺史義陽王昶昶奔於魏  
十月癸亥曲赦徐州而還

十一月壬寅立皇后路氏四廂奉樂赦楊南徐二州  
丁未皇子生少府劉勝之子也大赦天下賊汙淫盜  
悉皆原除賜為父後者爵一級

明帝泰始元年十二月丙寅即皇帝位詔曰高祖武  
皇帝德洞四瀛化綿九服太祖文皇帝以大明定基  
世祖孝武皇帝以下武寧亂日月所炤梯山航海風



雨所均削祗襲帶所以業固盛漢聲溢隆周子業凶

匿自天忍悖成性

子業即廢帝也

人面獸心見於髻日反道

敗德著自比年其狎侮五嘗怠棄三正矯誣上天毒

流下國開闢所未有書契所未聞再羅過密而無一

日之哀齊斬在躬方深北里之樂虎兇難押馮河必

彰遂誅滅上宰躬釁逆之酷虐害國輔究孥戮之刑

子鸞同生以昔憾放殄敬猷兄弟以睚眦殲夷徵逼

義陽將加屠膾陵辱威藩擢楚妃主奪立左右竊子

置儲肆醜于朝宣淫于國事穢東陵行汗飛表積釁

罔極日月滋深比遂圖犯玄官志窺題奏將肆梟獍

之禍騁商頤之心又欲鳩毒崇憲虐加諸父事均官

聞聲遍國都而鳴梟小豎莫不寵暱朝廷忠誠必也

戮挫收掩之旨虓虎結轍掠奪之使白刃相望百寮

危氣首領無有全地萬姓摧心妻子不復相保所以

鬼哭山鳴星鈎血降神器殆於馭索景祚危於綴旒

朕假寐凝憂泣血待旦慮太宗之基於焉而泯武王

之業將墜于淵賴七廟之靈籍八代之慶巨滑斯殄

鴻沴將褰皇綱絕而復紐天緯缺而更張猥以寡薄

屬承乾統上緝三光之重俯顧庶民之難業業矜矜

若履氷谷思與億兆同此維新可大赦天下改景和



元年爲泰始元年賜民爵二級鰥寡孤獨不能自有者穀人五斛逋租宿債勿復收犯鄉論清議賊汙淫盜竝悉洗除長徒之身特賜原遣亡官失爵禁錮舊勞一依舊典其昏制謬封竝皆刊削

二年正月吳郡太守顧琛吳興太守王曇生義興太守劉延與晉陵太守袁標山陽太守程天祚竝舉兵反二月曲赦吳郡吳興義興晉陵四郡晉陵平癸未曲赦浙江東五郡

三月癸丑曲赦揚南徐二州囚繫凡逋亡一無所問四月丁酉曲赦豫州

八月建安王休仁討江郢荆雍湘等五州平定之晉安王子勛等竝賜死同黨皆伏誅九月乙酉曲赦江郢荆雍湘五州守宰不得離職癸丑六軍戒嚴大赦天下賜民爵一級

十月戊寅立皇太子昱爲皇太子曲赦揚徐二州十二月乙丑詔曰近衆藩稱亂多桀黷科或誠係本朝事緣逼迫混同證錮良以悵然夫天道尚仁德刑竝用雷霆時至雲雨必解朕眷言靜念思弘風澤凡應禁削皆從原蕩其文武堪能隨才銓用

三年正月癸卯曲赦豫州南豫二州二月丙申曲赦



冊序元美

恩宥

卷之三十七

青冀二州

八月癸卯詔曰法網之用期世而行寬惠之道因時

而布光朕尚德戡亂依仁馭俗是宜每就弘簡以隆

至治而頻罹兵革繇賦未休軍民巧偽興事甚多踰

刑入憲諒非一科至乃假名戎伍竊爵私庭因戰散

亡託懼逃後且往者淪逼雖經累宥逋竄之黨猶為

寔繁宵言永懷良蕪矜疚思所以重播至澤覃被區

宇可大赦天下九月庚午曲赦徐兗青冀四州

四年正月己未親祠南郊大赦天下三月妖賊攻廣

州龍驤將軍陳伯詔討平之五月乙丑曲赦廣州

五年五月躬耕籍田大赦天下賜力田爵一級

六年二月癸丑皇太子納妃甲寅大赦天下巧注

調巧偽注名軍中以免徭役也從軍不在赦例

七年四月辛丑詔減天下死罪一等凡勅繫悉遣之

八月庚寅帝以疾愈大赦天下

後廢帝以秦豫元年四月己亥卽位大赦天下

元徽元年正月戊寅朔改元大赦天下壬寅詔曰夫

緩法昭恩裁風茂典蠲憲伏青訓俗彛義朕臨馭宸

極樞寅制坻寓式存寬簡思孚矜惠今開元肆宥萬

品惟新凡茲遷斥宜均弘洗自元年以前貽罪徙放

冊序元美 閏位部

十四



者悉聽還本

二年五月江州刺史桂陽王休範舉兵反討平之丁

酉詔京邑二縣埋藏所殺竝賊戰亡者復同京城是

日解嚴大赦天下文武賜位一等

十一月帝加元服大赦天下賜民男子爵一級為父

後及三老孝悌力田者爵二級鰥寡孤獨篤癘不能

自存者穀人五斛年八十以上加帛一疋大酺五日

賜王公以下各有差

四年正月己亥躬耕籍田大赦天下賜力田爵一級

貸貧民糧種七月南徐州刺史建平王景素據京師

反乙未克京城斬景素其日解嚴丙申大赦天下封

賞各有差原放京邑縣元年以前連調

五年六月甲戌誅司徒左長史沈勃等大赦天下

若等曰勃多寶貨帝住切而 誅之事具閏位部暴虐門

順帝昇明元年七月壬辰即位改元大赦天下賜文

武位二等十二月荊州刺史沈攸之等舉兵反司徒

袁粲據石頭尚書令劉秉赴之甲戌大赦天下

二年二月沈攸之平曲赦荊州十一月壬寅立皇后

謝氏減死罪一等五歲刑以下悉原

南齊太祖建元元年四月甲午受禪南郊禮畢大駕



還宮臨太極前殿詔曰五德更紹帝迹所以代昌三  
正迭隆王度所以改耀世有質文時或因革其資元  
膺歷經道振民固以異術同揆殊流共貫者矣朕以  
寡昧屬值艱季推肆勤之誠籍樂治之數賢能悉心  
士民致力用獲拯溺龕略一正天下業未參古功殆  
侔昔宋氏以陵夷有徵曆數攸及思弘樂推永鑒崇  
贊爰集天祿于朕躬惟志菲薄辭弗獲命遂欽從爾  
之曆數式昭景命祗受正于文祖升禋幣于上帝天  
以寡德光宅四海纂華代之蹤託王公之上若涉猥  
水罔知所濟寶祚初啓洪慶惟新思俾利澤宣被淵  
億兆可大赦天下改宋昇明三年爲建元元年賜民  
爵二級文武位二等鰥寡孤獨不能自存者人殺五  
斛逋租宿債勿復收有犯鄉論清議贓汙盜淫一皆  
蕩滌除先注與之更新長徒勅繫之囚特皆原遣亡  
官失爵禁錮舊勞一依舊典又詔曰宸運肇創寶命  
惟新宜弘慶宥廣敷蠲貸劫賊餘口沒在臺府者悉  
原放諸負釁流徙竝聽還本

六月甲申立皇太子見刑入重者降一等竝申前赦  
恩百日七月詔曰交趾北景獨隔書朔斯乃前運方  
季負海不朝因迷遂往歸款莫繇曲赦交州部內李



叔獻一人卽撫南土文武詳才選用竝遣大使宣揚  
朝恩以試守功武平太守行交州府事李叔獻爲交  
州刺史

二年正月戊戌朔大赦天下六月癸未詔昔歲水旱  
曲赦丹陽二吳義興四郡遭水尤及之縣元年以前  
三調未克虛歷已畢官長局吏應供償備外詳所除  
宥

三年六月壬子大赦時豫章王嶷發江陵有疾至京  
師未瘳帝憂慮爲之大赦

四年二月帝不豫庚辰詔原京師囚繫有差

世祖武帝以建元四年三月壬戌卽位大赦

六月甲申立皇太子長懋詔申癸酉赦恩百日

永明元年正月辛亥祠南郊大赦改元三月丙申詔

曰朕自丁荼毒奄更周忌瞻言負荷若墜淵壑而遠

圖尚蔽政刑未洽星緯失序陰陽愆度思播光澤兼

酬天肯可申辛亥赦恩五十日以期訖爲始京師囚

繫悉皆原宥三署徒優量降遣都邑鰥寡尤貧詳加

賑卹戊寅詔曰方見囚罪無輕重及劫賊餘口長徒

勅繫悉皆原赦六月丙寅詔凡坐事應復治者在建

元四年三月以前皆原



二年八月丙午詔申京師獄及三署見徒量所降宥  
三年正月辛卯祠南郊大赦都邑三百里內罪應入  
重者降一等餘依勅制劾繫之身降遣有差贖卹二  
縣貧民  
四年閏正月辛亥躬耕籍田詔曰思俾休和覃茲黔  
皁見刑罪殊死以下悉原宥

五年四月殷祀太廟詔繫囚見徒四歲刑以下悉原  
遣五年減爲三歲京邑罪身應入量降一等

六年正月壬午詔二百里內獄同集京師克日聽覽  
自此以外委州郡訊察三署徒隸詳所原釋

七年正月辛亥祠南郊大赦京邑貧民普加賑賜

八年七月癸卯詔曰陰陽舛和緯象愆度儲官嬰患  
淹歷旬晷思仰祗天戒俯紓民瘼可大赦天下

九年正月辛丑祠南郊詔京師見繫囚詳量原遣  
十一年正月癸丑詔京師見繫囚詳所原遣

鬱林王隆昌元年正月丁未改元大赦

海陵王延興元年七月丁酉卽帝位詔曰太祖高皇  
帝英謨光大受命作齊世祖武皇帝宏略冠世繼暉  
下武世宗文皇帝清明懿鑠四海宅心竝德漏下泉  
功昭上象聲教所覃無思不洽洪基式固景祚方融



而天步多阻運鍾否剝嗣君昏恐暴戾滋多侮棄天經悖滅人紀朝野重足遐邇側視民怨神恫宗祧如綴賴忠謨肅舉霄漢廓清俾三后之業絕而更紐七百之慶危而復安猥以中人入纂乾緒載懷馭朽若墜諸淵思與黎元共綏戩福大赦改元文武賜位一等

明帝建武元年十月癸亥即帝位詔曰皇齊受終建極握鏡臨宸神教重輝欽明懿鑠七百攸長盛石斯固而王度中愆天階薦阻嗣命多違潘釁孔棘宏圖景曆將墜諸淵宣德皇后遠鑒崇替憲章舊典疇終

台揆允定靈策用集寶命命予一人猥以虛薄纘戎大業仰繫鴻丕顧臨億兆永懷先構若履春冰寅憂夕揚罔識攸濟思與萬國播此惟新大赦天下改元宿衛者晉轉一階其餘文武賜位二等逋租宿債換負官物在建武元年以前悉皆除放劫盜餘口在臺府者可悉原放負釁流徙竝還本鄉

二年正月辛未詔京師繫囚殊死可降爲五歲刑三署見徒五歲以下悉原放十月納皇太子妃褚氏大赦

四年正月庚午大赦



永泰元年正月癸未朔大赦逋租宿債在四年之前皆悉原除四月甲寅改元赦三署囚繫原除各有差文武賜位二等

東昏侯永元元年正月改元大赦四月乙巳立皇太子大赦賜民為父後爵一級八月丙辰振州刺史始安王遙先據東府反曲詔京邑九月壬戌以頰誅大

臣大赦天下

臣欽若等曰大臣謂僕射江祐侍中江祀也

二年四月平西將軍崔慧景於廣陵舉兵襲京師江夏王寶玄以京城納之豫州刺史蕭懿斬惠景詔曲赦京邑南徐兖二州

三年正月辛亥祀南郊大赦天下三月戊子曲赦江州安城廬陵二郡為蕭穎孚起兵廬陵七月癸巳曲赦荆雍二州

和帝初封南康王為荊州刺史永元二年十一月南雍州刺史蕭衍奉王舉義於江陵乃下敕曰吾躬率晉陽翦此凶孽戎事方勤宜覃惠澤所領繫囚見徒

罪無輕重殊死以下皆原遣先有位署即復本職將吏轉一級從征身有家口停鎮給廩食諸雜役見在諸軍帶甲之身克定之後悉免為民其功効賞報別

有科條



册府元龜

恩宥

卷之三百七

三年正月乙巳王受宣德太后命為宣王相國大赦  
唯梅虫兒茹法珍等不在赦例

中興元年三月即帝位于江陵改元大赦

册府元龜

册府元龜

巡按福建監察御史臣李嗣京 訂正

分守建南道左布政使臣胡維霖 叅閱

知建陽縣事 臣黃國琦較釋

閏位部 二十七

恩宥第二

梁高祖初平東昏為大司馬錄尚書事入屯闕武堂  
下詔曰皇家不造遭此昏凶禍延動植虐被人鬼社  
廟之危蠢焉如綴吾身藉皇宗曲荷先願受任邊疆  
推轂萬里眷言瞻烏痛心在目故率其尊主之情屬

册府元龜 閏位部



其忘生之志雖寶曆重升明命有詔而獨夫醜縱方  
煽京邑投袂授戈克弭多難虐政橫流爲日旣久同  
惡相濟諒非一族仰稟朝命任在專征思播皇澤被  
之率土凡厥負釁咸與惟新可大赦天下唯王咥之  
等四十一人不在赦例又令曰夫樹以司牧非役物  
以養生視民如傷豈肆上以縱虐廢主棄嘗自絕宗  
廟窮凶極悖書契未有征賦不一苛酷滋章緹繡土  
木菽粟犬馬徵發間左以充繕築流離寒暑繼以疫  
癘轉死溝渠曾莫收恤朽肉枯骸烏鳶厭食加以天  
災人禍屢焚宮掖宮府臺寺尺椽無遺悲甚忝離痛  
兼麥秀遂使億兆離心彊徼侵弱斯民何辜離此塗  
炭今明昏違運大道公行思治之氓來蘇茲日猥以  
寡薄屬當大寵雖運距中興難同草昧思闡皇休與  
之更始凡昏制謬賦滛刑濫役外可詳簡前源悉皆  
除蕩其主守散失諸所損耗精立科條咸從原例及  
爲梁王又下令曰孤以虛昧任執國鈞雖宿夜勤止  
念在興治而有德振民邈然尚遠聖朝永言舊式隆  
此眷命侯伯盛典方軌首烈嘉錫隆被禮數昭崇徒  
守愿節終隔體諒羣后百司重茲敦獎勉斯厚顏當  
此休祚望昆彭以長想欽桓文而歎息思弘政塗莫



知津濟邦甸初啓藩宇惟新恩覃嘉慶被之下國國  
內殊死以下今月十五日昧爽以前一皆原放鰥寡  
孤獨不能自存者賜穀五斛府州所統亦同蠲蕩  
天監元年四月丙寅卽皇帝位于南郊禮畢備法駕  
卽建康宮臨太極殿前詔曰五精迺襲皇王所以受  
命四海樂推殷周所以改物雖禪代相升遘會異時  
而徵明迭用其流遠矣莫不振民育德光被黎元朕  
以寡闇命不先後寧濟之功屬當期運乘此時來回  
心萬物遂振厥施維天造區夏永言前蹤義均慙德  
蕭氏以代終有徵曆數云改欽若前載集大命于朕  
躬顧惟菲德辭不獲命寅畏上靈用膺景業執禋柴  
之禮當與能之祚繼迹百王君臨四海若涉大川罔  
知攸濟洪基初兆萬品權輿思俾慶澤覃被率土可  
大赦天下改齊中興二年爲天監元年賜民爵一級  
文武位二等深寡孤獨不能自存者人穀五斛逋布  
口錢宿債勿復收其有犯鄉論清議贓汙淫盜一皆  
蕩滌洗除前注與之更始又詔曰大運肇升加慶惟  
始劫賊餘口沒在臺府者悉可蠲放諸流徙之家並  
聽還本鄉

二年五月乙丑益州刺史鄧元起剋成都曲赦益州



三年六月癸未大赦天下

四年正月辛亥新祠南郊赦天下二月壬辰交州刺

史李凱據州反長史李旻討平之曲赦交州

五年十一月乙丑以師出淹時大赦天下

六年八月戊子赦天下

七年四月乙卯皇太子納妃赦大辟以下頒賜朝臣

及近侍各有差八月丁巳赦大辟以下未結正者

八年正月辛巳親祠南郊赦天下内外文武各賜勞

一年

十年正月辛丑親祠南郊大赦天下居局治事賜勞

十一年三月丁巳曲赦揚州徐州

十二年正月辛卯親祠南郊赦大辟以下

十三年二月丁亥親畊籍田赦天下孝弟力田賜爵

一級

十四年正月乙巳朔皇太子冠赦天下賜為父後者

爵一級

十五年九月壬辰赦天下十一月丁卯交州刺史李

旻斬交州反者阮宗孝傳首京師曲赦交州

十七年二月甲辰大赦天下

十八年四月丁巳大赦天下



普通元年正月乙亥朔改元大赦天下賜文武勞位  
孝弟力田爵一級尤貧之家勿收嘗調鰥寡孤獨並  
加贍卹

二年正月辛巳親祠南郊戊子大赦天下

三年三月壬辰朔日有食之既癸巳赦天下四方民  
所疾苦咸卹以聞

四年正月辛卯親祠南郊大赦天下經諸窮病咸加  
賑卹

六年正月辛亥親祠南郊大赦天下三月丙午

見南斗賜親附民長復除詿誤罪失一無所問七月  
壬戌大赦天下

七年正月辛丑朔赦殊死以下十一月庚辰大赦天  
下

大通元年正月辛未親祠南郊詔曰欽奉時事虔薦  
蒼璧思承天德惠此下民凡因事去土流移他境者  
竝聽復宅業蠲役五年尤貧之家勿收三調孝弟力  
田賜爵一級三月巳未幸同泰寺甲戌還宮赦天下  
改元

中大通元年正月辛酉親祠南郊大赦天下孝弟力  
田賜爵二級六月壬午大赦天下九月癸巳幸大同



寺設四部無遮大會十月巳酉還宮大赦改元

三年正月辛巳親祠南郊大赦天下孝弟力田賜爵

一級十月乙亥立晉安王綱爲皇太子大赦天下賜

爲父後者及出處忠孝文武清勤並賜爵一級

五年正月辛卯親祠南郊赦天下孝弟力田賜爵一

級

六年二月癸亥親耕籍田大赦天下孝弟力田賜爵

一級

大同元年正月戊申朔改元大赦

三年正月辛丑親祠南郊大赦天下孝弟力田賜爵

一級八月辛卯幸阿育王寺赦天下

四年七月癸亥詔以東治徒李喬之家降如來形舍

利大赦八月甲辰詔南兗北徐東徐青冀南北青武

仁潼睢等十三州旣經饑饉曲赦逋租宿債勿收今

年二調

六年正月庚戌朔曲赦司豫徐兗四州八月戊午赦

天下十一月巳卯曲赦京邑

七年正月辛巳親祠南郊赦天下其有流移及失桑

梓者各還田宅蠲課五年十一月丁丑詔曰民之多

幸國之不幸恩澤屢加彌長姦盜朕亦知此之爲病



矣如不優弘非仁人之心凡厥讐讐逋負起令  
七年十一月九日昧爽以前在民間無問多少言上  
尚書督所未入者皆赦除之

十年九月己丑詔曰今茲遠近雨澤調適其穫已及  
冀必萬箱宜使百姓因斯安樂凡天下罪無輕重已  
發覺未發覺討捕未禽者皆赦宥之侵剽耗散官物  
無問多少亦悉原除田者荒廢水旱不作無當時交  
列應追稅者并作田不登公格並停各備臺州以文  
最逋殿罪悉從原

中大同元年三月乙巳大赦天下凡主守割盜放散  
官物及以軍糧器甲凡是赦所不原者起大同十一  
年正月以前皆悉從恩十一年正月以後悉原加責  
其或爲事逃叛流移因饑亡鄉失土可聽復業蠲課  
五年停其徭役其被拘之身各還本部舊業若在皆  
悉還之四月丙戌於同泰寺講解設會大赦改元孝  
弟力田爲父後者賜爵一級

太清元年正月辛酉親祠南郊詔曰天行彌綸覆幬  
之功溥乾道變化資始之德成朕沐浴齋宮虔恭上  
帝祇承禋燎高燦太一大禮克遂感慶蕪懷思與億  
兆同其福惠可大赦天下尤窮者無出卽年租調清



議禁錮並皆宥釋所討逋叛巧籍隱年間丁匿口開  
恩百日各令自守不問往罪流移他鄉聽復宅業蠲  
課五年孝弟力田賜爵一級居局治事賞勞三年三  
月庚子幸同泰寺設無遮大會四月丁亥還宮大赦  
天下改元孝弟力田為父後者賜爵一級

二年五月辛亥曲赦交愛德三州八月甲辰邵陵王  
綸督眾軍討侯景曲赦南豫州

簡文帝大寶元年正月辛亥朔詔曰蓋天下者至公  
之神器在昔三五不獲已而臨蒞之故帝王之功聖  
人之餘事軒冕之華儻來之一物太祖文皇帝含光  
大之量啓西伯之基高祖武皇帝道洽二儀知周萬  
物屬齊季薦瘡彘倫剥喪同氣離不測之禍元首懷  
無厭之欲乃啓樂推之運因億兆之心拯彼摧角雪  
茲讐耻大慈之業普薰汾陽之詔屢下于茲四紀無  
得而稱朕以寡昧哀煢孔棘生靈已盡志不圖全龜  
勉視陰企承鴻緒王道未直天步猶艱式憑宰輔以  
弘庶政履端建號抑維舊章可大赦天下改大清四  
年為大寶元年

孝元帝初為淵東王大寶三年在江陵猶稱太清六  
年五月令曰君子赦過著在周禮聖人解網聞之湯



令自獫狁孔熾長蛇薦食赤縣卮危黔黎塗炭終宵  
不寐志在雪耻元惡稽誅本屬侯景王偉是其心膂  
周右珍棄背恩義今並烹諸鼎鑊肆之帝朝但此寇  
擾為歲已積衣寇舊貴被逼偷生猛士勲豪和光苟  
免凡諸惡侶諒非一族今特闔以王澤削其刑書自  
太清六年五月二十日昧爽以前咸使維新

承聖元年十一月丙午即皇帝位於江陵詔曰夫樹  
之以君司牧黔首帝堯之心豈貴黃屋誠弗獲已而  
臨蒞之朕皇祖太祖文皇帝積德岐梁化行江漢道  
映在田具瞻斯屬皇考高祖武皇帝明並日月功格

區宇應天從人惟睿作聖太宗簡文皇帝地侔啓誦  
方符文景羯寇憑凌時難孔棘朕大拯橫流克復宗  
社羣公卿士百辟庶僚咸以皇靈眷命歸運斯及天  
命不可以久淹宸極不可以久曠粵若前載憲章令  
範畏天之威纂隆寶曆用集神器于予一人昔虞夏  
商周年無嘉號漢魏晉宋因循以久朕雖云撥亂自  
非創業思得上繫宗祧下惠億兆可改太清六年為  
承聖元年通租宿債並許弘貸孝子從孫可悉賜爵  
臣欽若等曰梁武帝長徒鑠士特加原宥禁錮奪勞  
一皆曠蕩



敬帝紹泰元年九月丙午卽帝位十月己巳詔曰王室不造嬰罹禍釁西都失守朝廷淪覆先帝梓宮播越非所王基傾弛率土罔戴朕以荒幼仍屬艱難泣血枕戈志復讎逆大耻未雪夙宵鯁憤羣公卿尹勉以大義越登寡闇嗣奉洪業顧惟夙心念不至此庶仰憑先靈傍資將相尅清元惡謝寃陵寢令墜命載新宗祊更祀慶流億兆豈予一人可改承聖四年爲紹泰元年大赦天下内外文武賜位一等

太平元年正月戊寅以南豫州刺史任約譙秦二州刺史徐嗣徽舉兵反討平之大赦天下其與任約徐

嗣徽才契同謀一無所問癸未以震州刺史杜龕降曲赦吳興郡罷震州一月丙辰以東揚州刺史張彪叛斬首傳京師曲赦東揚州六月乙卯司空陳霸先大破齊軍大赦天下軍士身殞戰場悉遣欽祭其無家屬卽爲瘞埋

二年四月癸酉以廣州刺史蕭勃反平之曲赦江廣衡三州并督内爲賊所拘逼者並皆不問

陳高祖永定元年十月受梁禪卽皇帝位於南郊柴燔禮畢還宮臨太極前殿詔曰五德更運帝王所以御天三正相因夏殷所以宰世雖色分駢翰時異文



質揖讓征伐迄用參差而育德振民義與一揆朕以寡昧時屬艱危國步屢屯夫惟三紀肆勤先后極厥橫流籍將帥之功兼猛士之力一正天下再造黔黎梁氏以天祿永終曆數攸在遵與能之典集大命于菲德辭不獲亮式從天睠俯協民心受終文祖升禋上帝繼統百王君臨萬宇若涉淵冰罔知攸濟寶業初建皇祚惟新恩俾惠澤覃被億兆可大赦天下改梁太平二年為永定元年賜民爵一級文武二等鰥寡孤獨不能自存者人穀五斛逋租宿債皆勿復收其有犯鄉里清議賍污淫盜者皆洗除先注與之更

始長徒勅繫特皆原之亡官失爵禁錮奪勞一依舊典

二年正月辛丑親祠南郊詔曰朕受命君臨初移星瑄孟陬嘉月備禮泰壇景候韶華人祇左慶思令億兆咸與維新且徃代祇氛于今猶梗軍機未息徵賦咸繁事不獲已久知下弊言念黔黎無忘寢食夫罪無輕重已發覺未發覺在今昧爽以前皆赦除之西

寇自王琳以下並許還迷一無所問也臣欽若等曰琳本梁之時

陳高祖既立敬帝琳奉永嘉王莊纂梁祚於湘中莊以琳為丞相錄尚書事故云西寇

義軍本擬西寇並相解遣留家附業輓訂軍資未送



者並停元年軍糧逋餘者原其半州郡縣軍戍並不  
得輒遣使民間務存優養若有侵擾嚴爲法制

世祖文帝以永定三年六月丙午卽位於大極前殿  
詔曰上天降禍奄集邦家大行皇帝背離萬國率土  
擁心若喪考妣龍圖寶曆眇屬朕躬運鐘擾攘事功  
機務南面須至西讓禮輕今便式膺景命光宅四海  
可大赦天下罪無輕重悉皆蕩滌逋租宿債吏民僉  
負可勿復收文武內外量加爵叙孝弟力田爲父後  
者賜爵一級其有犯鄉里清議賊污淫盜者皆洗除  
先注與之更始長徒勅繫特皆原之亡官失爵禁錮  
奪勞一依舊典

天嘉元年正月癸丑詔曰朕以寡昧嗣纂洪業哀憚  
在疚治道弗昭仰惟前德幽顯遐暢恭已不言庶幾  
無改雖宏圖懋軌日月方弘而清廟廓然聖靈浸遠  
敢尋永往瞻言罔極今四象運周三元造獻華夷胥  
洎玉帛駿奔思覃遺澤播之億兆其大赦天下改永  
定四年爲天嘉元年鰥寡孤獨不能自存者賜穀人  
五斛孝弟力田殊行異等加爵一級三月戊戌詔曰  
夫五運遞來三靈眷命皇王因之改創殷周所以樂  
推朕統曆承基丕隆鼎運期理攸屬數祚斯在豈僥



侍所至寧卜祝可求故神器之重必在荷命是以逐鹿貽譏斷蛇定業亂臣賊子異世同尤王琳識暗挈瓶智慙衛足干紀亂管自貽顛沛而縉紳君子多被繫維雖涇渭合流蘭鮑同肆求之厥理或有脇從今九戩既設八紘斯掩天網恢恢吞舟是漏至如伏波遊說永作漢藩廷壽脫歸終於魏守器改秦虞材通晉楚行藏用捨亦豈有嘗直加寬仁以彰奮作其衣冠士族預在凶黨悉皆原宥將帥戰兵亦同肆青並隨才銓引庶收力用六月辛丑以國哀周忌臨于太極前殿百僚陪哭赦京師殊死以下

二年正月庚戌大赦天下三月庚寅以湘州城主殷亮降曲赦湘州諸郡

三年閏巳月甲申大赦天下四月癸卯曲赦東陽郡

四年九月癸亥曲赦京師十二月丙申大赦天下

五年七月丁丑詔曰朕以寡昧屬當負重星籥亟改冕旒弗曠不能仰叶璿衡用調玉燭傍慰蒼生以安黔首兵無寧歲民乏有年移風之道未弘習俗之患猶在致令民多觸網吏繁筆削獄犴滋彰雖繇物犯囹圄淹滯亦或有寬念俾納隍載勞負屨加以膚腠不適攝衛有虧比徵獲痊思覃寬惠可曲赦京師十



二月甲子曲赦建安晉安二郡

六年十二月癸亥詔曰朕自居民牧之上託在王公之上顧其寡昧鬱于治道加以屢虧聽覽事多壅積寃滯靡申幽枉弗鑒念茲罪隸有甚納隍而惠澤未流愆陽累月今歲序云暮元正向肇欲使幽圉之內同被時和曲赦京師

天康元年二月丙子詔曰朕以寡德纂承洪緒日昃劬勞思弘景業而政道多昧黎庶未康兼疾患淹時亢陽累月百姓何咎是繇朕躬念茲在茲痛如疾首可大赦天下改天嘉七年爲天康元年

廢帝以天康元年四月癸酉卽位於太極前殿詔曰上天降禍大行皇帝奄棄萬國板號靡及五內推殞朕以寡德嗣膺寶命熒熒在疚懼甚綴旒方賴宰輔救其不逮可大赦天下詔内外文武各復其職遠方悉停奔越

光大元年正月乙亥詔曰昔昊天成命降集寶圖二君重光九區咸乂閔余冲眇王道未昭荷茲神器如涉靈海庶親賢竝建牧伯惟良天下雍熙緬同刑措今三元改曆萬國充庭清廟無追具僚斯在瞻事宁位觸感摧心思播遺思俾覃黎獻可大赦天下改天



康二年為光大元年孝弟力田賜爵一級十月辛巳

赦湘巴二郡為華皎所誑誤者臣欽若等曰皎為相州刺史送子玄饗質

于後梁請兵伐陳為陳所敗乃奔于梁

宣帝太建元年正月甲午即位詔曰夫聖人受命王

者中興並繇懿德方作元后高祖武皇帝揖拜堯圖

經綸禹跡配天之業光辰象而利貞格地之功侔川

岳而長遠世祖文皇帝體上聖之姿當下武之運築

宮示儉所務唯德定鼎初基厥謀斯在朕以寡薄才

非聖賢夙荷前規方傳景祚雖復親承訓誨志守藩

維詠季子之高風思陽城之遠託自元儲紹國正位

君臨無導非幾佇聞刑措豈圖五室不造頻構亂階

天步艱難將傾寶曆仰惟嘉命爰集朕躬我心貞確

空誓蒼昊而羣辟啓請相誼渭橋文母尊嚴懸心長

樂對揚璽綬非止殷湯之三辭履步春冰何但代王

之五讓今便肅奉天策欽承介圭若據滄溟愈增競

業思所以雲行雨施品物咸亨當與黔黎普同斯慶

可改光大三年為太建元年大赦天下在位文武賜

位一階孝弟力田及為父後者賜爵一級異等殊才

並加策序鰥寡孤獨不能自存者仍賜穀五斛

三年三月丙午以新除左衛將軍歐陽紇據廣州反



儀同章昭達討平之曲赦廣衛二州丁未大赦天下  
三年三月丁丑大赦天下自天康元年訖太建元年  
逋餘軍糧祿秩有調未入者悉原之又詔犯逆子弟  
及屬逃亡異境者悉聽歸有繫繫者諒可散釋其有  
居宅並追還

四年九月庚子朔日有食之辛亥大赦天下

六年正月壬戌朔詔曰王者以四海爲家萬姓爲子  
一物乖方夕惕猶厲六合未混盱食彌憂朕嗣纂鴻

基思弘經畧上符景宿下叶人謀命將興師大極淪

溺灰瑄未周凱捷相繼拓地數千連城將百蠢彼餘

黎毒茲異境江淮年少猶有剽掠鄉閭無賴擿出陰

私將帥軍人罔顧刑典使符法蠲除仁聲載路且肇

元告慶邊服來荒始覩皇風宜覃曲澤可赦江右淮

北南司定霍光建朔合豫北徐仁北兗青冀南譙南

兗十三州郢洲之齊安西陽江洲之齊昌新蔡嵩唐

南豫洲歷陽 郡士民罪無輕重悉皆原宥將帥

職司軍人犯法自依當科

十年三月乙酉大赦天下

十一年十一月辛卯詔曰盡寇弗犯革此澆風孳戮

是蹈化于薄俗朕肅膺寶命迄將一紀思經邦濟治



憂國愛民日昃勞夜分輟寢而還淳返樸其道靡  
階雍熙盛美莫云能致遂乃鞠訊之牒盈于聽覽春  
欽之人煩于牢狴周成刑措漢文斷獄杼軸空勞邈  
然既遠加以蕞爾醜徒軼我彭汴淮汝氓庶企踵王  
畧治兵誓旅義存拯救飛芻輓粟征賦頗煩暑雨祁  
寒寧忘恣怨兼宿度支舛次舍違方若日之誠責歸  
元首愧心斯積馭朽非懼卽建子令月微陽初動應  
此嘉辰宜播嘉澤可大赦天下

後主以大建十四年正月丁巳卽帝位于太極前殿  
詔曰上天降禍大行皇帝奄棄萬國攀號擗踊無所  
逮以朕以哀獎調膺寶曆若涉巨川罔知攸濟方賴  
羣公用禪寡薄恩播遺德覃被億兆凡厥遐邇咸與  
維新可大赦天下在位文武及孝弟力田爲父後者  
並賜爵一級孤老鰥寡不能自存者賜穀人五斛帛  
二疋七月辛未大赦天下

九月丙午設無遮大會於太極殿捨身及乘輿御服  
大赦天下

至德九年正月壬寅詔曰朕以寡薄嗣守鴻基哀惻  
切慮疾恙纏織訓俗少方臨下靡竿懼甚踐水慄同  
馭朽而四氣易流三九遄至綏纓引陛王帛充庭具



物匪新節序疑舊緬思前德永慕昔辰對軒闥而哽  
心顛宸筵而咽氣思所以仰遵遺構俯勵薄躬陶鑄  
九流休息百姓用弘寬簡取叶陽和可大赦天下改  
大建十五年爲至德元年

二年正月癸巳大赦天下十一月丙寅大赦天下

三年十一月辛巳幸長干寺大赦天下

四年十一月己卯詔曰惟刑止暴惟德成物三才是  
資百王不改而世無拉角時解犯鱗渭橋驚馬弗聞  
廷爭桃林逸牛未見其旨雖剝悍輕侮理從鉗鈇蠢  
愚桂點宜肆含弘政之良哉明慙則哲求諸解網安  
可得乎是用屬寤寐以軫懷負黼屨而於邑復茲合  
璧輪缺連珠運舛黃鍾獻呂和氣始萌玄英告中履  
長在御因時宥過抑乃斯得可大赦天下

禎明元年正月戊寅詔曰栢皇大庭鼓滄和于曩日  
姬王羸后被澆風於末載刑書已鑄善化匪融禮義  
既生姦宄斯作何其淳樸不反浮華競扇者與朕居  
中御物納隍在睠恢恢天網屢絕三邊元元黔庶終  
罹五辟蓋乃康哉寡薄抑焉法令滋彰是用當宁弗  
怡矜此向隅之意今三元其序萬國朝晨靈芝獻于  
始陽膏露凝于聿歲從春施令仰乾布德思與九有



冊府元龜 恩宥二

惟新七政可大赦天下改至德五年為禎明元年九月甲午以江陵蕭琛所置安平王蕭巖降大赦天下梁末帝禎明六年四月己亥詔曰應天下見禁罪人犯大辟合抵極刑者宜示好生特令減死除准格律嘗赦不原外徒流以下遞減一等左降官未經量移者與量移已量移者更與復資

大正

冊府元龜

冊府元龜

巡按福建監察御史臣李嗣京 訂正

知甌寧縣事 臣 孫以敬 叅閱

知建陽縣事 臣 黃國琦 較釋

閏位部

欽恤 念功 寬恕 宥過 悔過

欽恤

明慎之文見之於義易欽恤之戒著之於虞書故君子之所以盡心者蓋刑之謂矣昔劉氏閏位宅彼江介惟梁暨陳維守其國乃有勵精政治軫念黎庶下

冊府元龜 閏位部



寬大之詔開疏闊之網革去苛法逮用中典雖未臻夫至化亦可見其休德者焉

宋高祖永初二年六月壬寅詔曰杖罰雖有舊科然職務殷碎推坐相尋若皆有其實則體所不堪文行而已又非設罰之意可籌量粗爲中否之格

十月丁酉詔曰兵刑峻重務在得宜役身死叛輒考傍親流遷彌廣未見其極遂令冠帶之倫淪陷非所宜革以弘泰去其密科自今犯罪克軍合舉戶從役者便付營押領其科戶絕及謫止一身者一不得復侵濫服親以相連染

少帝卽位初詔曰平理獄訟政道所先朕哀荒在疚未堪親覽司空尚書令可率衆官月二決獄

孝武帝大明三年八月甲子詔曰昔姬道方凝刑罰斯厝漢德初明犴圜用簡良繇上一其道下淳其性今民澆俗薄誠淺僞深重以寡德弗能心化故知方者尠趣辟寔繁向因巡覽見二尚方徒隸纓金屨較旣有矜復加以國慶民和獨隔凱澤益以慙焉可詳所原宥

九月己巳詔曰夫五辟三刺自古所難巧法深文在季彌甚故公情察訟魯師致捷市獄勿擾漢史飛聲



廷尉遠邇疑讞平決攸歸而一蹈幽囹動逾時歲民  
嬰其困吏容其私自今囚至辭具竝卽以開朕當悉  
詳斷庶無留獄若繁文滯刻證逮遐廣必須親察以  
盡情狀自後依舊聽訟

五年十一月詔曰王畿內奉京師外表衆夏民殷務  
廣宜思簡惠可遣尚書就加詳簡竝與縣宰平治庶  
獄其有凝滯具以狀聞

南齊武帝永明二年四月詔揚南兗二州統內諸獄  
荆豫江三州府見囚江州潯陽新蔡兩郡繫獄竝郡  
送還臺須俟克日斷在直緣江遠郡及諸州委刺史

詳察訊鞫

明帝建武二年四月己亥朔詔三百里內獄訟同集  
京師克日聽覽此外委州訊察三署徒隸原遣有差  
梁高祖天監二年正月甲寅朔詔曰三訊五聽著自  
聖典哀矜折獄義重前誥蓋所以明慎用刑深戒疑  
枉成功致治罔不繇茲自昔藩部嘗躬訊錄求理得  
情洪細必盡未運弛網斯政又闕牢犴沉壅申析靡  
從朕屬當期運君臨億兆雖復齋居宣室留心聽斷  
而九牧遐荒無因臨覽深懼懷寃就鞠匪唯一方可  
申勅諸司月一臨訊傳詢擇善務在確實



五年四月甲寅詔曰朕昧旦齋居惟刑之恤三辟五聽寢興載懷故陳肺石於都街增官司於詔獄殷勤親覽小大以情而明慎未洽囹圄尚壅永言納隍在予興愧凡犴獄之所可遣法官近侍遮錄囚徒如有枉滯以時奏聞

十六年正月詔班下四方諸州郡縣時理獄訟勿使冤滯竝若親覽

陳文帝天嘉元年十二月詔曰古者春夏二氣不夾重罪益以陽和布澤天秩是弘寬網省刑義符含育前王所以則天象地懸法垂訓者也朕屬當澆季思求民瘼哀矜惻隱念甚納隍欲遵舊軌用長風化自今孟春訖于夏首罪人伏辟事已疑者宐且申停後主禎明二年十一月丁卯詔曰夫議獄緩刑皇王之所垂範勝殘去殺仁人之所同心自畫冠旣息刻吏斯起法令滋彰手足無措朕君臨區宇屬當澆未輕重之典在政未康小大之情興言多媿眷茲狴犴有軫哀矜可克日於大政殿訊獄

念功

非賢罔治實著於昌言惟帝念功式敷於光宅君臣之際今古共然自皇階未夷世道多梗合離之期有



數雄俊之才遂興雖識緯之符未參於命歷然經綸之業咸闡於茂勳觀其感召風雲招延心膂爪牙之用苟有補於當時帶礪之盟乃仰同於前典至於顧待終始感聚存亡必舊人而是圖雖小忿而無廢豈唯忠諒之節類王臣而匪躬抑亦沮勸之方俾懦夫而增氣

蜀向朗字巨達領丞相諸葛亮長史後免官歸成都數年爲光祿勳亮卒後徙左將軍後主追論舊功封顯明亭侯位特進

吳周瑜字公瑾兄子峻亦以瑜元功爲偏將軍領吏士千人峻卒全琮表峻子護爲將大帝曰昔走曹操拓有荊州皆是公瑾嘗不忘之初聞峻亡仍欲用護聞護性行危險用之適爲作禍故便止之孤念公瑾豈有已乎

周裔瑜之子封都鄉侯後以罪徙廬陵郡赤烏二年諸葛瑾步騭連名上疏曰故將軍周瑜子裔昔蒙粉飾受封爲將不能養之以福思立功效以至縱情欲招速罪辟臣竊以瑜昔見寵任入作心膂出爲爪牙御命出征身當矢石盡節用命視死如歸故能摧曹操於烏林走曹仁於郢都揚國威德華夏是震蠢爾



蠻荆莫不賓服雖周之方叔漢之信布誠無以尚也夫折衝并難之臣自古帝王莫不貴重故漢高帝封爵之誓曰使黃河如帶太山如礪國以永存爰及苗裔申以丹書重以盟詛藏于宗廟傳於無窮欲使功臣之後世世相踵非徒子孫乃閔苗裔報德明功勤懇懇如此之念欲勸戒後人用命之臣歿而無悔也况於瑜身沒而未久而其子降為匹夫益可悼傷竊惟陛下欽明稽古隆於典繼為裔歸訢乞匄餘罪還兵復爵使失旦之鷄復得一鳴抱罪之臣展其後效大帝答曰腹心舊勳與孤協事公瑾有之誠所不忘昔裔年少初無功勞橫受精兵爵以侯將蓋念公瑾以及於裔也而裔恃此醜淫自恣前後告諭會無悛改孤於公瑾義猶二君樂裔成就豈有已哉迫裔非惡未宐便還且欲苦之使自知之今二君勤勤援引漢高河山之誓孤用恧然雖得非其疇猶欲庶幾事亦如爾故未順旨以公瑾之子而二君在中間苟使得改亦何患乎瑾騰表比上朱然及全琮亦俱陳乞大帝乃許之

潘章為右將軍性奢泰數不奉法監司舉奏大帝惜其功而輒原不問喜禾三年卒子平以無行徙會稽



璋妻居建業賜田宅復客五十家

顧譚代祖父雍平尚書事後有司奏譚誣罔大不敬罪應大辟大帝以雍故不致法皆徙之

宋檀韶初以佐命功爲江州刺史嗜酒貪橫所蒞無績高祖嘉其合門從義弟道濟又有大功旣免官故特見寵授加邑至千五百戶

傅亮少帝景帝二年率行臺至江陵奉迎文帝後帝將誅亮至廣莫門帝遣中書舍人以詔書示亮竝謂曰以公江陵之誠當使諸子無恙

謝靈運爲臨川內史在郡遊放司徒遣使隨州錄事鄭望生收之靈運執望生與兵叛逸廷尉論正斬刑文帝愛其才欲免官而已彭城王義康堅執謂不宐恕乃詔曰靈運罪釁累仍誠合盡法但謝玄勳參微管宐宥及後嗣可降死一等徙付廣州

張茂度爲益州刺史時文帝討荊州刺史謝晦詔益州遣軍襲江陵晦已平而軍始至白帝茂度與晦素善議者疑其出軍遲留時茂度弟邵爲湘州刺史起兵應大駕帝以邵誠節故不加罪被代還京師累遷太嘗以脚疾出爲義興太守從容謂曰勿以西蜀介懷對曰臣不遭陛下之明墓木拱矣



劉康祖襲父虔之封轉負外散騎嘗侍以浮蕩蒲酒  
爲事前後屢被劾文帝以勳臣子每原貸之  
王華爲護軍侍中卒年四十三追贈散騎嘗侍衛將  
軍元嘉九年文帝思誅徐羨之功追封新建縣侯食  
邑千戶謚曰宜侯

王曇首爲侍中元嘉七年卒九年文帝以豫誅徐羨  
之等謀追封豫寧縣侯邑千戶謚曰文侯

南齊王敏則爲南兗州刺史進號安北將軍魏人侵  
淮泗敏則恐委鎮還都百姓皆驚散奔走太祖以其  
功臣不問以爲都官尚書撫軍又進號征東將軍宋

廣州刺史王翌之子妾路氏酷暴殺婢翌之子法郎  
告敏則敏則付山陰獄殺之路氏家証爲有司所奏  
山陰令劉岱坐棄市刑敏則入朝太祖謂敏則曰人  
命至重是誰下意殺之何不啓聞敏則曰是臣愚意  
臣知何物科法見背後有節便言應得殺人劉岱亦  
引罪太祖乃赦之敏則免官以公領郡

梁曹景宗爲平西將軍郢州刺史魏軍攻司州圍刺  
史蔡道恭城中負版而汲景宗望門不出但輝軍遊  
獵而已及司州城陷爲御史中丞任昉所奏高祖以  
功寢而不治徵爲護軍將軍旣至復拜散騎嘗侍右



衛將軍

北齊薛循義高祖時爲齊州刺史以黷貨除名追其  
前守晉州功復其官爵

慕容紹宗爲開府累有戰功卒贈太尉尚書令後其  
長子士肅爲散騎嘗侍尋以謀反伏誅文襄以紹宗  
之故罪止肅身

高慎爲豫州刺史遂據武牢降西魏慎先入關周文  
帝率衆東出高祖破之於却山慎妻子將西度於路  
盡擒之高祖以其勲家啓慎一房配没而已

庫狄干從神武起兵破四胡於韓陵封廣平縣公尋  
進郡公河陰之役諸將大捷唯干兵退神武以其舊  
功竟不責黜尋轉太子太傅

晉華溫琪仕梁爲晉州節度使溫琪在任違法籍民  
家財入已其家訟于朝制使劾之伏罪未帝以先朝  
草昧之臣不忍加法左拾遺李愚堅案其罪帝詔曰  
朕若不與鞠究謂予不念赤子若遂行與憲謂予不  
念功臣爲子君者不亦難乎其華溫琪所受賊宐官  
給代還所訟之家

寬恕

史臣稱漢祖寬明而仁恕又聖人之言曰寬則得衆



是知有國之君受天之命何嘗不收覽群心開創王業而况閏位之主書軌不同勅敵牙其爭伐豪傑得以願望儻非體巨浸之納汚同山藪之藏疾則何以立彼宗祏傳之子孫故有奔亡陵國待妻子以如初交關外域宥昆弟而勿坐至於念世祿重時名慰羈孤之心安反側之意屈彼彞憲從於輕典或不奪其爵土或復實於官裳本乎原情繇之得衆雖刑故無小或失爲邦之訓而御下以寬亦見君人之度矣

蜀先主時黃權爲鎮北將軍督江北軍以防魏師先主自江南及吳將軍陸議乘流斷圍南軍敗績先主引退而道隔絕權不得還故率將所領降魏有司執法白收權妻子先主曰孤負黃權權不負孤待之如初

吳大帝嘉禾六年丞相顧雍奏在官奔喪自從大辟其後吳令孟宗喪母奔赴已而自拘於武昌以聽刑陸遜陳其素行因爲之請帝乃減宗一等後不得以爲比因此遂絕

宋少帝時王玄謨爲謝晦荊州南蠻行參軍武昌太守晦敗以非大帥見原

徐湛之爲丹陽尹范曄等謀逆湛之始與之同後發



其事所陳多不盡爲曄等疑辭所連乃詣廷尉歸罪  
帝慰遣令還郡湛之上表曰賊臣范曄孔熙先等連  
結謀逆與法靜凡宣分往還與大將軍臣義康共相  
唇齒備於鞠對伏尋仲承祖始達熙先等意便極言  
姦狀而臣兒女近情不識大體上聞之初不務指斥  
紙翰所載猶復漫略者實以凶計旣表逆事歸露又  
仰緣聖慈不欲窮盡故言勢依違未敢縷陳情旨無  
隱以昭天監及群凶收擒各有所列曄等口辭多見  
誣謗丞相醜言紛紜特甚乃云臣與義康宿有密契  
在省之言期以爲定潛通奸意報示天文末云熙先  
懸指必同以誑於曄或以智勇見稱或以愚懦爲目  
旣美其信懷可覆駭其動止必啓凡諸詭妄還自違  
伐多舉事端不究原統齋傳之信無有主名所徵之  
人又已歿沒首尾乖舛自爲矛盾卽臣誘引之辭以  
爲始謀之證御臣糾告竝見怨咎縱肆狂言必規禍  
陷伏自探省亦復有繇昔義康南出之始勅臣入相  
伏慰晨夕覲對經踰旬日逆圖成謀雖無顯然懟容  
異意頗形言旨遣臣利刃期以際會臣苦相諫譬深  
加距塞以爲怨憤所至不足爲慮便以闕啓惧成虛  
妄思量反覆實經愚心非爲納受曲相蔽匿又令申



情范曄釋中間之憾致懷蕭思話恨喬意未申謂此  
僥倖亦不宜達陛下敦惜天倫彰於四海藩禁優簡  
親理咸通又昔蒙眷顧不容自絕善翰信命時相往  
來或言少意多旨深文淺辭色之間往往難測臣每  
懼異聞皆略而不答惟心無邪悖故不稍以自嫌縷  
縷并誠實具如此故至於法靜所傳及熙先等謀知  
實不早見闕之日便卽以聞雖晨光幽燭曲昭窮歛  
裁以正義無所逃刑束骸北闕請罪司寇乾施舍宥  
未加治考中旨頻降制使還徑仰荷恩私哀惶失守  
臣殃積罪深丁罹酷罰久應屏棄永謝人理况姦謀  
所染忠孝頓闕智防愚淺闇於禍萌士人未明其心  
群庶謂之同惡朝野側目衆議沸騰專信讐隙之辭  
不復稍相申體臣雖駑下情非木石豈不知醜點難  
嬰伏劍爲易而覩然視息恐此餘生實非苟妄微命  
假延漏刻誠以負戾灰滅貽惡方來貪及規息少自  
披訴冀幽誠并歛儻或昭然雖復身膏草木九泉無  
恨顯居官次垢穢朝班厚顏何地可以自處乞蒙墮  
放伏待鉄鑽優詔不許

孔靈符爲會稽太守加豫章王撫軍長史靈符家本  
豐富產業甚廣又於永興立墅周廻三十三里水陸



地二百六十五頃合帶二山又有果園九處爲有司所糾詔原之

王僧達爲太子舍人坐屬疾而於楊烈橋觀鬪鴨爲有司所糾原不問

謝靈運爲侍中自以名輩應參時政被徵召便以此自許旣至太祖唯接以文義而王曇首等名位素不之踰竝見任遇靈運意不平多稱疾不朝直出郭遊行經旬不歸旣無表聞又不請惡帝不欲傷大臣詔旨令自解靈運乃上表陳疾賜假東歸

孝武帝時孔覲爲御史中丞鞭令史爲有司所糾原不問

南齊太祖時卞彬初仕宋爲員外郎齊臺初建彬曰誰謂宋員外予望之大祖聞之不加罪也

王玄邈仕宋爲青州刺史太祖鎮淮陰玄邈啓宋明帝稱太祖有異謀太祖不恨也昇明中太祖引爲驃騎司馬玄邈甚懼太祖待之如初

謝朓爲宋侍中太祖受禪日朓當解璽朓陽不知日有何公事傳詔日解璽授齊王朓日齊自應有侍中乃枕卧傳詔懼乃使稱疾朓日我無疾何所道遂朝服出東掖門乃得車還宅是日遂以王儉爲侍中解



重旣而武帝請誅肫太祖曰殺之則成其名正應容之度外

武帝時張敞兒坐遣使與蠻中交關伏誅弟恭兒官至負外即在襄陽聞敞兒敗將數十騎走入蠻中收捕不得後首出帝原其罪

梁高祖舉義兵至京師州牧郡守皆望風降欵吳興太守袁昂獨拒境不受命及建康城平昂束身詣闕高祖宥之不問也天監二年以爲後軍臨川王參軍事昂奉啓謝曰恩降絕望之辰慶集寒心之日焰灰非喻萑枯未擬樞衣聚足顛懼不勝臣遍歷三墳備

詳六典巡較賞罰之科調檢生歿之律莫不嚴五辟於明君之朝峻三章於聖明之世是以塗山始會致防風之誅鄴邑方構有崇侯之伐未有緩憲於斲戮之人奢刑於耐罪之族出萬死入一生如臣者也推恩反罪在臣實大披心瀝血敢乞言之臣東國賤人學行何取旣殊鳴鳳直木故無結綬彈冠徒藉羽儀易農就仕往年濫職守秩東隅仰屬龔行風馳電掩當其時也負鼎國者日至執玉帛者相望獨生在愚臣頓昏大義殉鴻毛之輕忘同德之重但三吳險薄五湖交通屢起田儉之變每懼殷通之禍空慕君魚



保境遂失師洎枹器後至者斬臣甘斯戮明刑殉衆  
誰曰不然幸蒙約法之弘承解網羅之宥猶當降等  
薪粲遂乃頓釋鉗齧歛骨吹鳧還編黔庶濯鹿蕩穢  
入楚遊陳天波旣洗雲油遽沐古人有言非死之難  
處死之難臣之所荷曠古不書臣之死所未知何地  
高祖答曰朕遺卿卿無自外

江蓐初爲齊建康內史視事暮月義師下次江州遣  
寧朔將軍劉譏之爲郡蓐帥吏民據郡拒之及建康  
城平蓐坐禁錮俄被原起爲後軍臨川王外兵參軍  
劉季連爲益州刺史舉兵叛後降旣至詣闕謝高祖

引見之季連自東掖門入數步一稽顙以至高祖前  
笑謂曰卿欲慕劉備而會不及公孫述豈無卧龍之  
臣乎季連復稽顙謝赦爲庶人

陳伯之初叛入魏後於尋陽擁衆八千復歸旣至以  
爲使持節都督西豫州刺史永新縣侯邑千戶未之  
任復以爲通直散騎嘗侍驍騎將軍

謝覽爲侍中頗樂酒因讌席與散騎嘗侍蕭琛相詆  
毀爲有司所奏高祖以覽年少直出爲中權長史  
張欣泰爲武陵內史坐贓私殺人被糾見原還復爲  
直閣步兵較尉領羽林監



元帝時劉孝勝初爲安西武陵王紀長史蜀都太守高祖太清中侯景陷京師紀僭號於蜀以孝勝爲尚書僕射承聖中隨紀出峽口兵敗被執下獄帝尋宥之起爲司徒右長史

陳高祖初侯瑱爲江州刺史鎮豫章討余孝頃留妻子於豫章今從弟瀹知後事瀹與其部下侯方兒不協方兒怒率所部攻瀹虜掠瑱軍妓妾金玉歸於高祖瑱旣失根本兵衆皆潰徑歸豫章人拒之乃趨湓城投其將焦僧度勸瑱以高祖有大量必能容已乃詣闕諸罪高祖復其爵位

歐陽頴隨高祖討侯景有功梁元帝以爲忠武將軍衡州刺史進封始興縣侯時蕭勃在廣州兵疆位重元帝深患之遣王琳代刺史琳已至小桂領勃遣其將孫瑒監州盡率部下至始興避琳兵鋒頴別據一城不往謁勃閉門高壘亦不拒戰勃怒遣兵襲頴盡收其貨財馬仗尋赦之還復其所復與結盟荊州陷委質於勃及勃渡嶺出南康以頴爲前軍都督頓豫章之苦竹灘周文育擊破之擒送于高祖釋之深加接待

徐陵初自北齊還太尉王僧辯接待其禮甚厚以陵



爲尚書吏部郎掌詔誥其年高祖率兵誅僧辯仍進討韋載時任約徐嗣徽承虛襲石頭陵感僧辯舊恩乃往赴約及約等平高祖釋陵尋以爲貞威將軍尚書左丞

文帝時華皎之叛也同逆皆誅之唯章昭裕昭達之弟劉廣業廣德之弟曹宣高祖舊臣任蠻奴嘗有密啓於朝廷南是竝獲有王琳據土流周文昭以州從之及高祖踐祚琳遣其將曹慶等攻周廻仍使周文昭將兵犄角之進爲侯安都所敗擒以送都文帝釋之授戎威將軍定州刺史帶西陽武昌二郡太守

謝嘏在梁爲建安太守侯景之亂嘏之廣州依蕭勃承聖中元帝徵爲五兵尚書辭以道阻轉授智武將軍蕭勃鎮南長史南海太守勃敗還至臨川爲周廻所留久之又度嶺之晉安依陳寶應世祖前後頻召之嘏崎嶇寇虜不能自拔及寶應平嘏方詣闕爲御史中丞江德操所舉劾文帝不加罪責以爲給事黃門侍郎

張種爲都官尚書賜無錫嘉興縣秩嘗於無錫見重囚在獄天寒呼出曝日遂失之大笑而不訝責宣帝初殷不佞爲東官通事舍人廢帝嗣立帝爲太



傳錄尚書輔政甚為朝望所歸不佞素以名節自立  
 久受委東宮乃與僕射到仲舉中書舍人劉師知尚  
 書左丞王暹等謀矯詔出高宗衆人猶豫未敢先發  
 不佞乃馳詣相府面宣勅令相王還第及事發仲舉  
 等皆伏誅高宗雅重不佞特赦之免其官而已

北齊高祖為東魏丞相相府法曹辛子炎諮事云須  
 取署子炎讀署為樹高祖大怒曰小人都不知避人

家諱高祖父名樹

伏之為前行臺郎中杜弼進曰禮二名

不偏諱孔子曰言微不言在言在不言微子炎之罪  
 理或可恕高祖罵之曰眼看人嗔乃復牽經引禮叱

令出去弼行十步呼還子炎亦蒙釋宥

王則為荆襄六州都督渭曲之役則為西師圍逼遂  
 蕪城奔梁梁放還高祖恕而不責

爾朱文略其妹魏孝莊皇后高祖納之文略以兄文  
 羅卒無後襲梁王以兄文暢事當從坐高祖特寬貸  
 文襄帝時司馬世雲太尉子如之兄子為潁川刺史  
 侯景反世雲舉州從之時母弟在鄴便傾心附景無  
 復顧望諸將圍景於潁川世雲臨城逼對諸將言甚  
 不遜帝猶以子如以恩舊免其諸弟死罪徙於北邊  
 梁太祖開平二年五月王師敗於潞州壬辰軍前行



營都將康懷英孫海金以下主將四十三人於左銀臺門進狀待罪帝以去年發軍之日不利有違兵法竝釋放無各賜分物酒食勞問

乾化元年八月戊寅幸興安鞠場大教閱帝自指麾無不踊扑坐作進退聲振宮掖立神武統軍丁審衡對御以紅帛囊劍擬乘輿帝曰宿將也恕之以劉重霸代其任

二年命供奉官朱嶠於河南府宣取先收禁定州進奉官崔騰竝僦從一十四人竝釋放仍命柳領漢送

至具

滕唐戶部侍郎潔之子也廣明喪亂客于北諸侯爲定州節度使王處存所辟去載領貢獻至闕未幾其師稱兵遂繫之至是帝念賓介之來又已出境特命縱而歸焉

宥過

夫閏以定位割據與邦舍小過舉賢才是其權也雖讐若射鈎惡如盜馬叛國亡命犯禁抵刑猶然宥之况其小者哉所以感彼衆志得其衆力保全宗祀聲振隣敵能用權也與夫吹毛刺骨棄瑜錄瑕者不侔矣吳景帝初嗣位詔曰丹陽太守李衡以往事之嫌



營都將康懷英孫海金以下主將四十三人於左銀臺門進狀待罪帝以去年發軍之日不利有違兵法竝釋放無各賜分物酒食勞問

乾化元年八月戊寅幸典安鞠場大教閱帝自指麾無不踊扑坐作進退聲振宮掖立神武統軍丁審衢對御以紅帛囊劍擬乘輿帝曰宿將也恕之以劉重霸代其任

二年命供奉官朱嶠於河南府宣取先收禁定州進奉官崔騰竝僉從一十四人竝釋放仍命柳領漢送

至具

滕唐戶部侍郎潔之子也廣明喪亂客于北諸侯爲定州節度使王處存所辟去載領貢獻至闕未幾其師稱兵遂繫之至是帝念賓介之來又已出境特命縱而歸焉

宥過

夫閔以定位割據興邦舍小過舉賢才是其權也雖讐若射鈎惡如盜馬叛國亡命犯禁抵刑猶然宥之况其小者哉所以感彼衆志得其衆力保全宗祀聲振隣敵能用權也與夫吹毛刺骨棄瑜錄瑕者不侔矣吳景帝初嗣位詔曰丹陽太守李衡以往事之嫌



自拘有司夫射鈞斬祛在君爲君遣衡還郡勿令自

疑

衡爲丹陽太守時景帝在郡治衡數以法繩之衡妻習氏每諫衡衡不從會帝立衡憂懼謂妻曰不

用卿言以至如此遂欲奔魏妻曰不可君本庶人耳先帝相板遇重既數作無禮而復逆自積嫌迹叛求活以此北歸何面見中國人乎衡曰計何所出妻曰琅邪王素好慕名方欲自顯于天下終不以私嫌殺君明矣可自囚詣獄表列前失顯求受罪如此乃當逆見優饒非但直活而已衡從之果得無患又加威遠將軍授以祭戟

宋高祖初表毛修之爲龍驤將軍及劉毅鎮江陵以修之爲軍司馬輔國將軍修之雖爲毅將佐而深自結于高祖高祖討毅先遣王鎮惡襲取江陵修之與諮議參軍任集之等竝爲毅力戰高祖宥之

文帝時垣護之爲江夏王義恭征北行參軍北高平太守以載禁物繫尚方久之蒙宥

明帝初在藩以戴明寶爲典籤甚爲所任及事平坐參掌戎務多納貨賄削所封爵繫尚方尋赦宥復爲安陸太守

太始初王敏則爲直閣將軍坐捉刀入殿啓事繫尚方十餘日乃復直閣

劉係宗爲竟陵王誕子景粹侍書誕舉兵廣陵城內皆歿勅沈慶之赦係宗以爲東宮侍書

南齊武帝時虞棕爲散騎嘗侍太子右卒永明八年



大水百官戎服救太廟惊朱衣乘車鹵薄於宣揚門外行馬內驅打人爲有司所奏特見原

柳世隆爲湘州刺史在州立邸治爲中丞庾杲之所奏詔原不問

東昏侯永元元年陳顯達爲侍中太尉北伐敗郢御史中丞范岫奏免顯達官朝議優詔答曰昔衛霍出塞往往無功馮鄩入關有時虧喪况公規謀蕭舉朝寄蕪浮見可知難無損威略方振遠圖廓清朔土雖執憲有嘗非所得議顯達表解職不許降號又不許以顯達爲都督江州軍事江州刺史鎮湓城持節本官如故

梁高祖天監三年丘遲爲永嘉太守在郡不稱職爲有司所糾高祖愛其才寢其奏

蕭穎達爲太子左衛率啓乞魚軍稅御史中丞任昉奏請以見事免穎達所居官以俟還第高祖詔原之陳高祖初受禪梁國子博士領步兵較尉沈文阿輒棄官還武康高祖大怒發使往誅之時文阿宗人沈恪爲郡請使者寬其死卽面縛鎖致於高祖高祖視而笑曰腐儒復何爲者遂赦之

永定元年十一月西討都督周文育侯安都於郢州



大水百官戎服救太廟棕朱衣乘車鹵薄於宣  
外行馬內驅打人爲有司所奏特見原

柳世隆爲湘州刺史在州立邸治爲中丞庾杲之所  
奏詔原不問

東昏侯永元元年陳顯達爲侍中太尉北伐敗郢  
史中丞范岫奏免顯達官朝議優詔答曰昔衛霍出  
塞往往無功馮鄩入關有時虧喪况公規謀肅舉朝  
寄蕪深見可知難無損威略方振遠圖廓清朔土  
執憲有嘗非所得議顯達表解職不許降號又不許  
以顯達爲都督江州軍事江州刺史鎮淦城持節本

官如故

梁高祖天監三年丘遲爲永嘉太守在郡不稱職爲  
有司所糾高祖愛其才寢其奏

蕭穎達爲太子左衛率啓乞魚軍稅御史中丞任昉  
奏請以見事免穎達所居官以俟還第高祖詔原之  
陳高祖初受禪梁國子博士領步兵較尉沈文阿輒  
棄官還武康高祖大怒發使往誅之時文阿宗人沈  
恪爲郡請使者寬其死卽面縛鎖致於高祖高祖視  
而笑曰腐儒復何爲者遂赦之

永定元年十一月西討都督周文育侯安都於郢州



敗績囚于王琳二年二月安都等於王琳所逃歸自

劾廷尉即日引見竝宥之戊寅詔復文育等本官

二年二月南豫州刺史沈泰奔於齊三月甲午詔曰

罰不及嗣自古通典罪疑惟輕布在方策沈泰反覆

無行遐邇所知昔有微功仍荷朝寄割符名郡推轂

累藩漢口班師還居方嶽良田有踰於四百食客不

止於三千富貴顯榮正當如此鬼害其盈天奪其魄

無故猖狂自投獯醜雖復知人則哲惟帝其難光武

有蔽於龐萌魏武不知於于禁但今朝廷無我負人

其部曲妻兒各令復業所在及軍人若有恐脅侵掠

者皆以劫論若有男女口爲人所藏竝許諸臺申訴

若樂隨臨川王及節將立功者悉皆聽許

文帝天嘉元年王琳反奉蕭莊爲王及兵敗俱奔於

齊文帝乃詔蕭莊僞署文武官屬還朝者量加錄序

宣帝時任忠爲豫寧太守衡陽內史華皎之舉兵也

忠豫其謀及皎平帝以忠先有密啓於朝釋而不問

後主時魯廣達爲中領軍隋將韓擒虎之濟江也廣

達長子世貞在新蔡乃與其弟世雄及所部奔擒虎

遣使致書以招廣達時屯兵京師乃自劾廷尉請罪

後主謂之曰世貞雖異路中大夫公國之重臣吾所



恃賴豈得自同熈疑之間乎加賜黃金卽日還營  
北齊高祖義旗初起李義深爲龍驤將軍歸高祖於  
信都以爲大行臺卽中中興初除平南將軍鴻臚少  
卿義深見爾朱兆兵盛遂叛高祖奔之兆平高祖怒  
其罪以爲大丞相府記室參軍

陳元康爲相府功曹參軍時高仲密之叛高祖知其  
謀崔暹故也將殺暹世宗匿而爲之諫請高祖曰我  
爲捨其命須與苦手世宗乃出暹而謂元康曰卿若  
使崔得杖無相見也暹在廷解衣將受罰元康趨入  
歷階而陛且言大王方以天下付大將軍有一崔暹  
不能容忍耶高祖從而宥焉

文宣帝天保中盧潛爲左民卽中坐譏議魏書與王  
松年李庶等俱被禁止會清河王岳將兵救江陵特  
舍潛以爲岳行臺卽還遷中書侍郎

武成帝時王則爲徐州刺史梁遣貞陽侯淵明堰水  
灌城則固守歷時而取受狼籍鑠送晉陽帝恕其罪

悔過

古人有言曰改過不吝蓋所以懲往者之失杜將來  
之非也自卯金絕紐吳蜀爭雄洎宋齊以還南北競  
爽至於興戎創業嚮明史政謀有失策事或過舉乃



至暴怒中發斥棄仁賢率意肆刑外失群望而能深引前咎勿憚改作雖有發矢不追之機噬臍無及之悔然亦來者之可圖也爲人君者能保其國鮮不繇斯而已矣

蜀先主初入蜀於涪大會置酒作樂謂龐統曰今日之會可謂樂矣統曰伐人之國而以爲歡非仁者之兵也先主醉怒曰武王伐紂前歌後舞非仁者耶卿言不當宜速起出於是統逡巡引退先主尋悔請還統復故位初不顧謝飲酒自若先主謂曰向者之論何難爲失統對曰君臣俱失先主大笑宴樂如初

章武元年先主將伐吳黃權諫曰吳人悍戰又水軍順流進易退難臣請爲先驅以嘗寇陛下宜爲後鎮先主不從以權爲鎮北將軍督江北軍以防魏師先主自在江南及先主軍敗引退而道隔絕權不得還故率所將領降于魏有司執法自收權妻子先主曰孤負黃權權不負孤也待之如初

吳大帝初爲吳王黃武中騎都尉虞翻性疏直權積怒非一遂徙交州翻雖在徙棄心不忘國嘗憂五谿宜討以遼東海絕聽人使來屬尚不足取令去人財以求馬旣非國利又恐無獲欲諫不敢作表以示呂



岱岱不報為愛憎所白復徙蒼梧猛陵後權遣將士  
 至遼東於海中遭風多没失權悔之乃令曰昔趙簡  
 子稱諸君之唯唯不如周舍之諤諤虞翻亮直善於  
 盡言國之周舍也前使翻在此此後不成促下問交  
 州翻若尚存者給其人船發遣還都若以亡者送喪  
 還本郡使兒子仕官會翻已終歸葬舊墓妻子乃得  
 還

嘉禾元年十月魏遼東太守公孫淵遣使稱藩於權  
 權遣張彌許晏至遼東拜公孫淵為燕王婁侯張昭  
 初諫權卒遣之昭忿言之不用稱疾不朝權恨之上

塞其門昭又於內以土封之淵果殺彌晏權數慰謝

昭昭固不起權因出過其門呼昭昭辭疾篤權燒其  
 門欲以恐之昭更閉戶權使人滅火任門良久昭諸

子共扶昭起權載以復還官深自克責

吳呂壹嘉禾中為較事權信任之壹性苛慘用法深

刻太子登數諫權不納大臣繇是莫敢言後壹姦罪

發露伏誅權引責躬

一云典較呂壹竊弄權柄擅作威福大將軍陸遜與太常潘濬

同心憂之言至流涕後權誅壹深以自責

陸遜赤烏中為荊州牧太子有不安之議遜上疏陳  
 太子正統宜有金石之固魯王藩臣當使寵秩有差



彼此得所上下獲安謹叩頭流血以聞書三四上及帝詣都欲口論適庶之分既不聽許而遜外甥顧譚顧承姚信竝以親附太子在見流徙太子太傅吳粲坐數與遜交書下獄歿權遣中使責讓遜遜憤恚致卒後遜子抗爲中郎將屯柴桑太元元年就都治病病瘥當還權涕泣與別謂曰吾前聽用讒言與汝父大義不篤以此負汝前後所問一焚滅之莫令人見也

宋文帝元嘉二十七年十二月魏大武率大衆至瓜步聲欲渡江都下震懼咸荷擔而立始議北侵朝士多有不同至是帝登烽火樓極望不悅謂江湛曰北伐之計同議者少今日士庶勞怨不得無慙貽大夫之憂在予過矣

明帝泰始二年正月徐州刺史薛安都旣降魏後遣使歸順帝遣張永率軍迎之尚書右僕射蔡典宗曰安都遣使歸順此誠不虛今宜撫之以和卽安所益不過須單使及咫尺書耳若以重兵迎之勢必疑懼或能招引北虜爲患不測時張永已行不見從安都聞大軍過淮嬰城自守要取後魏永戰大敗又值寒雪歿者十八九遂失淮北四州永敗問至帝在乾明



殿先召司徒建安王休仁又召興宗謂休仁曰吾慙  
蔡僕射以敗書示興宗曰我愧卿

南齊武帝永明元年五月誅車騎將軍張敬兒初敬  
兒妻謂敬兒曰昔時夢手焚如火而君得南陽郡元  
徽中夢半身焚而君得本州今復夢舉體焚矣有關  
人聞其言說之事達帝敬兒又遣與蠻中交關帝疑  
其有異志勅朝臣華林八關齊於坐收敬兒誅之後  
數年帝與豫章王嶷三日曲水內晏昨舫船流至御  
坐前覆沒帝繇是言及敬兒悔殺之

系惠素武帝時爲少府卿勅市銅官碧青一千二百  
斛供御畫用錢六十五萬有讒惠素納利武帝怒勅  
尚書評價貴二十八萬餘有司奏伏誅歿後家徒四  
壁帝後知無罪甚悔恨之

時元帝承聖中以荆湘疑上命領軍將軍王僧辯及  
鮑泉討之僧辯謂泉曰非精兵一萬不足以制之我  
竟陵甲士已遣召之帝性嚴忌微聞其言以爲遷延  
不肯去稍已含怒及僧辯將入謂泉曰我先發言君  
可見係泉又許之及見帝帝迎問曰卿已辦乎何日  
當發僧辯具對如向所言帝大怒案劔厲聲曰卿憚  
行耶因起入內泉震怖失色竟不敢言湏臾遣左右



數十人收僧辯旣至謂曰卿拒命不行是欲同賊今  
唯有死耳僧辯對曰僧辯食祿旣深憂責實重今日  
就戮豈敢懷恨但恨不見老母帝因斫之中其左脾  
髀音流血至地僧辯悶絕久之方蘇卽送付廷慰竝收  
其子姪竝皆繫之會岳陽王軍襲江陵人情搔擾未  
知其備帝遣左右往獄問計於僧辯僧辯具陳方略  
帝卽赦爲城內都督

後梁宣帝初爲岳陽王鎮襄陽與西魏柱國于謹伐  
江陵平之帝將尹德毅說帝請于謹等爲歡豫伏武  
士因而斃之分命果毅掩其營壘斬馘遺醜帝不從  
謂德毅曰卿之此策非不善也然魏人待我甚厚豈  
可背德若遽爲卿計則鄧祁侯所謂人將不食吾餘  
也旣而闔城長幼被虜入關又失襄陽之地帝乃追  
悔曰恨不用尹德毅之言以至於是大師公時山入  
陳宣帝大建中間五兵尚書毛喜曰我欲進兵彭汴  
於卿意如何喜對以不若安民保境寢兵復約帝不  
從後吳明徹陷周帝深悔之謂袁憲曰不用毛喜計  
遂令至此朕之過也

初吳明徹北伐克捷帝以爲河南可定通事舍人蔡  
景歷諫稱師老將驕不宜過窮遠略帝惡其沮衆大



怒出爲豫章內又徙會稽及明徹敗帝追憶景歷前  
言卽日追還復以爲征南鄱陽王諮議參軍數日遷  
員外散騎嘗侍兼御史中丞復本封爵

北齊神武將圖關右與鎮北將軍段榮密謀榮盛稱  
未可及涓曲失利神武悔之曰吾不用段榮之言以  
至於此

陳元康爲尚書右丞初從神武破周太祖於却山大  
會諸將議進退策咸以爲野無青草人馬疲瘦不可  
遠追元康曰兩雄交爭歲月已久今得大捷便是天  
授時不可失必須乘勝追之神武曰若遇伏兵孤何

以濟元康曰王前沙苑還軍彼尚無伏今奔敗若此  
何能遠謀若捨而不追必成後患神武竟不從及疾  
篤謂文襄曰却山之戰不用元康之言方貽汝患以  
此爲恨死不瞑目

文宣帝天保初中書舍人元文遙忽有中旨幽執竟  
不知所繇如此積年帝後自幸禁獄執手愧謝親解  
所着金帶及御服賜之卽日起爲尚書祠部郎中

梁太祖初爲梁王唐天祐二年十月自襄州引軍繇  
光州路趨淮南將發判官敬翔切諫請班師以全軍  
勢帝不聽及次于棗陽遇大雨頗阻師行之勢軍至



壽春壽縣堅壁清野以待帝軍帝乃退舍於正陽十  
一月大軍北濟帝至汝陰深悔淮南之行

冊府元龜

巡按福建監察御史臣李嗣京 訂正

分守建南道左布政使臣胡維霖 叅閱

知建 陽 縣事 臣 黃國琦 較釋

閏位部

旌表 明賞 延賞

旌表

周書云表厥宅里樹之風聲蓋所以彰德而揚善也  
自古令王率行茲道若乃雄視區宇裂疆鼎峙餘分  
應曆希古崇教何嘗不旌別懿行敵厲風俗其有先



賢餘俗拱木斯存忠臣英烈碎首不屈孝感發乎誠性義讓與於閭里固守儉行高避世紛博施以周惡居身以挺操者莫不嚴其祠祀申之賻禮臨弔加謚廩給賜爵優錫異等給復累世故雖匹夫之特其敢忽諸

秦始皇時巴蜀寡婦清其先得丹穴

涪陵出丹

而擅其利

數世家亦不貨清能守其業用財自衛不見侵犯帝以爲貞婦而客之爲築女懷清臺

宋高祖初爲宋公北征軍次晉城經張良廟令曰夫

盛德不泯義在祀典微管之歎無事彌深張子房道

亞黃中灼鄰殆庶風雲玄感蔚爲帝師大拯橫流夷

項定漢固以參軌伊望冠德如仁若乃神交圯上道

契商維顯嘿之間窈然難究源流淵浩莫測其端矣

塗次舊沛佇駕留城靈廟荒殘遺像陳昧撫迹懷人

慨然永歎過大梁者或佇想於夷門遊九原者亦流

連於隨會可改構椽桷脩飾丹青蘋蘩行潦以時致

薦以紓懷古之情存不刊之烈

永初元年追封王鎮惡爲龍陽縣侯食邑千五百戶

初鎮惡爲沈田子所害高祖表於天子曰故安西司

馬征虜將軍王鎮惡志節亮直機畧明舉自築名州



府屢著成績荆南遘釁勢據上流難與疆藩憂兼內  
侮鎮惡輕舟先邁神兵電臨盱食之虞一朝霧散及  
王師西伐有事中原長驅雒陽肅清湖陝入渭之捷  
指麾無前遂廓定咸陽俘執僞主克城之效莫與爲  
疇實干城所寄國之方召也近北虜遊魂寇掠渭北  
統率衆軍曜威撲討賊旣遠奔還次涇上故龍驤將  
軍沈田子忽發狂易奄加乃害忠勲未究受禍不圖  
痛惜兼至惋悼無已伏惟聖懷爲之傷惻田子狂悖  
卽已備憲鎮惡誠著艱難勲參前列殊績未酬宜蒙  
追寵願勅有司議其褒贈於是追贈左將軍青州刺  
史至是帝受命又追封焉

文帝初卽位詔曰乃者權臣陵縱兆亂基禍故吉陽  
令張約之抗疏矢言至誠慷慨遂事屈羣醜殞命遐  
疆志節不申感悼無至昔關老奏書見紀漢策閻纂  
獻規荷榮晉代考其忠槩參近前蹤宜加旌顯式揚  
義烈可贈以一郡賜錢十萬布百疋

元嘉三年贈會稽諸暨人賈思天水郡顯親縣左尉  
思母亡居喪過禮未葬爲隣火所逼思及妻栢氏號  
哭奔救隣近赴助棺襯得免思及栢俱見燒死有司  
奏改其里爲孝義里蠲租布三世繇是追贈



四年改吳與人奮綜所居之里爲純孝里蠲租布三世綜孫恩亂與父俱逃父老不能去謂綜速去無竝灰綜不忍迎賊叩頭曰父年老乞賜生命賊義而舍之故有是命

是年勅榜表會稽永興人郭世道閭門蠲其租調改所居獨楓里爲孝行里又榜會稽山陰人嚴世期門曰義行嚴氏之間復其身徭役蠲租稅十年世期少有孝行母亡負土成墳仁原之風行於鄉里大小莫敢呼其名者會遣大使巡行天下散騎嘗侍袁愉表其傳行帝嘉之故有是命世期好施慕善出自天然

同里張邁兄弟三人妻各產子時歲饑歎慮不相存欲棄而不舉世期聞之馳往拯救分食解衣以贍其乏三子竝得成長同縣俞陽妻莊年九十莊女蘭七十竝各老病單孤無所依世期衣服之二十餘年灰竝殯葬宗親嚴弘鄉人潘伯等十五人荒年竝饑灰露骸不收世期買棺哭殯埋存育孩幼山陰令何曼之表言之故有是命

八年詔曰故綏遠將軍晉壽太守郭啓玄往街命虜庭秉意不屈受任白水盡勤靡懈公奉私餼纖毫弗納布衣蔬食飭躬惟儉故超受顯邦以甄庶績而介



誠苦節始終匪貳身歿之日妻子凍餒志操殊俗良可哀悼可賜其家穀五百斛

二十五年幸江寧經劉穆之墓詔曰故侍中司徒南康文宣公穆之秉德佐命翼亮景業謀猷經遠元勳克茂功銘鼎彝義彰典策故已嗣徽前哲宣風後代者矣近因遊踐瞻其塋域九原之想情深悼歎可致祭墓所以申永懷

二十六年幸丹徒遣使祭晉故司空忠肅公何無忌之墓

孝武帝即位初詔曰日者逆豎犯躡覺變卒起廣威將軍關中侯卜天興提戈赴難挺身奮節斬殪凶黨而旋受刃勇冠當時義侔古烈興言追悼傷痛予心宜加甄贈以旌忠節贈龍驤將軍益州刺史謚曰壯侯帝親臨哭給天興家長稟初天興為廣威將軍領左細伏兼帶營祿元凶劾入弒事變倉卒舊將羅訓徐罕皆望風屈附天興不暇被甲執刀持弓疾呼左右出戰徐罕曰殿下入汝欲何為天興罵曰殿下嘗來云何即時方作此語只汝是賊手射劬於東堂幾中逆徒擊之臂斷倒地乃見殺其隊將張泓之朱道欽陳滿與天興同出拒戰並死故有是命又詔曰徐



湛之江湛王僧綽

湛之等以議廢立事為元凶邵所害

門戶荼酷遺孤

流寓言念既往感痛無深可令歸居本宅厚加卹賜

於是三家長給廩又詔曰司徒故左長史張敷正心

簡立幼樹風規居哀毀滅孝道淳至互在追甄於以

報美可追贈侍中仍改其所居稱為孝張里敷與

人父亡成服九十餘日始進水漿葬畢不進蔬菜遂

毀瘠成疾伯父茂度每譬止之敷益更感慟絕而復

續茂度曰我輩譬汝有益但更甚耳自是不復往來

未暮年而卒又詔曰夫輕道重義亟聞其教世獎國

危希遇其人自非達義之至識正之深者孰能抗禦

衛王遺身固節者哉故太子左衛卒袁淑文辯優給

秉忠貞慤當要逼之切意色不撓厲辭道逆氣震兇

黨霍乃交至取斃不移古之懷忠殞難未有出其右

者興言嗟悼無廢乎心宜在加禮永旌宋有臣焉可

贈侍中太尉謚曰忠憲公淑為元凶邵所殺故有是

命

大明二年改晉陵人余齊民所居之里為孝義里齊

民為邑書吏父殖在家病亡家人以父病報之信未

至齊民謂人曰比者內痛心煩有若割截居嘗遑駭

必有異故信尋至便歸四百餘里其日而至門方知



父歿號踊慟絕良久乃蘇問母父所遺言母曰汝父臨終恨不見汝曰相見何難於是號叫殯所須臾便絕州郡上言有司奏曰收賢旌善萬代無殊心至自天古今豈異齊民至性繇中情非外感淳精凝至深心天徹跪訊遺旨一慟殞亡雖迹異參柴而誠均丘趙方今化淳以禮治本惟孝靈祥歸應其道先彰齊民越自氓隸行貫生品旌閭表墓允出在茲改其里爲孝義里蠲租布錫其母穀百斛從之

五年行幸經殷景仁墓詔曰故司空文成公景仁德量淹正風識明允徽績忠謨夙達光炤惠政茂舉寔稱民屬近瞻丘墳感往興悼可遣使致祭又經王弘等墓下詔曰故侍中中書監大保錄尚書事揚州刺史華容文炤公弘德猷光仰鑒識明遠故散騎嘗侍左光祿大夫太子詹事豫章文侯曇首夙尚恬素理心身正茲綢繆先眷契濶屯夷內亮王道外流徽譽以國圖令勲民思茂惠朕薄巡都外瞻覽墳塋永言想慨良深于懷便可遣使致祭墓所

七年車駕幸南豫州詔遣祭晉大司馬桓溫征西將軍毛璩墓明帝卽位初以枌元景爲前廢帝所害詔曰故侍中尚書令驃騎大將軍巴東郡開國公新除



開府儀同三司南豫州刺史元景風度弘簡體屬浮  
沉正義亮時恭素範物幽明道盡則首贊孝圖盛運  
開曆則毗熒皇化方任乎漢輔業懋殷衡而蜂狄肆  
濫顯加禍毒寃動勳烈悲深朝貫朕承七廟之靈纂  
臨寶業情典旣申痛悼彌軫宐崇賁徽冊以旌忠懿  
可追贈侯持節都督南豫江徐三州諸軍事太尉侍  
中刺史公如故給班劍三十人羽葆鼓吹一部謚曰  
忠烈公又以故侍中太尉沈慶之爲廢帝所害追贈  
侍中司空謚曰襄公

泰始三年徐州刺史薛安都反遣信要引魏魏遣尉  
遲荀人等救之安都降魏初安都起兵長史蘭陵儼  
密欲圖之見殺安都未向桑乾前軍裴祖隆謀殺荀  
人舉彭城歸順事洩見誅負外散騎侍郎孫耿之往  
安都從子索肥戰歿及劉彌之張靈慶皆戰敗見殺  
竝爲帝所哀追贈儼光祿勳祖隆寧朔將軍交州刺  
史耿之羽林監彌之輔國將軍青州刺史寧慶寧朔  
將軍冀州刺史

南齊太祖建元三年遣兼散騎嘗侍虞炎等十二部  
使行天下表列公孫僧遠等二十三人詔竝表門閭  
蠲租稅公孫僧遠會稽剡人事父母以孝聞弟卞無



以葬身販貼與鄰里共歛送之費兄妹未婚嫁乃自賣爲之成禮

華寶晉陵無錫人父豪義熙末戍長安寶年八歲臨別謂寶曰須我還當爲汝上頭及長安陷歿寶年至七十不婚冠或問之者輒號慟彌日不忍答也薛天生劉懷裔亦晉陵人天生母遭艱菜食天生亦菜食母未絕喪而死天生終身不食魚肉與弟有恩義懷裔與弟懷則年十歲遭父喪不絮帛不食鹽菜吳欣之晉陵利城人宋元嘉末弟尉之爲武進縣戍隨王誕起義太祖遣軍王華欽討之吏民皆散尉之獨留

見執將死欣之詣欽乞代弟命辭度哀切兄弟皆見原吳達之義與人姨亡無以葬自賣爲十夫客以營冢槨從祖弟敬伯夫妻荒年被略賣江北達之有田十畝貨以贖之與之同財共宅郡命爲主簿因以讓兄又讓世業舊田與弟弟亦不受田遂閉廢韓係伯以桑枝蔭妨他地遷界上開數尺鄰畔隨復侵之係伯輒更改種久之鄰人慙愧還所侵地躬往謝之孫淡太原人僑居長沙事母孝母疾不眠食以痊爲期母哀之後有疾不使知也

蔣雋之妻黃氏義與人夫亡不重嫁家道之欲赴水



自殺乃止

封延伯者僑居東海三世同財爲北州所宗附義興  
陳玄子四世一百七口同居武陵郡榮興文獻叔八  
世同居東海徐生武陵范安祖李聖伯范道眼五世  
同居零陵譚弘寶衡陽何弘華陽楊黑頭疎從四世  
同居竝共衣食

標世隆以母憂去職太祖踐祚起爲平南將軍南豫  
州刺史進爵爲公帝手詔與司徒褚淵曰向見世隆  
毀瘠過甚殆欲不可復職非直使人惻然實亦世珍  
國寶也淵答曰世隆至性而深哀過乎禮事陛下在  
危盡忠喪親居憂杖而後起立人之本二天同極彌  
榮增寵足以厲俗敦風

張瓌爲吳興太守瓌以既有國秩不取郡俸太祖勅  
上庫別藏其俸以表其清

武帝永明元年詔曰魏芬袁紹恩洽丘墳晉亮兩王  
榮單餘裔二代弘義前載美談袁粲劉秉竝與先朝  
同獎宋室沈攸之於景和之世特有乃心雖未節不  
終而始誠可錄歲月彌往空軫優隆粲秉前年改葬  
塋兆未修材槨可爲經理粗令周禮攸之及其諸子  
喪柩在酉者可符荊州送返舊墓在所爲塋葬事親



是年又詔會稽永興兒翼之母丁表門閭蠲租稅丁少喪夫性仁愛遭年荒分衣食以餉里中饑餓者鄰里求借未嘗違之同里陳穰父母歿孤單無親戚丁收養之及長爲營婚娶又同里王禮妻徐荒年客死山陰丁爲置棺器自往歛葬元徽末大雪商旅斷村里比屋饑丁自出鹽米計口分賦同里左僑家露四喪無以葬丁爲辦塚槨有三調不登者代爲輸送丁長子婦王氏守寡執志不再醮州郡上言有詔蠲表五年詔曰龍驤將軍安西中兵參軍松滋令蕭叡所愛敬淳淳色養盡禮喪過乎哀遂致毀滅雖未達名教而一至可愍宜加榮命以旌善人可贈中書郎敕明少有至性奉親謹篤母疾躬禱夕不假寐及亡不勝哀而卒故有是贈

鬱林王卽位初吳興太守孔瑋之表曰故鄣人王文殊性挺五嘗心符三教以父沒獯庭懷絕身之痛專席嘗居御罔極之卹服紵縞以經年餌蔬菽以俟命婚義滅於天情官序空於素抱儻降甄異之恩勝其閭里有詔榜門改所居爲孝行里

明帝建武三年蜀郡王續祖華陽郝道福竝累世同慶詔表門閭蠲調後又吳興乘公濟妻姚氏生二男



而公濟及兄公願乾伯竝卒各有一子欣之天保姚  
養育之賣田宅爲取婦自與二男寄止鄰家詔其爲  
二子婚仍加蠲詔時司徒東閣祭酒廬陵王主簿江  
猜居父憂以孝聞廬于墓側帝勅遣杖二十人防墓  
所王虛之廬江人十三喪母二十三喪父二十五年  
鹽酢不入口庭中楊梅隆冬三實每夜所居有光如  
燭永明中詔榜門蠲其三世

和帝中興三年以故侍中中書監徐孝嗣謀廢東昏  
未決竝子演况遇害贈太尉侍中中書監如故二年  
孝嗣改葬宣德太后詔贈班舞四十人加羽葆鼓吹  
謚文忠改封餘于縣公贈子演侍中謚簡世子况散  
騎侍郎

梁高祖初爲雍州刺史州人韋愛遭母憂廬于墓側  
負土起墳帝聞之親往臨吊

天監元年陸璉奉使巡行風俗表言豫章南昌人滕  
曇恭母卒水漿不入口晝夜哀慟曇恭有子三人皆  
有行業又長沙臨湘人徐普濟居喪未及葬而鄰家  
火延其舍普濟號慟伏棺上以身蔽火鄰人往救之  
焚炙已悶絕累日方蘇

宣城宛陵有女子與母同牀寢母爲猛獸所搏女號



叫拏獸獸毛盡落行十數里獸乃棄之女抱母還猶有氣經時乃絕太守蕭琛賻焉表言其狀竝有詔旌其門閭

大通四年詔曰旌善表行前王所啟新野庾詵荆山珠玉江陵杞梓靜疾南渡固有名德獨身苦節孤芳素履奄隨運任惻愴于懷宓謚貞節處士以顯高烈帝少與詵善雅重之起義署爲平西府記室普通中徵爲中書侍郎皆稱疾不起及卒遂有是詔

周捨爲太子詹事時南津獲武陵太守白渦書許遺捨錢百萬津司以聞雖書自外入猶爲有司所奏免

官旣卒贈侍中高祖詔曰故侍中獲國簡子捨義該玄儒博窮文史奉親能孝事君盡忠歷掌機密清身自居食不重味服靡無衣淪亡之日內無妻妾外無田宅兩兒單貧有過古烈往者南司白渦之劾恐外議謂朕有私致此黜免追愧若人一介之善可量加褒異以旌善人

荀匠丁父兄服歷四年不出戶哭泣目皆爛郡縣以狀言高祖詔遣中書舍人爲其除服擢爲豫章王國左嘗侍匠雖卽吉毀悴逾甚外祖孫謙誠之曰王上以孝治天下汝行過古人故發明詔擢汝此職非唯



君父之命難拒故亦揚名後世所顯豈獨汝身哉匠於是乃拜

沈崇僚吳興武康人母卒廬於墓側自以家貧初行喪禮不備復以葬後更治服三年久食麥屑不噉鹽醢至卧於單薦因虛腫不能起郡縣舉其至孝高祖聞之卽遣中書舍人慰勉之乃下詔曰前軍後軍沈崇僚少有志行居喪踰禮齊制不終未得大葬自行乞淹年哀典多闕方欲以永墓之辰更爲再葺之禮雖卽情可矜而禮有明斷可更令除釋罷補太子洗馬旌彼門閭啟茲風教崇僚奉詔釋服而涕泣如居喪固辭而受官苦自陳讓

甄恬江陵人喪父廬于墓側州將始興王憺表其行狀高祖詔曰朕虛已欽賢寤寐盈想詔彼辟岳務盡搜揚恬旣孝行殊異聲著邦壤敦風厲俗弘益茲多牧守騰聞義同親覽可旌表室閭加以爵位

臧盾有孝性隨父宿直於廷尉母劉氏在宅夜暴亡左右手中指忿痛不得寢及曉宅信果報凶問其感通如此服制未終父又卒盾居喪五年不出廬戶形骸枯瘠家人不復識鄉人王端以狀聞高祖嘉之勅累遣抑警服闋除丹陽尹丞



元帝承聖初追贈故吳興太守張暉侍中中衛將軍  
開府儀同三司謚曰忠貞子初太清二年侯景圍臺  
城暉遣弟伊率郡兵千人赴援景遣侯子鑒率精兵  
二萬擊暉為賊所害賊平乃有是命

陳宣帝時改王知玄所居清苦里為孝家里知玄太  
原人僑居于會稽剡縣居家以孝聞及丁父憂哀毀  
而卒故有是命

後主至德元年詔曰李陵矢竭不免請降于禁水漲  
猶且生獲固知用兵上術世罕有人故侍中司空南

平郡公明敏

明徹吳

爰初

躡足

迄留

元戎

百戰

百勝

之寄決機決死之勇斯亦作於古焉及招定淮淝長  
驅彭汴覆勅寇如舉毛掃銳師同沃雪風威冒於異  
俗功效著於同文乃欲息駕陰山解鞍瀚海旣而歸  
出已老數亦終奇不就結纓之捐無辭入訪之屈望  
封嶠之為易與平澤之非難雖志在屈伸而菴中霜  
露埋恨絕域堪可嗟傷斯事已往累逢肆赦凡厥罪  
戾皆蒙洒濯獨此孤魂未霑寬惠遂使爵土湮沒饗  
醴無主棄遐錄用宜在茲辰可追封邵陵縣開國侯  
食邑一千戶以其恩惠覺為嗣明徹為隋師所執卒  
於長安故有是命



東魏靜帝武定末高貞與弟謚俱至孝父亡治喪墓次并露白雉降集焉有司以聞詔標間里

北齊神武爲東魏丞相時尉興敬爲帳內都督神武敗周文於邳山興敬爲流矢所中卒贈涇岐幽三軍事爵爲公謚曰閔莊神武哀惜之親臨弔賜其妻子祿如興敬存焉

文宣帝受禪初詔故太傅孫騰故太保尉景故大司馬婁昭故司徒高昂故尚書左僕射慕容紹宗故領軍萬侯干故定州刺史段榮故御史中尉劉貴故御史中尉竇太故殷州刺史劉豐故濟州刺史蔡雋等

竝左右先帝經贊皇墓或不幸早歿或殞身王事可遣使者就墓致祭竝撫問妻子慰遠存亡

天保元年祭告故贈太尉魏泰之墓泰初從神武西討爲周文所襲自殺妻武平妻后妹也泰雖以親見幸而功名自建

陸彥師字雲房初仕後魏爲襄城王元旭參軍以父難去職哀毀殆不勝喪與兄邛廬於墓次負土成墳公卿重之多就墓側存問晦朔之際車馬不絕文宣聞而加歎旌表門閭號其所任爲孝終里

武成帝以清河王岳顯祖時爲高歸彥讒構憂悸而



薨後歸彥反世祖知其所譖曰清河忠烈盡力皇家而歸彥毀之間吾骨肉籍沒歸彥以良賤百口賜岳家又後思岳之功重贈太師太保

梁太祖開平元年十二月詔故荆南節度使守中書令上谷王周訥贈太師故武昌軍節度使兼中書令西平王杜洪贈太傅先是鄂渚再為淮夷所侵攻圍甚惡杜洪以兵食將盡繼來乞師帝料其隔越大江難以赴援無以荆州據上游多戰艦去江夏甚邇因命周訥舉舟師公流以救之訥於是引兵東下纔及鄂界遇朗州背盟作亂乘江陵之虛縱兵襲破之俘掠且盡既而訥士卒知之皆顧其家咸無鬪志遂為淮寇所敗將卒潰散訥忿恚自投于江訥之本姓犯

文穆皇帝廟諱臣欽若等曰訥本姓成至是因追贈以其系出

周文故賜姓周氏及訥兵敗之後武昌以重圍經年糧盡力困救援不至訖為淮寇所陷載洪以送淮賜遂殺之此二鎮也皆以忠節歿於王事帝每言諸藩屏豫經綸之業必有首痛訥洪之薨至是追贈之優深加軫悼各以其子孫宗屬錄用焉

三年八月贈故山東道節度使留後王珪太保贈故同州觀察判官盧匪躬工部尚書班故河陽將累以



革功為郡守主留事於襄陽為小將王求所殺匪嘗為劉知俊判官知俊反不偕行為亂兵所害

是年贈牢牆使

梁祖諱誠故日牢牆

王仁嗣司空故同州押衙

史肇右僕射押衙王彥洪高漢詮丘奉言仇瓊竝刑部尚書王筠御史司憲初知俊將叛謀會諸將詢所宜仁嗣等持正不撓悉羅其酷至是褒贈之

明賞

夫爵以報德賞以報功益百王不易之令典也而况閏位之君臨御非廣鄰有疆國下覽群心儻非示彼寬仁厚其褒賞則何以致文武之輸誠被眾庶之為服所以當旋凱而振旅也則行飲至策勳之禮或指宇而開邑也則施疏爵疇庸之典故使忠義激於肝腸華罷浹於家族捨此道也其可濟乎

秦始皇初為秦王二十年燕太子丹使荆軻獻督亢之地圖軻既取圖奏之秦王發圖圖窮而匕首見荆軻逐秦王秦王環柱而走群臣皆愕卒起不意盡失其度而秦法羣臣侍殿上不得持尺寸之兵軻乃逐秦王而卒惶急無以擊軻而以手共搏之是時侍醫夏無且以其所奉藥囊提荆軻也左右既前殺軻秦王不治者良久已而論功賞群臣及當坐者各有差



而賜夏無且黃金二百鎰曰無且愛我乃以藥囊提荆軻也

蜀先主定益州賜諸葛亮法正張飛關羽金各五百觔銀千觔錢五千萬錦千匹其餘班賜各有差

西蜀圖成

都劉璋出降蜀中殷盛先主置酒大饗士卒取蜀中金銀分賜將士還其穀帛

吳大帝黃武五年攻石碣孫奭為揚武將軍領江夏太守以地主使所部將軍鮮于丹陽五千人先斷淮道自帥吳碩張梁五千人為軍前鋒降高城得三將大軍引還大帝詔使在前任駕過其軍見奭軍陣整齊帝歎曰初吾憂其遲鈍今治軍諸將少能及者吾

無憂矣拜揚武將軍封沙羨侯吳碩張梁皆裨將軍賜爵關內侯

景帝初封琅邪王廢帝廢孫琳使宗正孫楷中書郎董朝迎帝即位永安元年十月壬午詔曰夫褒德賞功古今通義其以大將軍繒為丞相荆州牧增食五縣武衛將軍恩為御史大夫衛將軍中軍督封縣侯威遠將軍授為右將軍縣侯偏將軍幹雜號將軍亭侯長水校尉張布輔道勤勞以布為輔義將軍封永康侯董朝親迎封為鄉侯

十一月帝聞孫琳逆謀陰與張布圖計十二月誅琳



已巳詔以左將軍張布討姦臣加布為中軍督封布弟惇為都亭侯給兵三百人惇弟恂為較尉

後主大帝孫和子也初封烏程侯景帝薨丞相濮陽

興左將軍張布迎立之元興元年八月以上大將軍

施續大將軍丁奉為左右大司馬張布為驃騎將軍

加侍中諸增位班賞一皆如舊

宋高祖踐祚思佐命之功詔曰散騎嘗侍尚書僕射

鎮軍將軍丹陽尹徐羨之監江州豫州之西陽新蔡

諸軍事撫軍將軍江州刺史華容侯王弘散騎嘗侍

護軍將軍作唐男檀道濟中書令領太子詹事傅亮

侍中中領軍謝晦前左將軍江州刺史互陽侯檀韶

使持節雍梁南北秦四州荊州之河北諸軍事後將

軍雍州刺史關中侯趙倫之使持節督北徐兗青三

州諸軍事征虜將軍北徐州刺史南城男劉懷慎散

騎嘗侍領太子左衛率新淦侯王仲德前冠軍北青

州刺史安南男向彌左衛將軍潯陽男劉粹使持節

南蠻較尉恨山子劉彥之西中郎司馬南郡互陽侯

張邵參西中郎軍事建威將軍河東太守資中侯沈

林子等或忠規遠謀扶贊洪業或肆勤樹績弘濟艱

難經始圖終勳烈惟茂竝互與國同休饗茲大賚羨



之可封南昌縣公弘可華容縣公道濟可改封永循縣公亮可建城縣公晦可武昌縣公食邑各二千戶詔可更增邑二千五百戶仲德可增邑二千二百戶懷慎彥之各進爵爲侯粹改封建安縣侯竝增邑千戶倫之可封霄城縣侯食邑千戶邵可封臨沮縣伯林子可封漢壽縣伯食邑六百戶開國之制率循舊章羨之遷尚書令揚州刺史加散騎嘗侍進位司空錄尚書事嘗侍刺史如故

明帝初卽位下詔曰夫良圖宣國賞崇彛命殊績顯朝榮勳王府安南將軍江州刺史王景文風度淹粹

理授清暢體無望實誠備夷岨寶曆方啓密贊義機妖徒干紀豫毗廟畧宜登茅社永傳厥祚朕澄氛寧極實資多士䟽爵疇庸寔膺微烈尚書左僕射領衛尉蔡興宗識懷詳正思局通敏吏部尚書領太子左衛率褚淵器情閑茂風業昭遠竝謀參軍政績亮時艱拓宇開邑寔允勳典景文可封江安縣侯食邑八百戶興宗可始昌縣伯淵可南城縣伯食邑五百戶景文固讓不許乃受五百戶

南齊太祖建元元年四月卽位五月詔封佐命文武功臣新除司徒褚淵等三十一人進爵增戶各有差



明帝建武末王敬則叛逆既敗封左興盛新吳縣男  
崔恭祖遂興縣男劉山陽湘陰縣男胡松沙陽縣男  
各四百戶賞乎敬則也

梁太祖開平二年十月以行營左廂步軍指揮使賀  
瓌爲左龍虎統軍以左天武軍夾馬指揮使尹皓爲  
輝州刺史以右天武都頭韓塘爲神捷指揮使左天  
武第三都頭胡賞爲右神捷指揮使仍賜帛有差以  
解晉州圍之功也

三年六月同州節度使劉知俊據郡叛知俊第內直  
右保勝指揮使知浣自維奔至潼關右龍虎軍十將

張溫以上二十二人於潼關擒獲劉知浣送至行在  
勅知浣逆黨之中最爲頭角龍虎軍親兵之內實冠  
爪牙昨者攻取潼關率先用命尋則擒獲知浣最上  
立功頗壯軍威將除國難所懸賞格便可支分許賜  
官階固須除授但昨捉獲劉知浣是張溫等二十二  
人一時向前共立功効其賞錢一千貫文數內一百  
貫文與最先打倒劉知浣衙官李稠四十三貫文與  
十將張溫二十人各與錢四十二貫八百五十文立  
功勅救命便授郡府亦緣同時立功人數不少所除  
刺史難議徧願宜令逐月共支給正刺史料錢二百



貫文數內十將張溫一人每月與十貫文餘二十一  
人每月每人各分九貫文仍起七月一日以後支給  
人與轉官職仍勘名御分折申奏當與施行

乾化元年九月帝駐相州賞左親騎指揮使張仙右  
雲騎指揮使宋鐸嘗身先陷陣各賜帛

二年三月勅以攻下秦疆縣有功將較杜暉等一十  
一人竝超加簡較官衙官宋彥等二十五人竝超授  
軍職

延賞

夫念功不忘延賞及後邦家之治所以有成人臣之  
心於是知勸雖商周之盛典墳所載未嘗易此也而  
况當艱危之際有戰伐之事或分據於一方或抗衡  
於中國必在總攬豪傑網羅英俊顯忠遂良育才樂  
善而已其有同德之臣一心之士生著功烈沒樹風  
聲思有以答彼忠誠昭斯國典則有軫遺孤卹宗黨  
或錫以土宇或授之冠冕或接於姻婭或修乎廢絕  
益惻隱之至仁不朽之盛德也以至稚流根之滓頌  
錫壤之恩又足以慰罔極之悲成不匱之孝焉

蜀先主時龐統爲軍師中郎將從入蜀進爲圍雒陽  
統率衆攻城爲流矢所中卒先主痛惜言則流涕拜



統父議卽遷諫議大夫

法正爲尚書令卒先主爲之流涕賜子邈爵關內侯董允爲大將軍卒後主痛惜賜子粲爵關內侯

吳大帝時陳武爲偏將軍奮命戰歿帝哀之武子修有武風建安末追錄功臣後封都亭侯

凌操爲破賊較尉從大帝討夏口先登破其前鋒中流矢死子統年十五左右多稱述者帝亦以操死國事拜統別部司馬行破賊都尉使攝父兵

凌統爲偏將軍病卒二子烈封年各數歲帝內養於宮愛待與子同及八九歲追錄統功封烈亭侯還其故兵後烈有罪免封復襲爵領兵

蔣欽爲津右護軍大帝討關羽欽督水軍入沔道病卒帝素服舉哀以蕪湖民二百戶田二百頃給欽妻子子壹封宣城侯

黃蓋領武陵太守加偏將軍大帝踐祚追論其功賜子柄爵關內侯

孫皎爲征虜將軍建安二十四年卒大帝追錄其功封子喬爲丹陽侯

程普爲盪寇將軍卒及大帝稱尊號追論普功封子咨爲亭侯



顧雍為丞相初疾微時大帝令醫趙泉視拜其少子  
 濟為騎都尉雍聞悲曰泉善別死生吾必不起故帝  
 欲及吾目見濟拜也濟襲爵無後絕景帝永安元年  
 詔曰故丞相雍至德忠賢輔國以禮而侯統廢絕朕  
 甚愍之其以雍次子裕襲爵為灋陵侯以明著舊勳  
 朱據為驃騎將軍賜死後二子熊損復為全公生所  
 諸皆死永安中追錄前功以熊子宣襲爵雲陽侯尚

公主

後主即位詔曰故僕射屈晃志扶社稷忠諫忘身封  
 晃子緒為東陽亭侯弟幹恭為立義都尉緒亦至尚

書僕射

晃大嘗時為尚書僕射帝時廢太子和晃固諫斥還鄉里至是追其功封其子弟焉

宋高祖時初劉鍾從帝為行參軍征廣國以功封永  
 新縣男食邑五百戶後平蜀有功應封四百戶男以  
 先有封爵減戶賜以次子敬順高昌縣男食邑百戶  
 沈慶之為侍中太尉義陽王昶反慶之從帝渡江總  
 領眾軍少子文耀年十餘歲善騎帝愛之又封永陽  
 侯食邑千戶

謝弘微繼從叔峻後襲爵建昌侯晉世名家身有國  
 封者起家多拜負外散騎侍郎弘微亦拜負外散騎  
 侍郎王大司馬參軍



沈文季字仲達吳興武康人父慶之為司空孝建三年文季起家辟州主簿遷秘書即以慶之勲重大明五年封文季山陽縣五等伯

南齊武帝時王敬則為右衛將軍又封敬則子元遷為東鄉侯食邑二百七十戶

梁高祖時江淹為金紫光祿大夫醴陵侯卒子為襲封自丹陽丞為長城令有罪削爵晉通四年帝追念淹功復封為吳昌伯邑如先

揚公則為中衛軍寧都侯卒子暕嗣有罪國除高祖以公則勲臣特詔聽庶長子眺嗣固讓歷年乃受

北齊孝昭帝時詔九州勲人有重封者聽分授子弟以廣骨肉之恩

武成時張雕為國子祭酒待詔文林館子德冲謙謹善於人倫聰敏好學頗涉文史以帝師之子早見旌擢歷負外散騎侍郎太師府掾入中書舍人隨例待詔

梁太祖開平元年九月魏博羅紹威二男廷望廷矩年在幼稚皆有材器帝以其藩屏勲臣之胄宜受非次之用皆擢為郎恩命既行之後二子亦就班列紹威乃上章以齒幼未任公事乞免主印宿直從之



四年四月壬戌詔曰追養以祿王者推歸厚之恩欲  
靜而風人子抱終身之感其以刑部尚書致仕張策  
及三品四品嘗參官二十二先正各追贈一等  
五年五月甲申朔制曰諸道節度使錢鏐張宗奭馬  
殷王審知劉隱各賜一子六品正員官高季昌賜一  
子八品正員官賀德倫賜一子九品正員官